

بِسْمِ اللَّهِ الرَّحْمَنِ الرَّحِيمِ

دیوان حکمت

(پیر ترکستان)

خواجہ احمد یسوی

به اهتمام:

رسول اسماعیل زاده

قوآنشبیك قاری

غالیه قمبربكاوا

احمد یسوی، - ۵۶۲ق.
[دیوان حکمت. ترکی قزاقی]
(دیوان حکمت)

Diuani hikmet: danalyq kitaby/Ahmed Iasau; baspagha azirlegender
Quanyshbek Qari, Ghaliia Qambarbekova, Rasul Ismailzade.

تهران: الهدی، ۲۰۰۰ = ۱۳۷۹.

ISBN: 964 - 472 - 286 - 8

۲۳۵، ۱۹۲ ص.

فهرست نویسی بر اساس اطلاعات فیبا.
ترکی قزاقی.

ص. ۶. به فارسی: احمد یسوی. دیوان حکمت (پیر ترکستان) ۱. شعر ترکی جغتایی - قرن
۶ ق. - ترجمه شده به ترکی قزاقی. ۲. شعر ترکی قزاقی - قرن ۲۰ - ترجمه شده از ترکی
جغتایی. الف. قمبریکووا، غالیه، Ghaliia, Qambarbekova, گردآورنده. ب. قاری
قوانشبیگ، Qari, Quanyshbek, گردآورنده. ج. اسماعیل زاده، رسول، گردآورنده.
د. عنوان. ه. عنوان: Diuani hikmet: danalyq Kitaby. و. عنوان: دیوان حکمت. ترکی
قزاقی.

۱۳۷۹

۴۹۴/۳۶۴۰۱

۹ د ۳ الف / ۵۳ PL

م ۷۹ - ۱۳۲۹۵

کتابخانه ملی

انتشارات بین المللی الهدی



تهران - صندوق پستی: ۴۳۶۳ - ۱۴۱۵۵

تلفن: ۶۴۰۶۲۶۱ فاکس: ۶۴۰۶۲۴۰

نام کتاب: دیوان حکمت

مؤلف: خواجه احمد یسوی

محقق، مصحح: رسول اسماعیل زاده دوزال

مترجم، مصحح: قوانشبیگ قاری، خانم غالیه قمبریکووا

تیراژ: ۳۰۰۰

قیمت: ۱۵۰۰۰ ریال

ISBN: 964 - 472 - 286 - 8

شابک: ۸ - ۲۸۶ - ۴۷۲ - ۹۶۴

ناشر: انتشارات بین المللی الهدی

حق چاپ برای ناشر محفوظ است.

بِسْمِ اللَّهِ الرَّحْمَنِ الرَّحِيمِ

الحمد لله رب العالمين والعاقبة للمتقين و الصلوة والسلام
 على رسوله محمد وآله واصحابه اجمعين اما بيلكيل كيم بو رساله
 قطب الاقطاب و سرور مشايخ سلطان الاوليا و برهان الاتقيا فرزند
 خوان حضرت سلطان الانبيا صلى الله عليه وسلم حضرت سلطان
 خواجه احمد يسوى آنداغ ايتيب دورلار كيم بيزدين صونكره آخر
 الزمان يقين بولغانده آنداغ مشايخ لار پيدا بولغاى كيم ابليس عليه
 اللعنة آلاردين سبق آغاى وهمه خلق آلا رغه محب بولغاى و
 مريدلارنى باشقه ره المغاى لار اول شيخ لار كيم مريدلارى دين
 طمع قيلغاى و جانينى كفر و ضلالت دين آيرمغاى و اهل
 بدعتنى يخشى كوركاي و اهل سنتنى يمان كوركاي و علم
 شريعت برلان عمل قيلماغاى و نامحرم لاركا كوز سالغايلار و
 يمان ليغ پيشه قليب الله تعالى نك رحمتيدين اميد توتقاي و
 مشايخ لار ايشينى خار كوركاي مريدلارى زد بولغاى اوزلارى
 مرتد بولغاى و ينه خارليق زازليق برله مريدلارى نك اشيكده
 يوروكايلار اول حالده مريدلاردين نياز آغايلار اكر مريدلارى
 نذرى نياز برمسه اوروشقايلار آيغايلار من بيزار من خدا
 بيزارديكايلار شيخ اولدور كيم نياز آلسه مستحق لارغه غريب

بیچاره غه بیرکایلار اکر آلیب اوزی ییسه مردار ایت یمش دیک
 بولغای اکر تون قیلیب کیسه اول تون تورغونچه حق تعالی نماز
 روزده سینی قبول قیلماغای و اکر آلمان نیازیدین نان قیلیب ییسه
 حق تعالی آنی دوزخده تورلوك عذاب غه کرفتار قیلغای و اکر
 آنداغ شیخ غه هر کشی اعتقاد قیلسه کافر بولغای آنداغ شیخ لار
 ملعون تورور آئینک فتنه سی دجال دین بدتر تورور ای طالب اکر
 حقنی طلب قیلیب تبای دیسنک آنداغ پیرکا قول بیرکیل کیم
 شریعتده عارف بالله بولسه طریقتده واقف اسرار بولسه
 حقیقتده کامل مکمل بولسه معرفتده دریای عمان بولسه آنداغ
 پیرکا قول بیرکیل کیم ایشینک سعادت بولغای اکر مرید شریعت
 علمینی بیللمسه شریعت علمینی آنکا اورکاتکای اکر طریقتده
 واقع پیدا بولمسه طریقت علمی برلان یولغه سالغای و حقیقت
 سریدین مریدیکا یول کورساتکای و اکر معرفتده جذبۀ حق پیدا
 قیلدورغای شیخ ذوالنون مصری رحمة الله علیه آنداغ
 ایتیب دورلار کیم مرید قرق ییل خدمت قیلماغونچه شیخ لیک و
 فقیرلیق و درویش اورنی آنکا تعین بولمس و خرقه کیماکی آنکا
 روا ایرمس حضرت سلطان خواجه احمد یسوی آنداغ ایتب
 دورلار کیم هر کیم پیرلیک و شیخ لیک دعواسین قیلور بولسه قرق
 ییل تا پیرنینک خدمتیده یورمغونجه شیخ اورنی آنکا روا ایرمس
 اکر مرید آلسه رد تورور هر کیم درویش لیک دعواسین قیلسه اول
 حق امرینه بویون سنوب شریعت امری برله یولغه یورکای و
 باطل ایشلاردین و بدعت ایشلاردین پرهیز قیلغای کیچه قیام
 بولمغونچه کوندوز مذمت قیلماغونچه شیخ لیک دعواسین قیلسه
 ایشی باطل تورور هر کیم شریعت امریدین چقسه مرتد تورور

اكر توبه قيلمای دنيا دين بارسه حق تعالى تموغده تورلوك
 عذابغه گرفتار قيلغای ای درویش اكر زاهد بولسه ریای عابد
 بولسه سودای صوفی بولسه کدای درویش بولسه هر جای
 صوفی لیلقلاری مردار ایشلازی فساد مریدلاری مرتد
 صوفی لیلقلاری خودروی لیک درویش لیکلاری طمع لیک
 نیتلاری فتنه لیک طریقه لاری اباحت سنتلاری بدعت فعللاری
 قباحت نتیجه لاری شقاوت سرلاری خیانت و غسل لاری جنابت
 صوفی لارده ریاضت یوق فقیرلارده قناعت یوق غنی لارده
 سخاوت یوق درویش لارده وهم قیامت یوق ای درویش احوالیمز
 نچوک بولغای ای درویش بیلکیل و اکاد بولغیل کیم اوّل کلمه
 شریعت ایکنچی کلمه طریقت اوچونجی کلمه معرفت تورتونچی
 کلمه حقیقت نی بیلکم کیراک اكر صوفی بولوب بو کلمه لارنی
 بیللمسه صوفی ایمر کلمه شریعت بو تورور لا اله الا الله کلمه
 طریقت بو تورور لا اله الا الله صفا صفا محمد رسول الله کلمه
 معرفت بو تورور لا اله الا الله عظمته محمد رسول الله خلقتنه کلمه
 حقیقت بو تورور لا اله الا الله بقدرته محمد رسول الله رسالته ای
 درویش مشایخ ماتقدم نینک فقیرلیغی نی قبول قلیب سوزلارکا
 پی رولغ قلیب احکام وارکانلارینی بیلیب هوا و هوسنی ترك
 قلیب نفسنی مجاهده یایی برلان سیندوروب اوزیکا مطیع
 قلیب و قناعتنی پیشه قلیب قضا سینه راضی بولوب بلاسیغه
 صبر قلیب نعمتی کا شکر قلیب ایتکان رسالهغه عمل قلیب
 خدای تعالی نینک امرینی بجای کیلتورسه درویش لیک آتی آنکا
 مسلم بولور یوق ایرسه بولارنی بیلمای شیخ لیق دعواسین قیلسه
 قیامت کونی قرا یوزلوك بولوب شرمنده بولغای نعوذ بالله من

ذلك فقيرليق مرتبه سى مقام اعلا تورور هر كيم كا ميسر بولمس.
 قدرت برلان حقدین سزكا فرمان بولدى
 توبسيز تينكز ايچره يلغوز توشتوم دوستلار
 اول تينكزكا اوغان ايديم فرمان قيلدى
 بحمد الله صحت سلامت كچتيم دوستلار

ياشيم يتى، عمروم كيتى كوككا اوچتوم
 بغريم تاشتى، عقليم شاشتى، يركا توشتوم
 نفس و شيطان خيلى برلان كوب اوروشتوم
 صبر رضا مقاماتين آشتوم دوستلار

توقوزومده توكال توزدوم توكونمادوم
 اون ياشيمده اونك يانيمغه اوركولماديم
 اون بريمده اوز نفسيم كا ضابط بولدوم
 فقر رضا مقاماتين كچتيم دوستلار

اون ايكيimde برچه ارواح كلام قيلدى
 حورلار قارشو كيلىب منكا سلام قيلدى
 سر شربتین ساقى بولوب منكا سوندى
 آنى آليب ادب برلان ايچتيم دوستلار

اون اوچومده غواص بولوب دريا چومدم
 معرفت گوهرينى سردين تيرديم
 شمعين كوروب پروانه دك اوزوم اوردوم
 بيهوش بولوب عقليم كيتى شاشتيم دوستلار

اون تور تومده تفراق صفت خارليغ تارتيم
 "هو - هو" تيو باشم برلان تونلار قاتيم
 مينك آلتونليق قيمتىنى بركا ساتيم
 آندين سونكرا قنات توتوب اوچتوم دوستلار

اون بيشمده دركاهينكا يانيب كيلديم
يازوق برلان هر ايش قيلديم خطا قيلديم
توبه قيليب حقه بويون سئوب كيلديم
توبه قيليب يازوقلاردين قاجتيم دوستلار
جبرائيل وحى كيلتوردى حق رسولغه
آيت كيلدى ذكر ايتكين ديب جزء و كلغه
خضر بابام سالى منى اوشبو يولغه
آندين صونكره دريا بولوب تاشتيم دوستلار
شريعت نينك بوستانيده جولان قيلديم
طريقت نينك كلزارينده سيران قيلديم
حقيقت دين قنات توتوب طيران قيلديم
معرفت نينك ايشيكنى آچتيم دوستلار
آلستُ خمرين پير مغان تويا بردى
ايچا برديم مقداريم چه قويا بردى
قل "خواجه احمد" ايچيم تاشيم كويا بردى
طالب لركا دَر و گوهر ساچتيم دوستلار
القصه بو مقام انبيالار و عارفلار و عاشقلارننك مقامى
تورور خصوصا حضرت رسول اكرم صلى الله عليه و سلم نينك
مقامى تورور يعنى الفقر فخرى ديديلار و فقيرنى يخشى كورمك
ايمان دين تورور و فقيرنى خار توتماق كفر تورور نجوك كيم
حضرت نبينا صلى الله عليه و سلم ايديلار حُبُّ الْفَقْرِ مِنَ الْاِيْمَانِ
وبغض الفقراء من الكفر اما فقيرليق مرتبه سى و حرمتى يتى قات
آسماندين و يتى قات يردين اولوغ راغ تورور نجوك كيم حضرت
رسول اكرم صلى الله عليه و سلم ايديلار حرمة الفقراء المؤمنين

اعظم عند الله من سبع السموات و سبع الارضين ديب ايديلار اى
 درویش هر کیم غنی لارنى اكرام قيلسه دنياسى اوچون ابد الآباد
 خدای تعالی نینک لعنتی غه کرفتار بولور و اكر فقیرنى حقیر کورسه
 و اهانت قيلسه خدای تعالی چندین عذاب غه کرفتار قيلغای بول
 فعل مؤمن لارده بولمس مکر منافق لارده بولغای حضرت علی
 رضى الله تعالى عنه روايت قيلورلار کیم درویش ليک مقامی قرق
 تورور اكر بيليب عمل قيلسه درویش ليکی پاك تورور و اكر بيلمسه
 و اوركانمسه درویش ليک مقامی آنکا حرام تورور و جاهل تورور
 اول قرق مقام نینک اونى مقام شریعتده تورور و اونى مقام
 طریقتده تورور و اونى مقام معرفتده تورور و اونى مقام
 حقیقتده تورور اول اون مقام شریعتده تورور (اول) ایمان
 کيلتورمک حق تعالی نینک بیرلکیکا و بارلیقیغه و صفاتیغه و
 ذاتیغه (ایکنجی) نماز او قومق تورور (اوچونجی) روزه توتماق
 تورور (تورتونجی) زکوة بیرمک تورور (بیشنجی) حج طواف
 قیلماق تورور (آلتنجی) ملازم سوزلامک تورور (یتنجی) علم
 اوگرامک تورور (سکزنجی) حضرت رسول صلی الله تعالی علیه
 و سلمنى سنت لارینى بجای کيلتورمک تورور (توقوزنجی) امر
 معروفنى بجای کيلتورمک تورور (اونونجی) نهی منکر قیلماق
 تورور اون مقام طریقتده تورور (اول) توبه تورور (ایکنجی)
 پیرکا قول برمک تورور (اوچونجی) خوف تورور (تورتونجی)
 رجا تورور یعنی حق تعالی دین امیدوار بولماق تورور (بیشنجی)
 ورد اوقاتنى بجای کيلتورمک تورور (بشنجی) لذات و
 شهواتنى ترك قیلماق تورور (آلتنجی) پیرنى خدمتیده بولماق
 تورور (یتنجی) پیرنى اجازتى برلان سوزلامک تورور (سکزنجی)

نصیحت ایشیت مک تورور (توقوزنچی) تجرید بولماق تورور
 (اونونچی) تفرید بولماق تورور. اون مقام معرفتده تورور (اؤل)
 فنا بولماق تورور (ایکنچی) درویشلیقنی قبول قیلماق تورور
 (اوچونچی) هر ایش کا تحمل قیلماق تورور (تورتونچی) حلال
 طیب طلب قیلماق تورور (بیشنچی) معرفت قیلماق تورور
 (آلتنچی) شریعتنی و طریقتنی برپای توتماق تورور (یتنچی)
 دنیانی ترک قیلماق تورور (سکزنچی) آخرتنی اختیار قیلماق
 تورور (توقوزنچی) وجود مقامینی بیلمک (اونونچی) حقیقتنی
 اسرارینی بیلمک تورور.

اون مقام حقیقتده تورور (اؤل) خاک راه بولماق تورور
 (ایکنچی) یخشی یماننی تیماق تورور و بورون لقمه کا قول
 سالمق بلکه فضلہ کا قناعت قیلماقدور اوزینی لقمه سینی سبیل راه
 قیلماق و کشینی آزار برمکای و فقیرلیقغه منکر بولماغای و سیر
 سلوک قیلماق هر کیم دین سرنی ساقلامق و شریعت و طریقت و
 حقیقت مقامینی بیلمک و عمل قیلماق شیخ حسن بصری رحمة
 الله علیه روایت قیلورلار حضرت رسول صلی الله علیه و سلم دین
 حضرت علی رضی الله عنه غه ایدیلار معراج کیچه سی حق تعالی
 فرمان برلان حضرت جبرائیل علیه السلام بوراق کیلتوردی یتی
 قات آسمان دین آشوردی تنکری عز وجل قدرتی برلان
 عجایب لارنی کوردی حضرت رب العالمین سلام قیلدی حق
 تعالی حبیبی جواب سلام آلدی خطاب رب الارباب دین ندا
 کیلدی یا سید المرسلین: یوقاری نظر قیل حضرت رسول اکرم
 صلی الله علیه و سلم نظر قیلدی ایرسه عجایب صورت لارنی
 کورورلارکه آنینک شرحی یر و کؤک کا سیغمس آنده حیران

بولدىلار و بيهوش بولدىلار ينه هوشلار يكا كىلدىلار ايدىلار يارب
 اول نه صورت ايردى كه كوردوم عقل هوشوم دين كيتيم حضرت
 رب العزت دين ندا كىلدىكه اول صورت فقيرلىق صورتى تورور
 اى محمد اكرمنى تىلاسنك فقير بول تجريد و تفريد بولغىل و اكر
 دىدار تىلاسنك رياضت تارتغىل تا منىنك جمالىم غه مشرف
 بولغاي سن و هر كيم دىدار تىلاسه غير حق آنكا حرام تورور
 فقيرلىق صورتىنى كوردىلار اما مشايخ لار اول صورتنى بيانده
 مختلف سوزلاب تورورلار حضرت على رضى الله عنه ايدىلار
 حضرت محمد مصطفى صلى الله عليه و سلم اول كيچه معراج دين
 يانى كىلدىلار مبارك يوزلار يده نوري كوردوم اون سكز مينك عالم
 اول نوردين منكا عيان بولدى آنده ايدىم يا رسول الله بو كون
 يوزونكىزده نور كوردوم كونده كىدين زياده حضرت رسول صلى
 الله عليه و سلم ايدىلار بول كيچه معراج ده رب العالمين حضرت يده
 فقيرلىق صورتىنى كوردوم عشق شرايىدين بير جرعه نوش قىلدىم
 دىدىلار دىدىلار حضرت على رضى الله عنه ايدىلار بو حالده من
 هم آرزو قىلدىم حضرت رسول صلى الله عليه و سلم عشق
 شرايىدين بير جرعه منكا هم بيردىلار ايچتىم بيحال بولدوم و
 بيهوش بولدوم ينه هوشىم كا كىلدىم هر نه حضرت كا معاينه و
 مشاهده ايردى منكا هم شونداغ معاينه و مشاهده بولدى حضرت
 رسول اكرم صلى الله عليه و سلم ايدىلار يا على فقيرلىق مقامينده
 اون مقام بار تورور و اون نور بار تورور و اون يول بار تورور و
 اون اوروون بار تورور قرق مرتبه بار تورور (اول) اون مقام بار
 تورور كيم (اَوَّل) قناعت تورور چنانچه حضرت رسول اكرم صلى
 الله عليه و سلم ايدىلار الْقَنَاعَةُ كُنْزٌ لَا يَقْنَىٰ عَنْهُ قَنَاعَتٌ كُنْجِيدُور

کیم هرکیز تاکانماس و مال نینک فایدهسی یوقتور اولوم وقتیده
 منقطع بولور (ایکنچی) مقام فقر بلاغه تحمل قیلماقدور
 (اوچونچی) مقام فقر کرفتارلیق تورور بندهلیکی کا (تورتونچی)
 مقام فقر عذاب تورور ایوب پیغمبردیک بولمیش تورور
 (بشنچی) مقام فقر حیرت تورور (آلتنچی) مقام فقر ریاضت
 تورور (یتنچی) مقام فقر آجلیق تورور (سکزنچی) مقام هلاکت
 تورور (توقوزونچی) مقام دل خسته بولماق دور (اونونچی) مقام
 فقر حضرت رب العزت لیک تورور.

و اون نور فقر تورور (اول) نور صدق (ایکنچی) نور صبر
 حضر رسول صلی الله علیه و سلم ایدیلار الصبر کَنْزٌ مِنْ کَنْوَزِ
 الْجَنَّةِ یعنی صبر بهشت نینک کنج لاریدین تورور (اوچونچی) نور
 شکر تورور (تورتونچی) نور فکر تورور (بیشنچی) نور ذکر
 تورور (آلتنچی) نور نماز تورور (یتنچی) نور روزه تورور
 (سکزنچی) نور ایمان تورور (توقوزنچی) نور صدقه تورور
 (اونونچی) نور پاک جان تورور.

و اون یول فقر تورور (اول) توبه تورور (ایکنچی)
 یازوق لار دین قایتماق تورور (اوچونچی) پشیمان لیغ تورور
 (تورتونچی) حیرت تورور (بیشنچی) مقام خارلیق و زارلیق
 تورور (آلتنچی) حق تعالی دین یاری تیلامیک تورور (یتنچی)
 یمان یول لار دین یانماق تورور (سکزنچی) خدای تعالی نینک
 ذکر ی برلان بولماق تورور (توقوزنچی) تفکر تورور (اونونچی)
 فنا بولماق تورور.

و اون اورون بار تورور فقر تورور حکمت تورور عدل
 تورور عقل تورور حلم تورور حیا تورور عزت تورور احسان

تورور ستارلیغ تورور امانت تورور تسلیم تورور شیخ شهاب
 الدین قدس الله سره ایدیلار درویشلیک کا بول قرق شرایطنی
 بیلیم کیراک آنداغ کشینی صوفی دیکایلار سلطان احمد کبرا
 ایدیلار یتیمش اوج ییل عمر کوردوم قرق ییل مسافرلیق برله
 بولدوم یتی ییل حج قیلدیم مینک مرتبه ختم قرآن قیلدیم یتیمش
 مرتبه حضرت رسول صلی الله علیه و سلمنی توشومده کوردوم
 مبارک یوزلاری کا قراب بول قرق مقامنی منکا ایدیلار من عمل
 قیلما دیم حضرت واجب تعالیٰ غه یتیشما دیم حضرت شیخ شهاب
 الدین رحمة الله علیه ایدیلار کیم بول قرق مقامنینک اونى
 شریعتده تورور و اون مقام طریقتده تورور و اونى مقام
 حقیقتده تورور و اونى مقام معرفتده تورور هر صوفی هر
 درویش هر فقیر کیم بول قرق مقامنی بیلمسه و عمل قیللمسه
 صوفی لیق شیخ لیق و فقیر لیق دعواسین قیللمسه یلغان تورور و اکر
 صوفی غه بو دنیانینک نعمتنی تمام برسه لار کافرلار کا اشارت
 قیللمسه کیراک و اکر عقبی نعمتنی و جنتنی تمام برسه لار
 مؤمنلار کا اشارت قیللمسه کیراک محنت و رنج بلانی اوزیکا کورسه
 کیراک صوفی اکر خلوتده بولسه حق تعالیٰ نینک ذکرى برلان
 بولسه کیراک و اکر خلق آراسیده بولسه شریعت درکاهی کا صبر
 قیللمسه کیراک و هر وقتی که درمأنده بولسه آنینک درکاهی کا صبر
 قیللمسه کیراک صوفی حلال یمک دین توبه قیللمسه کیراک الا بقدر
 ضرورت تا شبهه کا توشمکای و اکر صوفی دنیا نعمتنی تیلاسه
 صوفی ایمس و اکر دعا و زاری بلان بلا و محنت قیللمسه صوفی
 تورور و شیخ لیق مقام مجاهده تورور و اهل دنیا بلندنی تیلار و
 اهل عقبی پستلکنی تیلار خار زارلیقنی تیلار و اکر صوفی کا بلا

کیسه آه و آه دیمس و صبر قیلور و اگر صوفی نین نفسی نعمت
 آرزو قیلسه نفسنی آرزوسینی بیرمکای و اگر صوفی آج بولسه و
 برهنه بولسه خوشنود بولغای و صبردین اوزکانی اختیار قیلماغای
 خوش تواضع لیق بولغای بول اون مقام شریعتده تورور و اون
 مقام طریقتده تورور تسلیم تورور یعنی اگر بلا و محنت باشیغه
 کیسه اوزینی تسلیم کا جان و دل برلان سالغای ینه ایچمکدین و
 یمکدین کیمکدین خلقدین تیلامسون و کلیم پاره سینی
 اطلسدین زیاده کورسون کوندوز روزه کیچه نمازده بولسون و
 تلاوة قرآن برله بولسون اوقوب قرآن تلاوة قیلمغیل ترک نظم
 دیسنگ آخرده بولسون و اهل محبتدین اوزکانی ذکر قیلماسون و
 ینه اخلاص برله بولسون صوفی هر کیچه نماز تهجدنی ترک
 قیلماسون خوف و رجا ایچیده بولسون و اگر صوفی طاعتینی
 خلقغه ظاهر قیلسه ریا اوچون ایلک ییل لیق طاعتی نی ذره
 طعام کا ساتقای تنکری عز و جل کا شایسته بولماغای ینه صوفی
 یولغه راست لیق برلان قدم قویسه کیراک و راست سوزلاسه کیراک
 زیرا که کونکل تیل کا خبر بیرورینه صوفی نفسینی کویدوروب فنا
 قیلسه کیراک دنیا دین سوزلامسه کیراک حق تعالی نینگ یادی برلان
 خوش وقت بولسه کیراک و ینه صوفی پست لقای بولسه حق
 تعالی نی تابقای اگر اوتقه باقسه حقنی کورکای و اگر سوغه باقسه
 حقنی کورکای و اگر یوقاری باقسه حقنی کورکای و اگر قویی
 باقسه حقنی کورکای و اگر ایلکاری باقسه حقنی کورکای و اگر
 اولتورسه حقنی کورکای مشاهده کوزی برلان و ینه صوفی علم
 الیقین و عین الیقین مقامینی تابقای و اگر سر کوزی برلان یوقری
 باقسه عرشنی کورکائی (و اگر) قویی باقسه یتی طبقه زمیننی تا

تحت الثرا پشت کا و ماهینی کورای و هیچ حجاب بولماغای و اگر حق الیقین کوزی برلان باقسه مخلوقات و مصنوعات دین کچیپ بی چون و بی چگونه حقنی کورکای و معرفتده برچه کونین عالمینی کورکای تانیق تورور بی شک و بی شبهه ینه صوفی دنیا و آخرتده آنینک همتی کا سیغمس برچه بهشتنینک نعمت لاری کوزیکا کورونمس ینه صوفی دیکان خدانینک شوقیده سودک بولوب ایریب آقسه کیراک کونکلنی حقنی رضاسیغه برسه کیراک فرزندیکا و مالیغا برمه کیراک ینه صوفی دیکاننی کوریده تابمغای لار و پل صراطده هم تابمغای لار و جنتده هم تابمغای لار حضرت واجب تعالی نینک قُربیده تابقایلار اگر صوفی ایتسه. ای بار خدایا برچه عاصی لارنی منکا باغیشلاغیل دیسه آنینک سوزینی حق تعالی رد قیلماغای و ینه صوفی تا حضرت حق تعالی دین ندا ایشیتسمه جانینی برمکای منکر و نکیر دین اندیشه قیلماغای قیامتنی اندیشه قیلماغای حور و قصورکا باقماغای تا ملک غفارنی کورمکونچه ینه صوفی اول بولور کیم برچه ایشلاردین کونکلی ساق بولسه نفس و شهوات دین صاف بولسه باطینی آفات دین صاف بولسه یوروشی صاف بولسه باطینی پوخته بولسه کوزی ایکی دنیادین دوخته بولسه سری افروخته بولسه بول ایتلکان سکسان مقام بولدی ای درویش هر بیر مقام بیر پیغمبرننک مقامی تورور اوّل حضرت آدم علیه السلام نینک و آخری محمد مصطفی صلی الله علیه و سلم نینک تورور سلطان المشایخ حضرت خواجه احمد یسوی رحمة الله علیه ایدیلار کیم یتمش علم آدابنی بیلمکونچه یتمش مقام یولنی طی قیلیب کیزمکونچه هر کیم شیخ لیق مقامی دعواسین قیلسه اول همان بت

بولغای شیخ سری سقطی رحمة الله علیه ایدیلار فقر بیر تاغ
 ایرور برچه کانلارنینک مکانی تورور شیخ المشیخ قدس الله
 تعالی ارواحه ایدیلار فقر بر دریای تورور اول دریای پایانی یوق
 آنینک پایانی کشی کورکانی یوق بجز حضرت محمد مصطفی
 صلی الله علیه و آله و سلم سید الطائفة حضرت جنید بغدادی
 ایتورلار فقر بر پشته تورور احمد کبرا ایتور فقر نور خدا تورور هر
 کیم که اول نورنینک ضیاسی تیکسه آنینک ضیاسیدین کمال عشق
 تاپار شیخ احمد ایتور فقر بر تاج دولت تورور هر کیم باشیغه
 کیدنی ایکی جهانده سلطان ابدی بولدی شیخ شقیق بلخی رحمة
 الله علیه ایتور فقر بر اوت تورور هر کیم نینک کونکلیکا توشتی
 وجودی آلتون بولدی شیخ احمد جام ایتور فقر بر شراب تورور
 هر کشی جرعه نوش قیلدی تا قیامت غاچه مست لقای بولدی
 شیخ قطب الدین حیدر ایتور فقر جذبه خداوند ایرور هر کیم کا
 تیکسه ایکی جهانده مرادی حاصل بولدی خواجه عبدالله حیدر
 ایتور فقر هدایت ربنا تورور هر کیم که یول تابتی جاودانه
 سلطان لیغی نی تابتی شیخ منصور حلاج ایتور فقر دیدار حق تعالی
 تورور هر کیم کوردی کورمدی لقمان سرخسی ایتور فقر شه باز
 همت تورور هر کیم کا قوندی اول کشی عرش کا پرواز قیلدی تا
 لامکانی سیر قیلدی و مشایخ لار قولی مونداغ ایرور فقر حق
 تعالی نینک باغ و صلیدین درختی تورور اول درخت نینک بوتاغی
 عقل تورور ریشه سی هدایت تورور میوه سی خیر و سخاوت
 تورور سایه سی قناعت تورور آنینک بویی شوق تورور آنینک
 برکی هر کیم کا تیکدی عمل صالح حاصل قیلدی هر کیم
 میوه سیدین یدی حیات جاویدانه تابتی و اگر بویی هر کیم کا

تیکسه مست و حیران بولغای و اگر سایه سیده اورون آلسه آفتاب
 حقیقت آنکا توشقای ای درویش فقرینک آلتی آدابی با تورور
 اول یخشی یمان سوزکا سکوت قیلماق و پیر آلدیده خاموش
 بولماق و بی اجازت پیر سوزلارممک و کشی برلان آچیغ بولماق و
 خاص عامنینک خدمتی نی قیلماق و نفسینی اولتورمک و هوا و
 هوسنی ترک قیلماق فقردین پاکیزه نرسه بولمس فقر غربت
 تورور آچ بولماق تورور و اگر آچ بولسه آنینک طهارتی و ذکری
 کونکل دین کیتمس و اگر توق بولسه فسادلار پیدا بولور فقر
 مقامی سکز تورور (اول) توبه تورور عبادت تورور مصبر تورور
 شکر تورور رضا تورور زهد تورور عارفلق تورور (اولی)
 حضرت آدم علیه السلام دین قالدی (عابدلیق) حضرت ادریس
 علیه السلام دین قالدی (شکر و محبت) حضرت ابراهیم علیه
 السلام دین قالدی (صابرلیق) حضرت ایوب علیه السلام دین
 قالدی (راضی لیق) حضرت موسی علیه السلام دین قالدی
 (زاهدلیق) حضرت عیسی علیه السلام دین قالدی (عارفلیق)
 حضرت محمد مصطفی صلی الله علیه و سلم دین قالدی فقر
 مرتبه سی یتی تورور جوانمردلیق تورور سپاهی لیق تورور خرقة
 تورور صبر تورور قناعت تورور شکر تورور توکل تورور جوان
 مردلیق حضرت علی دین قالدی سپاهی لیق حضرت سلیمان علیه
 السلام دین قالدی غربت لیق یحیی علیه السلام دین قالدی صبرلیق
 و رضالیق حضرت ایوب علیه السلام دین قالدی قناعت لیق
 حضرت محمد مصطفی صلی الله علیه و سلم دین قالدی هر
 درویش که بول یتی مقام درویش لیک نی بیللمسه یا بیللیب عمل
 قیللمسه شیخ لیق و مرید آماق آنکا حرام تورور ای درویش بوله

فقرنامه ده هر وصیتی که بتیلدی کلام ربانی و حدیث نبوی دین و
اجماع امت دین بتیلدی هر طالب که بول وصیت لارکا عمل قلیب
استقامت قیلسه دنیا و عقبی آنکا میسر بولغای واکر عمله قیلمه
آخر دمیده جای نی کوروب پشیمان قیلغای و شرمندۀ آخرت
بولغای هر درویش بو قرق مقام نی ییلمسه و عمل قیلمه آنینک
شیخ لیغی شیطانی تورور اول مقام ملکوت ایکنچی مقام لاهوت
اوچونچی مقام ناسوت تورتونچی مقام جبروت. مقام جبروت
شریعت تورور مقام ملکوت طریقت تورور مقام لاهوت معرفت
تورور مقام ناسوت حقیقت تورور.

(۱) حکمت

بسم الله ديب بيان ايلای حکمت ايتيب
طالب لارکا دُر و گوهر ساچتيم منا
رياضتني قاتيغ تارتيب قانلار يوتوب
مین دفتری ثانی سؤزین آچتیم منا
سوزنی ایدیم هر کیم بولسه دیدار طلب
جاننی جانغه پیوند قیلیب رکنی اولاب
غریب، یتیم فقیرلارنی کونکلین اولاب
کونکلی بوتون خلایق دین قاجتیم منا
قیده کورسنگ کونکلی سنوق مرهم بولغیل
انداغ مظلوم یولده بولسه همدم بولغیل
روز محشر درکاهی کا مَحْرَم بولغیل
ما و من لیک خلایق دین قاجتیم منا
غریب فقیر یتیملارنی رسول سوردی
اوشال تونی معراج چیقیب دیدار کوردی
قایتیب توشوب غریب، فقیر حالین سوردی
غریبلارنی ایزین ایزلاب توشتوم منا
امت بولسنگ غریبلارغه تابع بولغیل
آیت حدیث هرکیم ایتسه سامع بولغیل
رزق روزی هر نه بیرسه قانع بولغیل
قانع بولوب شوق شرابین ایچتیم منا

مدینه کا رسول باریب بولدی غریب
 غریب لیغده محنت تار تیب بولدی حبیب
 جفا تار تیب یراتقانه بولدی قریب
 غریب بولوب عقبه لاردین آشتیم منا
 عاقل ایرسنک غریب لاردین کونکلین آوله
 مصطفی دیک ایلنی کیزیب یتیم کاوله
 دنیا پرست ناجنس لاردین بویون تاوله
 بویون تاو لاب دریا بولوب تاشتیم منا
 عشق بابی نی مولیم آچقاچ منکا تیکدی
 تفراق قیلیب حاضر بولدی بونوم ایکدی
 باران صفت ملامت نی اوقی تیکدی
 پیکان آلیب یوراک بغرم تیشتم منا
 کونکلوم قاتیغ، تیلیم اچیغ، اوزوم ظالم
 قرآن اوقوب عمل قیلما یالغان عالم
 غریب جانیم صرف ایلایین یوقتور مالیم
 حقدین قورقوب اوتقه توشمای پشتیم منا
 آلتیش اوچکا یاشیم ینی اوٹوم غافل
 حق امرینی محکم توتمای اوزوم جاهل
 روزه - نماز قضا قیلیب بولدوم کاهل
 یمان ایزلاب یخشی لاردین کیچتیم منا
 واد دریغا محبت نی جامین ایچمای
 اهل - عیال خانم اندین توکال کیچمای
 جرم و عصیان کره لاردین مونده چیچمای
 شیطان غالب جان برارده شاشتیم منا
 ایمانیمه چنکال اوروب قیلدی غمناک
 پیر مغان حاضر بولدیب ساچتی تریاک
 شیطان لعین مندین قاچیب کیتی بی پاک
 بحمد الله نور ایمان آچتیم منا

پیر مغان خدمتیده یوکوروب یوردوم
 خدمت قیلیب کوزوم یوممای حاضر توردوم
 مدد قیلدی عزازیلنی قَولاب سوردوم
 آندین سونکره قنات قاقیب اوچتیم منا
 غریب فقیر یتیملارنی قیلکیل شادمان
 حلقه‌لار قیلیب عزیز جانینک ایلا قربان
 طعم تابسنک جانینک بیله قیلکیل مهمان
 حق‌دین ایشتیپ بو سوزلارنی آیدیم منا
 غریب - فقیر یتیملارنی هر کم سورار
 راضی بولور اول بنده‌دین پروردکار
 ای بی خبر سن بیر سبب اوزی اسرار
 حق مصطفی پندین ایشیت ایدیم منا
 یتی یاشده ارسلان بابغه قیلدیم سلام
 حق مصطفی امانتین قیلینک انعام
 اوشال وقتده مینک بیر ذکرین قیلدیم تمام
 نفسیم اولوب لامکانغه آشتیم منا
 خرما بیریب باشیم سلاب نظر قیلدی
 بیر فرصتده عقبی سری سفر قیلدی
 الوداع دیب بو عالم‌دین کذر قیلدی.
 مکتب باریب قیناب جوشوب تاشتیم منا
 "آنا فتحنانی" اوقوب معنی سوردوم
 پرتو سالدی بیخود بولوب دیدار کوردوم
 ملام اوروب "اسکت" دیدی باقیب توردوم
 یاشیم ساچیب مضطر بولوب توردیم منا
 ایا نادان معنی بولدیب ایدی بیلدیم
 آندین سونکره چول‌لار کزیب حقنی سوردوم
 روزی قیلدی عزازیلنی توتوب مندیم
 لندر توکوب بیلین باسیب یانچتیم منا

ذکرین تمام قلیب اوتوم دیوانه کا
 حقدین اوزکا هیچ سوزلامای بیکانه کا
 شمعین ایزلاب شاگرد کیردیم پروانه کا
 اخکر بولوب کویوب یانیب اوچتیم منا
 نام - نشان هیچ قالمدی لالا بولدوم
 الله یادین آیته - آیته الا بولدوم
 خالص بولوب مخلص بولوب لله بولدوم
 "فنا فی الله" مقامی غه آشتیم منا
 سنت ایرمیش کافر بولسه بیرمه آزار
 کونکلی قاتیغ دل آزاردین خدا بیزار
 الله حقی انداغ قل غه سجین طیار
 دانالاردین ایشتیب بو سوز ایدیم منا
 سنتلارین محکم توتوب امت بولدوم
 یر آستیغه یالغوز کریب نورغه تولدوم
 حق پرستلار مقامی غه محرم بولدوم
 تیغ باطن برله نفسنی یانچتیم منا
 نفسیم منیم یولدین اوروب خوار ایلادی
 تیلرور توروب خلایق غه زار ایلادی
 ذکر ایتورمای شیطان برله یار ایلادی
 حاضرسن دیب نفس باشنی سانچتیم منا
 قل "خواجه احمد" غفلت بیله عمرونك اوتی
 وا حسرتا کوزدین تیزدین قوت کیتی
 وا ویلتا ندامتنی وقتی یتی
 عمل قیلمای کاروان بولوب کوچتیم منا

آیا دوستلار قولاق سالینک ایدوغوم کا
 نه سبب دین التمش اوچده کیردیم بیرکا
 معراج اوزره حق مصطفی روحوم کوردی
 اول سبب دین التمش اوچده کیردیم بیرکا
 حق مصطفی جبرئیل دین قیلدی سؤال
 بو نچوک روح تن غه کیرمای تابتی کمال
 کوزی یاشلیغ، حلقه باشلیغ قدی هلال
 اول سبب دین التمش اوچده کیردیم بیرکا
 جبریل ایدی امت ایشی سزکا بر حق
 کوککا چیقیب ملایک دین آلور سبق
 نالشی کا ناله قیلور هفتم طبق
 اول سبب دین التمش اوچده کیردیم بیرکا
 فرزندیم دیب حق مصطفی قیلدی کلام
 آندین سونکره برچه ارواح قیلدی سلام
 رحمت دریا تولوب تاش دیب یتى پیام
 اول سبب دین التمش اوچده کیردیم بیرکا
 رحم ایچره پیدا بولدوم ندا کیلدی
 ذکر ایت دیدی بدنلاریم جنبش قیلدی
 فرزندیم دیب حق مصطفی اولوش بردی
 اول سبب دین التمش اوچده کیردیم بیرکا
 تورت یوزیل دین کین چیقیب امت بولغای
 نیچه ییل لار یوروب خلقه یول کورکوزکای
 اون تورت مینک مجتهدلار خدمت قیلکای
 اول سبب دین التمش اوچده کیردیم بیرکا

توقوز آی توقوز كونده بيركا توشتوم
 توقوز ساعت تور آلمديم كوكتا اوچتوم
 عرش - كرسى پايه سيني باريب قوچتوم
 اول سبدين آلميش اوچده كيرديم بيركا
 عرش اوستيده نماز اوقوب تيزيم بوكدوم
 رازيم آيتيب حقه باقيب ياشيم توكتوم
 يالغان عاشق، يالغان صوفى كوردوم سوكتوم
 اول سبدين آلميش اوچده كيرديم بيركا
 جاندين كيچماي "هو - هو" ديكان باري يالغان
 بو قلتاقدين سورمنك سؤال يولده قالغان
 حقنى تابقان اوزى پنهان، سوزى پنهان
 اول سبدين آلميش اوچده كيرديم بيركا
 بير ياشيمده ارواح منكا اولوش بيردى
 ايكي ياشده پيغمبرلار كيلىب كوردى
 اوچ ياشيمده چلتن كيلىب حاليم سوردى
 اول سبدين آلميش اوچده كيرديم بيركا
 تورت ياشيمده حق مصطفى بيردى خرما
 يول كورساتيم يولغه كيردى نيچه گمراه
 قيد بارسم خضر بابام منكا همراه
 اول سبدين آلميش اوچده كيرديم بيركا
 بيش ياشيمده بيلم باغلاب طاعت قيلديم
 تطوع روزه توتوب عادت قيلديم
 كيچه - كوندز ذكرين ايتيب عادت قيلديم
 اول سبدين آلميش اوچده كيرديم بيركا
 آلتى ياشده تورماي قاچتيم خلايقدين
 كوكتا چيقيب درس اوركانديم ملايك دين
 دامين كيسيب همه اهل علايقدين
 اول سبدين آلميش اوچده كيرديم بيركا

یتی یا شده آرسلان بابام ایزلاب تابتی
 هر سر کوروب پرده برله بوکوب یابتی
 بحمد الله کوردوم دیدی ایزیم اوبتی
 اول سببدین آلتیش اوچده کیردیم بیرکا
 قابض کیلیب آرسلان بابام جانین آلدی
 حورلار کیلیب حریر توندین کفن قیلدی
 يتمش منك فرشتهلار یغیلیب کیلدی
 اول سببدین آلتیش اوچده کیردیم بیرکا
 جنازه سین اوقوب ییردن کوتاردیلار
 بیر فرصته اوچماخ ایچره ییتکوردیلار
 روحین آلوب علین کا کیرکوزدیلار
 اول سببدین آلتیش اوچده کیردیم بیرکا
 الله الله ییر آستیده وطن قیلدی
 منکر - نکیر "مَنْ رَبُّكَ" دیب سوروغ سوردی
 آرسلان بابام اسلامی دین بیان قیلدی
 اول سببدین آلتیش اوچده کیردیم بیرکا
 عاقل ایرسنک ایرانلارکا خدمت قیلغیل
 امر معروف قیلغانلارنی عزّت قیلغیل
 نهی منکر قیلغانلارنی حرمت قیلغیل
 اول سببدین آلتیش اوچده کیردیم بیرکا
 سیکزیمده سیکز یاندین یول آچیلدی
 حکمت ایت دیب باشلاریمغه نور ساچیلدی
 بحمدالله پیر مُغان می ایچوردی
 اول سببدین آلتیش اوچده کیردیم بیرکا
 پیر مُغان حق مصطفی بیشک بیلینک
 قیده بارسنک وصفین ایتیپ تعظیم قیلنک
 درود ایتیپ مصطفی غه امت بولینک
 اول سببدین آلتیش اوچده کیردیم بیرکا

توقوزومده تولغانمادیم توغری یولغه
 تبرک دیب آلیب یوردی قولدین قولغه
 قوانمادیم بو سوزلارکا قاچتیم چولکا
 اول سبیدین آلتیش اوچده کیردیم بیرکا
 اون یاشینکده اوغلان بولدونک قول "خواجه احمد"
 خواجه لیک کا بنا قویوب قیلمای طاعت
 خواجه مندیب یولده قالسنک وای نه حسرت
 اول سبیدین آلتیش اوچده کیردیم بیرکا

(۳)

حکمت

هر صبحدم ندا کیلدی قولاقیمغه
 ذکر ایت دیدی ذکرین ایتیپ یوردوم منا
 عشق سزلارنی کوردوم ایرسه یولده قالدی
 اول سبیدین عشق دوکانین قوردیم منا
 اون بیریمده رحمت دریا تولوب تاشتی
 الله دیدیم شیطان مندین یراق قاچتی
 های و هوس، ما و من لیک تورمای کوچتی
 اون ایکیمده بو سرلارنی کوردوم منا
 اون اوچومده نفس هوانی قولغه آلدیم
 نفس باشیغه یوز مینک بلا قارماب سالدیم
 تکبرنی آیاغ آستیده باسیب آلدیم
 اون تور تومده تفراق صفت بولدیم منا
 اون بیشیمده حور و غلمان قرشو کیلدی
 باشین اوروب قول قاوشوروب تعظیم قیلدی
 فردوس آتلیغ جنتی دین محضر کیلدی
 دیدار اوچون برچه سینی قویدیم منا

اون آلتيمده برچه ارواح اولوش بيردى
"هى - هى" سزكا مبارک ديب آدم کيلدى
فرزنديم ديب بوينوم قوچوب کونکلوم آلدی
اون يتيمده ترکستانده توردیم منا
اون سيکزده چلتن بيله شراب ايچتيم
ذکرين ايتيب حاضر توروب کوکسون تيشتيم
روزی قیلدی جنت کزيب حورلار قوچتيم
حق مصطفى جمال لارين کوردیم منا
اون توقوزده يتيميش مقام ظاهر بولدی
ذکرين ايتيب ايچ و تاشيم ظاهر بولدی
قايده بارسام خضر بابام حاضر بولدی
"غوٹ الغياث" می ايچوردی تویدیم منا
ياشيم ييتى يکرمی کا اوتدیم مقام
بحمدالله پير خدمتين قیلدیم تمام
دنياه کی قورت قوشلار قیلدی سلام
اول سبیدین حقه ياقو بولدیم منا
مؤمن ایرمس حکمت ايشتيب يغلامای دور
ايرانلارنى ایتغان سوزین تينکلامای دور
آیت حدیث کویا قرآن آنکلامای دور
بول روایت عرش اوستیده کوردیم منا
روایت نی کوروب حقه سوزلاشتیم من
يوز مينک تورلوک ملایک کا يوزلاشتیم من
اول سبیدین حقنى سوزلاب ايزلاشتیم من
جان و دلیم انکا فدا قیلدیم منا
قول "خواجه احمد" ياشينک ييتى يکرمی بر
نه قيلغای سین کناله لارينک تاغ دین آغر
قيامت کون غضب قيلسه ربم قادر
ايا دوستلار نچوک جواب ايغوم منا

(۴)

حکمت

خوش غایب دین قولاغیم غه الهام کیلدی
اول سبیدین حقہ سیغنیب کیلدیم منا
جمله بزرک یغیلیب منکا انعام بیردی
اول سبیدین حقہ سیغنیب کیلدیم منا
من یکرمة ایکی یاشده فنا بولدوم
مرهم بولوب چین دردلیک کا دوا بولدوم
یالغان عاشق چین عاشق غه کواه بولدوم
اول سبیدین حقہ سیغنیب کیلدیم منا
ایا دوستلار یاشیم یتی ایکرمة اوج
یالغان دعوی طاعتلاریم برچه سی پوج
قیامت کون نه قیلغایمن برهنه لوج
اول سبیدین حقہ سیغنیب کیلدیم منا
من یکرمة توتقه کیردیم حق دین یراق
آخرتقه بارور بولسم بارمو یراق
اولکانیمده یغیلیب اورونک یوزمینک تیاق
اول سبیدین حقہ سیغنیب کیلدیم منا
جنازم نی آرقاسیدین تاشلار آتینک
ایاقیمدین توتوب سودراب کورکا ایلتینک
حقه قوللوق قیلمدینک دیب یانجیب تیغینک
اول سبیدین حقہ سیغنیب کیلدیم منا
یازوق بیلان یاشیم یتی ایکرمة بیش
سبحان ایکام ذکر اورکاتیب کوکسومنی تیش
کوکسومده کی کره لاریم سین اوزونک یش
اول سبیدین حقہ سیغنیب کیلدیم منا من

من ايكرمى آلتى ياشده سودا قيلدیم
 منصور صفت دیدار اوچون غوغا قيلدیم
 پیرسیز یوروب درد و حالت پیدا قيلدیم
 اول سبیدین حقه سیغنیب کیلدیم منا
 من یکرمة یتى ياشده پیرنى تابتیم
 هر سر کوردوم پرده برله بوکوب یافتیم
 آستانه سین یاستانبان ایزین اوبتیم
 اول سبیدین حقه سیغنیب کیلدیم منا
 من ايكرمى سکیز ياشده عاشق بولدوم
 کیچه یاتمای محنت تارتیب صادق بولدوم
 آندین سونکره درکاهی کا لایق بولدوم
 اول سبیدین حقه سیغنیب کیلدیم منا
 بر کم اوتوز یاشقه کیردیم حالیم خراب
 عشق اوتیده بولالمدیم مثل تراب
 حالیم خراب بغریم کباب کوزوم پر آب
 اول سبیدین حقه سیغنیب کیلدیم منا
 اوتوز ياشده اوتون قیلیب کویدوردیلار
 جمله بزرک یغیلیب دنیا قویدوردیلار
 اوروب سوکوب دنیا عقبین قویدوردیلار
 اول سبیدین حقه سیغنیب کیلدیم منا
 قول "خواجه احمد" دنیا قویسنک ایشینک بتار
 کوکسونداکی چیقان آهینک عرشقه یتار
 جان برارده حق مصطفی قولونک توتار
 اول سبیدین حقه سیغنیب کیلدیم منا

(۵)

حکمت

یا الهیم حمدینک برله حکمت ایتیم
ذاتی اولوغ خواجه سیغنیب کیلدیم سنکا
توبه قیلیب گناهیمدین قورقوب قایتم
ذاتی اولوغ خواجه سیغنیب کیلدیم سنکا
قرق بیریمده اخلاص قیلدیم یول تاپای دیب
ایرانلاردین هر سر کورسم من یاپای دیب
پیر مغان ایزین آلیب من اوپای دیب
ذاتی اولوغ خواجه سیغنیب کیلدیم سنکا
قرق ایکیمده طالب بولوب یولغه کیردیم
اخلاص قیلیب یالغوز حقه کونکل بیردیم
عرشی - کرسی لوح دین اوتوب قلم کیزدیم
ذاتی اولوغ خواجه سیغنیب کیلدیم سنکا
قرق اوچومده حقنی ایزلاب ناله قیلدیم
کوز یاشیمنی آقوزوبان ژاله قیلدیم
بیابانلار کیزیب اوزوم واله قیلدیم
ذاتی اولوغ خواجه سیغنیب کیلدیم سنکا
قرق تور تومده محبتنی بازارینده
یقام توتوب یغلاب یوردوم کلزارینده
منصور صفت باشیم بیریب عشق دارینده
ذاتی اولوغ خواجه سیغنیب کیلدیم سنکا
قرق بیشیمده سندین حاجت تیلاب کیلدیم
توبه قیلدیم هر ایش قیلدیم خطا قیلدیم
یا الهیم رحمتینکنی اولوغ بیلدیم
ذاتی اولوغ خواجه سیغنیب کیلدیم سنکا

قرق آلتیمده ذوق و شوقیم تولوب تاشتی
 رحمتینکدین قطره تامدی شیطان قاچتی
 حقدین الهام رفیق بولوب بابین آچتی
 ذاتی اولوغ خواجم سیغنیب کیلدیم سنکا
 قرق یتیمده یتی یاقدین الهام یتی
 ساقی بولوب جام شراب خواجم توتی
 شیطان کیلیب نفس هوانی اوزی یوتی
 ذاتی اولوغ خواجم سیغنیب کیلدیم سنکا
 قرق سکزده عزیز جاندین بیزار بولدوم
 کنه دردی کسل قیلدی بیمار بولدوم
 اول سبیدین حقدین قورقوب بیدار بولدوم
 ذاتی اولوغ خواجم سیغنیب کیلدیم سنکا
 قرق توقزده عشقینک توشدی کویوب یاندیم
 مجنون صفت خیل خویشدین قاجیب تاندیم
 تورلوك - تورلوك جفا تیکدی بویون سوندوم
 ذاتی اولوغ خواجم سیغنیب کیلدیم سنکا
 ایلیکیمده ایرمن دیدیم فعلیم ضعیف
 قان توکمادیم کوزلاریمدین بغریم ایزیب
 نفسیم اوچون یورار ایردیم ایتدک کزیب
 ذاتی اولوغ خواجم سیغنیب کیلدیم سنکا
 قول "خواجه احمد" ایر بولمسنک اولکان یخشی
 قزیل یوزونک قرا ییرده سولغان یخشی
 توفراق صفت بیر آستیده بولغان یخشی
 ذاتی اولوغ خواجم سیغنیب کیلدیم سنکا

(۶)

حکمت

صبح صادق دوشنبه کون بیرکا کیردیم
مصطفی کا ماتم توتوب کیردیم منا
آلتیمش اوجده سنت دیدی ایشتیب بیلدیم
مصطفی غه ماتم توتوب کیردیم منا
بیر اوستیده یارانلاریم ماتم توتی
عالم همه سلطانیم دیب نعره تارتی
حقنی تابقان چین صوفی لار قانلاری یوتی
مصطفی غه ماتم توتوب کیردیم منا
الوداع دیب بیر آستیغه قدم قویدوم
یاروق دنیا حرام قیلیب حقنی سویدوم
ذکرین ایتیپ یالغوز اولوب یالغوز کویدوم
مصطفی غه ماتم توتوب کیردیم منا
طّه اوقوب تون کیچه لار قایم بولدوم
کیچه نماز، کوندوزلاری صایم بولدوم
بو حال برله بیر آستیده دایم بولدوم
مصطفی غه ماتم توتوب کیردیم منا
آلتیمش کیچه، آلتیمش کوندوز بیر یول طعام
تانک آتقونچه نماز اوقوب بیر یول سلام
آلتیمش اوجده بولدی عمریم آخر تمام
مصطفی غه ماتم توتوب کیردیم منا
حق مصطفی روحی کیلیب بولدی امام
جمله ملک بیر آستیده بولدی غلام
کوب یغلادیم حق مصطفی بیردی انعام
مصطفی غه ماتم توتوب کیردیم منا

معراج تونی نوردیدم فرزند دیدی
 قولوم توتوب امتیم سین امت دیدی
 سنتیم نی محکم توتقیل دلبند دیدی
 مصطفی غه ماتم توتوب کیردیم منا
 قیامتده یول آداشنک یولغه سالای
 محمد دیب تشنه بولسک قولونک آلائی
 فرزندیم ایلکینک توتوب جنت کرای
 مصطفی غه ماتم توتوب کیردیم منا
 ای یارانلار بو سوز ایشتیپ شوقیم آرتدی
 امت دیدی ایچ و تاشیم نورکا باتدی
 پرتو سالیب دیدارینی حق کورساتدی
 مصطفی غه ماتم توتوب کیردیم منا
 دیدار کوروب روحوم اوجوب عرشقه قوندی
 موسی صفت وجودلاریم کویوب یاندی
 مجنون صفت خیل خویشدین قاجیب تاندی
 مصطفی غه ماتم توتوب کیردیم منا
 بیر آستیده خوارلیغ تارتیم کوب مشقت
 توشک - یاستوق تاشدین قیلیب چیکتیم محنت
 ای یارانلار بو ذنیاده یوق فراغت
 مصطفی غه ماتم توتوب کیردیم منا
 تا مشقت تارتماغونچه وصلی قیدا
 خدمت قیلمای درد حالت بولمس پیدا
 جان و دلنی تا قیلمسک حقه شیدا
 مصطفی غه ماتم توتوب کیردیم منا
 بیر آستیغه کیردیم ایرسه بیخود بولدوم
 کوزوم آجیب مصطفی نی حاضر کوردوم
 عاصی جافی امت لارنی حالین سوردوم
 مصطفی غه ماتم توتوب کیردیم منا

ایا فرزند مندین سورسنبك قنى امت
امت دیدی کوکسوم توله داغ حسرت
امت اوچن كوب تارته من حقدين كلفت
مصطفی غه ماتم توتوب كیردیم منا
امت لاریم یازوقلارین هر جمعه کیچ
آلیب کیلکای یا محمد سن مونی جیج
تا کی یغلاب سجده ایلای تنکریغه کیچ
مصطفی غه ماتم توتوب كیردیم منا
هر جمعه کیچ امت لارنی کناهی نی
آلیب کیلکای یا محمد کورکیل مونی
امت لارینك نیلار قیلور احمد سنی
مصطفی غه ماتم توتوب كیردیم منا
من ملک دین شرم آلور من ای امتیم
یراتقاندین قورقمس موسین پست همتیم
کیچه یاتمای طاعت قیلسنك خوش دولتیم
مصطفی غه ماتم توتوب كیردیم منا
ییر آستیغه کیردیم دوستلار بی اختیار
امین دینکلار آل اصحاب هم چهار یار
امت لارنی جرمین کیچکیل پروردگار
مصطفی غه ماتم توتوب كیردیم منا
قول "خواجه احمد" من دفتری ثانی ایتیم
ایکی عالم عشرت لارین می کا ساتیم
اولماس بورون جان اجیغین زهرین تاتیم
مصطفی غه ماتم توتوب كیردیم منا

اول قادیریم قدرت برلان نظر قیلدی
 خرم بولوب ییر آستیغه کیردیم منا
 غریب بندهنک بو دنیا دین سفر قیلدی
 محرم بولوب ییر آستیغه کیردیم منا
 ذاکر بولوب. شاکر بولوب حقنی تابتیم
 دنیا عقبی حرام قیلیب ینجیب تیغتم
 شیدا بولوب. رسوا بولوب جان دین اوتیم
 بی غم بولوب ییر آستیغه کیردیم منا
 شوملو غوم دین تاغ - تاشلار سوکتی منی
 فصیح تیلده سوکوب ایدی تحفک قانی
 عاشق بولسنک اول باریب حقنی تانی
 مرهم بولوب ییر آستیغه کیردیم منا
 سیزنی، بیزنی حق یراتی طاعت اوچون
 ای بوالعجب ایچمک - ییمک راحت اوچون
 "قالوا بلی" دیدی روحوم محنت اوچون
 ادهم بولوب ییر آستیغه کیردیم منا
 نفسیم منی کوب یوکورتی حقه باقمای
 کیچه - کوندوز بی غم یوردوم یاشیم آقمای
 هوا - هوس، ما و مننی اوتقه یاقمای
 پرغم بولوب ییر آستیغه کیردیم منا
 قولنی کورسم قولی بولوب خدمت قیلسام
 تفراق صفت یول اوستیده یولی بولسام
 عاشق لارنی کویوب اوجکان کولی بولسام
 همدم بولوب ییر آستیغه کیردیم منا

جاندين كيچيب محنت تارتيم بئندم ديدى
 قانلار يوتوب الله ديديم رحم ايلادى
 دوزخ ايچره قالمسون ديب غميم يدى
 خرم بولوب يير آستيغه كيرديم منا
 ياشيم يتى آلتيمش اوجكا بر كونچه يوق
 وا دريغا حقنى تابماي كونكلوم سنوق
 يير اوستيده سلطان من ديب بولدوم اولوق
 شاكر بولوب يير آستيغه كيرديم منا
 شيخ من ديبان دعوى قليب يولده قالديم
 فش دستار پوجك پلغه ساتيب كيلديم
 نفسيم منى هوا قيلدى يولده قالديم
 بيدم بولوب يير آستيغه كيرديم منا
 باشيم تفرق، اوزوم تفرق، جسميم تفرق
 حق وصلى كايتار من ديب روحوم مشتاق
 كويديم، يانديم، بولالماديم هرگز آفاق
 شبنم بولوب يير آستيغه كيرديم منا
 پير مغان نظر قيلدى شراب ايچتيم
 شبلى ينكليغ سماع اوروب جاندين كيچتيم
 سرمست بولوب ايل خلقدين تانيب قاجتيم
 زمزم بولوب يير آستيغه كيرديم منا
 قول "خواجه احمد" ناصح بولسك اوزونك كا بول
 عاشق بولسك جاندين كيچيب بر يولى اول
 نادانلاركا ايسك سوزونك قيلمس قبول
 محكم بولوب يير آستيغه كيرديم منا

(۸)

حکمت

بیشک بیلنك بو دنیا برچه خلقدین اوتارا
اینانمکیل مالینکا بر کون قولدین کیتارا
آتا - آنا قرینداش قیان کیتی فکر قیل
تورت آیاغلیغ چوبین آط [آت] برکون سنکا یتارا
دنیا اوچون غم یمه حقدین اوزکانی دیمه
کشی مالی نی یمه صراط اوزرد توتارا
اهل - عیال، قرینداش هیچکیم بولمایدور یولداش
مردانه بول غریب باش عمرینک یلدیك اوتارا
قول "خواجه احمد" طاعت قیل عمرین بیلما نچه ییل
اصلینك بیلسنك آب - کل [گل] ینه کل کا کیتارا

(۹)

حکمت

ایا دوستلار پاك عشقنی قولغه آلدیم
بو دنیانی دشمن توتوب یوردوم منا
یقام توتوب حضرتیغه سغنیب کیلدیم
عشق بابی ده منصور صفت بولدوم منا
عشق یولیده عاشق بولوب منصور اوتی
بیلین باغلاب حق عشقنی محکم توتی
ملامت لار، اهانت لار کوب ایشتی
ای مؤمنلار من هم منصور بولدوم منا
عاشق منصور انا الحقنی تیل کا آلدی
جبریل کیلیب انا الحقنی بیرکا ایدی
جبریل کیلیب باشنك بیر دیب یولغه سالدی
دارکا آسیلیب دیدارینی کوردوم منا

منصور کیلکاج دار ایکیلیب اوزی آلدی
باطن کوزی آجوقلاری حیران قالدی
پرتو سالیب الله اوزی نظر قیلدی
مناشوقا دیب دیدارینی کوردوم منا
ندا کیلدی اوشل دارغه کوب بوغماغیل
محکم تورغیل، هریان باقیب سن اغماغیل
تاشقه ایدی امریم توتوب سین تیکما کیل
لوح المحفوظ تخته سیده کوردوم منا
اوج یوز ملا یغیلیب بتی کوب روایت
شریعت دور من هم بتای بیر روایت
طریقت ده. حقیقت ده حق حمایت
باشیم بیریب حق سرنی بیلدیم منا
انا الحقنی معنی سنی بیلماس نادان
دانا کیراک بو یوللارده پاک مردان
عاقل قوللار حق یادینی ایدی جانان
جاندین کیچیپ جانانهنی سویدوم منا
ایما قیلدیم دانا بولسه معنی آلسون
قال علمیدین بتیب ایدیم نشان قالسون
ذرّ و کوهر سوزلاریمنی ایچکا سالسون
حال دین ایتیپ عاشقلارغه بیردیم منا
ایسیز منصور خوارلیق برله بولدی ادا
بر سوز برله یارانلاردین بولدی جدا
حال دلین هیچکیم بیلمس تنکریم کوا
قانلار یوتوب من هم کوا بولدوم منا
شاه منصورنی انا الحقی بیجا ایمس
یولنی تابقان بیزکا اوخشاش کمراد ایمس
هر ناجنس لار بو سوزلاردین اکاه ایمس
آکاه بولوب بوی خدا آلدیم منا

بیر تون سحر غریب منصور کوب یغلادی
 پرتو سالیب الله اوزی رحم ایلادی
 آندین سونکره چلتن باقب شراب بیردی
 دانا لارغه بو سوزلارنی ایدیم منا
 نادان لارکا ایسیز سوزوم حیق حکمت
 آدم من دیب بیلین باغلار قانی همت
 دنیا اوچون بر - بریغه قیلما س شفقت
 ظالم لارکا اسیر بولوب اولدیم منا
 ظالم لارده حدنه بولغای بیژده کنده
 درویش لارنی حلقی مردار اوتمس دعا
 اول سبب دین پادشاه قیلور بیزکا جفا
 آیت - حدیث معنی سیدین ایدیم منا
 ظالم اکر جفا قیلسه الله دیکیل
 ایلکینک آچیب دعا ایلاب بویون سونکیل
 حق دادینک کا یتمس بولسه کله قیلکیل
 حقدین ایشتیب بو سوزلارنی ایدیم منا
 ظالم اکر ظلم ایلاسه منکا یغلا
 یاشینک ساجیب منکا سغنیب بیلینک باغلا
 حرام شبهه ترک ایتیبان یورک داغلا
 ظالم لارکا یوز مینک بلا بیردیم منا
 ظالم لارنی قریبی نیدور من یراتقان
 یراتقاننی منظور قیلما س سن اونوتقان
 مندین کیچیپ ظالم لارنی ایلکین توتقان
 ظالم لارکا اوزوم رواج بیردیم منا
 سنکا جزا یراتقانغه یالبارمادینک
 الله دیبان تونلار توروب اینکرانمادینک
 حقیقت دین سوزلار ایتیم ایشتمادینک
 ظالم لارنی ایلکیلن اوزون قیلدیم منا

ای بی خبر حقه کونکل یوکورتما دینک
 دنیا حرام آندین کونکل ساووتما دینک
 نفس دین کیچیب الله سری تولغانما دینک
 بو نفس اوچون زار حیران بولدیم منا
 ظالم لارنی شکوه قیلمه ظالم اوزونک
 خویونک ریا تأثیر قیلمس خلقه سوزونک
 دنیا مالین تولا بیردیم تویمس کوزونک
 حریص لارنی سچین ایچره سالدیم منا
 لعل لبی جنبش قیلیب ایدی سنی
 جان دلیم امت لاریم کوز روشنی
 حقه قوللوق منکا امت بولغان قنی
 چین امتنی سینه سیغه قویدیم منا
 قول "خواجه احمد" حق سوزینی سوزلاب اونی
 عین الیقین طریقتده بوزلاب اوتی
 علم الیقین شریعتنی سوزلاب اوتی
 حق الیقین حقیقت دین ایدیم منا

(۱۰)

حکمت

تعالی الله عاشق لارکا بیردی عشقین
 شاکر بولوب اورتاب یانیب کویدوم منا
 ایکی عالم کوزلاریمغه خشخاش دانه
 کورونمدی یالغوز حقنی سویدیم منا
 جان دین کیچیب یالغوز حقنی جانغه قوشتوم
 اندین سونکره دریا بولوب تولوب تاشتیم
 لامکاننی سیر ایتیپان مقام آشتیم
 دنیا عقبین یوز مینک طلاق قویدیم منا

حق آلدیده عقل کامل دم اورالماس
 عشق شدتی طغیان قیلسه بیر دم تورماس
 پروانه دیک اکر بولور اوزین بيلماس
 بو سرلارنی جانانه دین تویدیم منا
 طریقتنی یوللارینی عقبه سی کوب
 پاک عشقنی قولغه آلمای بولماس یوروب
 دیدارینی کورسه بولماس - تون کون اویوب
 هیچ اوخلامای دیدارینی کوردوم منا
 طریقتنی یولی قاتیغ طرفه شاستیم
 باشیم قاتی پیر مغان سری قاجتیم
 پیر ایتا کین توتوب باطن کوزین آجتیم
 رسوا بولوب یوللار کزیب یوردوم منا
 طریقتنی یوللاریدور قاتیغ عذاب
 بو یوللارده نیچه عاشق بولدی تراب
 عشق یولغه هر کیم کیرسه حالی خراب
 ایرانلاردین یولنی سوراب یوردیم منا
 طریقتنی یوللاریدور طرفه اولوغ
 روزی قیلکان بنده سیغه بولغای یاوغ
 اوچقونی غه طاقت قیلمس یتی تموغ
 ای یارانلار عزیز جان دین تویدیم منا
 حقیقتنی معنی سی کا یتکان کشی
 بیخود بولوب کویوب یانار ایچی - تاشی
 قانلار آقار کوزلاریدین آقان یاشی
 کوز یاشیمنی تحفه قیلیب باردیم منا
 شریعت دور عاشق لارنی افسانه سی
 عارف عاشق طریقتنی دردانه سی
 قیده بارسه جانانه سی، همخانه سی
 بو سرلارنی عرش اوستیده کوردوم منا

محبتنی باغین کیزمای عاشق بولمس
 خوارلیق - زارلیق تارتما کونجه نفسینک اولمس
 بیر قطردغه قانع بولمای اول دُر بولمس
 قانع بولوب خاص کوهرین آلدیم منا
 عشق اوتیغه کویکان عاشق رنکی اوجار
 عقبی سری جدل قیلیب موندین کوجار
 مونده بولغان کردلارنی آنده آچار
 رسول دنیا جیفه دیدی قویدوم منا
 حقیقتلیک عاشقلارنی رنکی سینوق
 آینهغه نظر قیلسه آندین تانوق
 اوزی حیران، کونکلی ویران، کوزی یاشلوق
 قدرتیغه حیران بولوب قالدیم منا
 الله ایدی کوب یغلاسنک کوکونک منی
 زاری قیلسنک بندم دیبان ایغوم سنی
 جاندین کیچیب منی استار عاشق قتی
 الهام کیلدی چین قولاققه آلدیم منا
 چین کونکلده کویکانلارکا دیدار عطا
 یلغان عاشق یولغه کیرسه همه خطا
 چین عاشقنی کوزی یاشلیغ قدی دوتا
 دوتا بولوب بیر آستیغه کیردیم منا
 حقیقتلیغ چین عاشقغه تحفه بیرکوم
 روز محشر نجوک سن دیب حالین سورکوم
 شفیع بولوب شفاعتنی اوزوم قیلغوم
 رحمتینکدین امید توتوب کیلیم منا
 قول "خواجه احمد" حق یادینی آیغیل مدام
 حقدین قورقوب تینمای یغلا علی الدوام
 نماز اوقوب روزه توتوب هر صبح شام
 مونداغ قیلیب مردایمغه یتیم منا

رحیم مولیم رحمی برله یاد ایلاسه
 نه یوز برله حضرتی غه بارغوم منا
 توبه قیلیب ایکری یولدین راست غه قایتیب
 نه یوز برله حضرتی غه بارغوم منا
 حق بنده سین نامه لارین قولغه برسه
 حق الهیم رحمی برله رحمت قیلسه
 پیر مغان هادی بولوب یولغه سالسه
 نه یوز برله حضرتی غه بارغوم منا
 بر کون بولوب اجل وقتی یاوق یتسه
 سنکا - منکا اصل وطن حکمین ایتسه
 اولمای توروب جان اچیین زهرین تاتسه
 نه یوز برلان حضرتی غه بارغوم منا
 سرداش بولغان همراه لارینک شاشب کیتی
 جدل قیلیب عقبه لاردین آشیب کیتی
 جار ضرب اوروب دریالاردیک تاشیب کیتی
 نه یوز برله حضرتی غه بارغوم منا
 وا ویلتا کیچه کوندوز قیلمای طاعت
 حق رسول امت اوچون یمای نعمت
 ایچمیش یمیش نعمت لاری قیغو محنت
 نه یوز برلان حضرتی غه بارغوم منا
 حق رسول دنیا اوچون قیغورمدی
 امت تیلاب اوزکا سوزکا دم اورمدی
 دنیا ایچره لحظه آرام اول کورمدی
 نه یوز برلان حضرتی غه بارغوم منا

وا دریغا محشر کونی ظاهر بولسه
 تنکری اوزی قاضی بولوب ناظر بولسه
 یمان ایشیم قیلم^۲ شلاریم حاضر بولسه
 نه یوز برلان حضرتی غه بارغوم منا
 کیچه کوندوز تینمای یغلا قول "خواجه احمد"
 درود ایتیپ حق رسول غه بولغیل امت
 هادی بولوب امت دیسه خوش سعادت
 نه یوز برلان حضرتی غه بارغوم منا

(۱۲)

حکمت

خداوندا منی سالغیل اوز یولونک کا
 نفس ایلکیده هارب ادا بولدیم منا
 فسق، فجور تولوب تاشیب حددین آشتی
 غرقاب بولوب عصیان ایچره قالدیم منا
 دنیا نجس طالب بولوب ایتدیک یوردیم
 استاب آنی آرقاسیدین تون - کون قودیم
 امرین توتمای حق یولیغه کوزم یومدیم
 قایده بارای ایا دوستلار نیتکوم منا
 نفس شیطان اسیر قیلدی آدم اوغلین
 شترلایین باغلاب آلدی ایکی قولین
 نه مشکل دوراونک و سولنی بیلمای یولین
 وا دریغا حسرت بیلان بارغوم منا
 یوق منیندیک شوم بلا عالم ارا
 هیچ بولمدی مندین رضا خلق خدا
 ایمدی بولدی آخر منی یوزوم قرا
 وا ویلتا اول ینکا بولدیم منا

عطا قیلغان عزیز جاننی بیلمادیم من
 ظاهر، باطن، حاضر سن دیب تورمدیم من
 قرا یوزوم درکاهینک کا سورمدیم من
 یا ربنا هر نه قیلسانک کیلدیم منا
 طاقتیم یوق اگر باقسم گناهیم کا
 قیلا توبه قاجیب کیلدیم پناهنک کا
 رحمت برلان نظر قیلغیل "خواجه احمدکا"
 هر نه قیلسنک من بینوا کیلدیم منا

(۱۳)

حکمت

ایا دوستلار نادان برلان الفت بولوب
 بغریم کویوب جاندین تویوب اولدوم منا
 توغری ایتسام ایگری یولغه بوینین تولغار
 قانلار یوتوب غم زهریغه تویدوم منا
 نادان برله اوتکان عمرینک نار سقر
 نادان بارسه دوزخ اندین قیلغای حذر
 نادان برله دوزخ ساری قیلمنک سفر
 نادان ایچره خزان ینکلیغ سولدوم منا
 دعا قیلنک نادانلاری یوزین کورمای
 حق تعالی رفیق بولسه بردم تورمای
 بیمار بولسه نادانلارنی حالین سورمای
 نادانلاردین یوز مینک جفا کوردوم منا
 بیر آستیغه قاجیب کیردیم نادانلاردین
 ایلکیم آجیب دعا تیلاب مردانلاردین
 غریب جانیم یوز تصدق دانالاردین
 دانا تابمای بیر آستیغه کیردیم منا

نادانلارنى مندىن سورمه كوكسوم جقه
 حقدىن قورقوب ماتم قورسم كولار قهقه
 آغزى آچوق نفسى اولوق مثل لقه
 نادانلاردىن قورقوب سنكا كىلدىم منا
 طمع قىلمه نادانلاردىن قدرىنك بىلمس
 ظلمت ايچره يول اداشسنىك يولغه سالمس
 بوينونك قشيب زارى قىلسنىك قولونك آلمس
 نادانلارنى شكوه ايلاب كىلدىم منا
 اول آخر خوبلار كىتى قالدىم يالغوز
 نادانلاردىن ايشتمايدىم بير يىخشى سوز
 دانا كىتى نادان قالدى يديم افسوز
 يولدىن تابماي حيران بولوب قالدىم منا
 داغ هجران ايزدى بغيرىم قانى دردمند
 دانا تفراق نادانلارنى كوكسى بلند
 آيت حديث بيان قىلسام قىلمس پسند
 كوكسوم تيشىنىك درد و غم كاتولدىم منا
 درد و حالت طغيان قىلدى بارمو طيب
 عرض حالىم سنكا ايتاي يالغوز حبيب
 برچه طالب اولوش آلدى من بى نصيب
 اولوش استاب دوتا بولوب كىلدىم منا
 خانمانىنىك ترك ايلابان اولوش آلكىل
 اى بى خبر دنيا ايشىن آرقه سالكىل
 الله سىخى لطفىن كوروب حيران قالكىل
 كورار من دىب فنا بولوب كىلدىم منا
 من دفتري ثانى ايدىم سزكا يادكار
 ارواحىم دىن مدد تىلاب اوقونك زىنهار
 دعا قىلاي واصل قىلسون پروردگار
 رحمن ايكام عرض ايتكالى كىلدىم منا

حکمتیم دین بهره آغان کوزکا سورسون
 اخلاص برلان کوزکا سورتوب دیدار کورسون
 شرطی اولدور ریاضت غه بویون سونسون
 جانلار چیکیب جانانه نی کوردیم منا
 دیدار اوچون کدا بولدیم امین دینکلار
 ای طالبلار حالیم کوروب غمیم ینکلار
 یولده قالغان قول "احمدکا" یول برینکلار
 یولنی ایزلاب کدا بولوب کیلیم منا
 قول "خواجه احمد" کدا بولسنگ حقه بولکیل
 باشینگ برله ایرانلارکا خدمت قیلکیل
 نظر تابسنگ حلقه قوروب صحبت قیلکیل
 حلقه ایچره آگاه بولوب توردوم منا

(۱۴)

حکمت

کونکل کوزی یاروتماين طاعت قیلسه
 درکاهی کا مقبول ایمس بیلیم منا
 حقیقت ده بو سوزلارنی پاک اورکانب
 لامکانده حق دین سبق آلدیم منا
 بیر و باریم سبق بیردی پرده آچیب
 ییر و کوکده تورالمادی شیطان قاچیب
 عشرت قیلیب و خدت می دین تويا ایچیب
 لامکانده حق دین سبق آلدیم منا
 مونده جفا چیکانلارغه دیداری تخت
 روز محشر عطا قیلکای هم تخت بخت
 یراتقاندۀ قیلکان اوزی عاشقه عهد
 لامکانده حق دین سبق آلدیم منا

كوزلار يميدين قانلار توكوب ياد ايتمديم
 يوزمينك تورلوك محنت سالدېنك داد ايتمديم
 سندن قورقوب خسته كونكلوم شاد ايتمديم
 لاماكانده حق دين سبق آلدېم منا
 الله دردى ساتقون ايرمس ساتيب آلسنك
 پير مغان خدمتیده خاك بولمسنك
 حق يوليغه كيريب بولمس پاك بولمسنك
 لاماكانده حق دين سبق آلدېم منا
 عشق پادشاه عاشق فقير دم اورالمس
 حق دين رخصت بولمكونجه سوزلا يالمس
 حق پنديني آغان دنيا ايزلا يالمس
 لاماكانده حق دين سبق آلدېم منا
 قول "خواجه احمد" ييتي ياشده سبق آلدېم
 سيكزيমে دنيا عقبين طلاق قويديم
 توقوزومده خدايم ني حاضر بيلديم
 لاماكانده حق دين سبق آلدېم منا

(۱۵)

حکمت

رحمتينكدين نوميد قيلمه من غريب ني
 آرام آلماي ييغلاب دعا قيلاي سنكا
 كيچهلار بيدار بولوب تانك آتقونچه
 يومماي كوزني ييغلاب دعا قيلاي سنكا
 دركاهنك كا ايمدي كيليب بيليم باغلاب
 جان كويدوروب يورك بغريم توتوب داغلاب
 يقام توتوب اوتكان ايشكا چندان ييغلاب
 اخلاص بيلان ييغلاب دعا قيلاي سنكا

کونکل باغی سبز ایکانده بیلمای یوردوم
 عمریم کلی خزان بولدی ایمدی تویدوم
 دنیا تاشلاب دین یولیغه قدم قویدوم
 هزار داستان ییغلاب دعا قیلای سنکا
 بو یول لارده جان نی اسراب بولمس ایرمش
 جان اسراغان بو یول لارکا کیرمس ایرمش
 سود و زیان بولغان نی بیلمس ایرمش
 بو حال برلان ییغلاب دعا قیلای سنکا
 قول "خواجه احمد" نفس تاغی دین چیقیب آشتی
 "فنا فی الله" مقامی غه یاوقلاشتی
 یورك بغریم جوش اوروبان قیناب تاشتی
 بو حال برلان ییغلاب دعا قیلای سنکا

(۱۶)

حکمت

"فاذکر الله" کثیراً دیب آیت کیلدی
 ذکرین ایتیپ زاری قیلیب یوردوم منا
 دیدارینی عاشق لارکا وعده قیلدی
 عشق یولیده جانیم بیریب یوردوم منا
 چین عاشقنی الله سویوب بندم دیدی
 ارا یولده قالمسون دیب غمیم ییدی
 یالغانچی لار دیداریمنی کورمس دیدی
 عشق بابیده محکم بولوب توردوم منا
 عاقل ایرسنک کورستان دین خبر آغیل
 من هم شونداغ بولور من دیب عبرت آغیل
 "موتوا قبل ان تموتوا" کا عمل قیلغیل
 بو حدیثنی فکر ایلابان اولدیم منا

خبر بیرور "فلیضحکوا قليلاً" دیب
 ینه ایتور "ولیکوا کثیراً" دیب
 بو آیتنی معنیسی کا عمل قیل دیب
 بو دنیاده هیچ کولمایین یوردوم منا
 عمل سیزلار قهقهه کولور، خرم یورور
 فرمانیغه بویون سونغان پرغم یورور
 کیچه - کوندوز دیدهلاری پُرنم یورور
 کوز یاشیمنی دریا قیلیب یوردوم منا
 نفسدین کیچوب چین عاشققر الله دیدی
 سحر توروب چهار ضرب اوروب کوزین اویدی
 رحم ایلابان الله اوزی نظر سالدی
 آندین سونکره دریا بولوب تاشتیم منا
 ظالم نفسیم هیچ قویمایین اوتقه سالدی
 وجودلاریم اوز اوزیدین کویوب یاندی
 مشرقلارنی ایمانینی شیطان آلدی
 "اعوذ بالله، بسم الله" دیب یوردیم منا
 منافقلار دوزخ ایچره کویوب یانغای
 ایمان ایلکان خالص بولوب یانیب چیقای
 ایمان سیزلار اول آخر کویوب یانغای
 اوغانیمدین ایمان تیلاب یوردیم منا
 نفسیم منی هوا قیلدی طرفه شاشتیم
 باشیم آلیب پیر مغان سری [ساری] قاجتیم
 قول "خواجه احمد" عقبه لاردین یلیب آشتیم
 اوچقان قوشدیک لامکانغه آشتیم منا

وا دریغا نتوك قیلغوم غریب لیغده
 غریب لیغده غربت ایچره قالدیم منا
 خراسان و شام و عراق نیت قیلوب
 غریب لیغنی کوب قدرینی بیلدیم منا
 نه کیلسه کورمک کیراک اول خدادین
 یوسفنی آیردیلار اول کنعان دین
 توغغان یریم اول مبارک ترکستان دین
 بغریمغه تاشنی اوروب کیلدیم منا
 غربت تیکدی مصطفی دیک ایرانلارغه
 اوتوز اوچ مینک صحابه هم یارانلارغه
 ابوبکر، عمر، عثمان، مرتضی غه
 غربت تیکدی آلا رکا ایغوم منا
 غربت تیکسه پخته قیلوب کوب خام لارنی
 دانا قیلور هم خاص قیلور کوب عام لارنی
 کیار کیرتون تابسه ییور طعام لارنی
 آنینک اوچون ترکستانغه کیلدیم منا
 غریب لیقده یوز ییل تورسه ایرور مهمان
 تخت و بخت بوستانلاری ایرور زندان
 غریب لیقده قول بولدی اول محمود سلطان
 ای یارانلار شربت ایچره کویدیم منا
 غریب لیغده آرسلان بابام ایزلاب تابتی
 هر سر کوروب پرده برله بوکوب یابتی
 بحمد الله کوردوم دیدی ایزیم اوبتی
 اوشبو سرنی کوروب حیران قالدیم منا

آرزوليق من قرينداشليغ ولایت غه
 اولوغ بابام روضه سی اق تربت غه
 بابامنی روحی سالدی بو غربت غه
 هیچ بیلما سمن نچو ک تقصیر قیلدیم منا
 قول "خواجه احمد" سوزلاکانی حقنی یادی
 ایشیتماکان دوستلاریغ قالسون پندی
 غربت لانیب اوز شهریغ قیته یاندی
 ترکستانده مزار بولوب قالدیم منا

(۱۸)

حکمت

عمریم آخر بولغانده نه قیلغایمن خدایا
 جان آغوجی کیلکانده نه قیلغایمن خدایا
 جان بیرمکنی وهمدین عزازیلنی زخمی دین
 شفقت بولمسه سندین نه قیلغایمن خدایا
 جان بیرمک ایشی دیشوار آسان قیلغیل یا جبار
 سندین اوزکا یوق غمخوار نه قیلغایمن خدایا
 جانیم جدا بولغانده تنیم مونده قالغانده
 تخته اوزره آغانده نه قیلغایمن خدایا
 عاجز بولوب یاتقانده فرشته لار کیرکانده
 "من ربک" دیب سورکانده نه قیلغایمن خدایا
 ایلتیب کورکا قویغانده یتنی قدم یانغانده
 سورغوجی کیرکانده نه قیلغایمن خدایا
 "من ربک" دیب تورغانده قرا کوندور اوشنده
 ریینک کمدور دیکانده نه قیلغایمن خدایا
 قول "خواجه احمد" سن بنده نفسین ایلکیده شرمنده
 محشر کونی بولغانده نه قیلغایمن خدایا

(۱۹)

حکمت

الهی قادرا پروردکارا
رحم قیل بندنکا ای کردکارا
سیغیندیم حضرتیگکا ای الهی!
یراتقان جمله عالم نی پناهی
اجابت سندین و مندین مناجات
ای - ای ذوالجلال جمله حاجات
الهی حاجتیم نی سن روا قیل
کریم سن لطف ائله دردیم دوا قیل
کرم بیرله کیچورکیل ای اریغ ذات
عذاب آخرت دین قیلغیل آزاد
الهی شر شیطاندین سن اسره
قموغ یازوقلاریم دین هم سن اسره
قموغ یازوقلاریم دین توبه قیلدیم
که مست ایردیم که من آندین آییلدیم
دیمایدور من بنی جاندین آییرمه
ولی آخرده ایماندین آییرمه
الهی برجه نی فریادیغه یئت
قموغ بیچاره لارنی دادیغه یئت
قولون عاصی نی سن هر حاجتین بئر
بو درد بی دوام کا سن دوا بئر
الهی سن کیچورکیل طاقتیم یوق
سنی آلدینکده لایق طاعتیم یوق
الهی ذات پاکینک حرمتیدین
آیرکیل بیزنی شیطان زحمتیدین

الهی برجه‌نی قوللوقغه خاص ائت
 من مندین آلیب بیر یول خلاص ائت
 منکا توفیق سوییدین سن ایچورکیل
 کرم بیرله گناهیمنی کیچورکیل
 که بیلماسده گناه بسیار قیلدیم
 کونکلارنی بوزوب آزار قیلدیم
 که هر عاصی ایرور رحمتکا لایق
 کیل ای احد دعاغه بول موافق

(۲۰)

حکمت

تینمای عاشق "هو" دیرلار خدایی‌غه یالباریب
 یورور آنی عشقیده کیچه - کوندوز سارغاییب
 زار ییغلانیب عاشقنی عشق ایلکیده خدایم
 عشق یولیده ملامت آنکا کورور مناسب
 منصور بیر کون ییغلادی ایرانلار رحم ایلادی
 چلتن شربت ایچوردی منصورغه مهرین سالیب
 منصور ایتور "انا الحق" ایرانلار ایشی بر حق
 ملالار ایتور ناحق کونکلی کا یمان آلیب
 ایتمکیل انا الحق دیب کافر بولدونک منصور دیب
 قرآن ایچره بولدور دیب اولدوردیلار کوبلاشیب
 بیلمادیلار ملالار انا الحقنی معنی سین
 "قال" اهلی کا "حال" علمین حق کورمدی مناسب
 روایت لار بیتیلدی حالین آنی بیلمادی
 منصور دیک اولیانی قویدیلار دارغه آسیب
 افسانه دور شریعت فرزانه دور حقیقت
 دردانه دور طریقت، عاشقلارغه مناسب

خلق عالم ییغیلدی منصور دیب فریاد قیلدی
 منصورنی یارانلاری قالدی آندہ ییغلاشیب
 توبہ قیلغیل "خواجہ احمد" بولغای حق‌دین عنایت
 یوز مینک ولی لار اوتی سرنی سرکا اولاشیب

(۲۱)

حکمت

باشیمغه توشوب نعره سودای محمد
 من آنی اوچون کوییده شیدای محمد
 کیم امتی دور حمد و ثنا تینماین ایتور
 پاکا، صمدا، قیل منی رسوای محمد
 کونکلوم کا سالیب عشق محبت‌نی الهم
 قیلغیل منی سین عاشق یکتای محمد
 ماننده مجنون کیچوروب ایکی جهان‌دین
 دیوانه قیلیب قیل منی رسوای محمد
 اولتورکیل، کویدورکیل، هر محنتی سالغیل
 اول روز جزا قیل منی شیدای محمد
 دایم غم امت یئدی و یثمادی نعمت
 کرامتی دور سن قانی غم‌های محمد
 امت دیبان کیچه - کوندوز یئدی حسرت
 کوکسیدین چقارور پر خونی دلهای محمد
 امت گناہینی تیلاب او شاهی شاهنشاهی
 اول روزی جزا بولار اول دادخواهی محمد
 کیچکیل همه‌دین ایزله محمدنی رضاسین
 واللہ بولاسن لحظه‌ده کویای محمد
 سندین تیلا کیم بولدورور ای خالق بیچون
 سالغیل قولاغیمغه منی غوغای محمد

من اور گولایین خوش کر مینکدین سنی الله
 بیر قطره قاتورغیل منکا دریای محمد
 یول بیر گوچی رحمن، رحیم، غافر، ستار
 قیلمه منی شرمندۀ گمراهی محمد
 بیر قطره می اول جام الست دین منکا انعام
 قیلغیل بولایین حمدینکا دانای محمد
 روی سیغک سور قدمی پیر مغان غه
 لطف ایتسه بئورور دیدۀ بینای محمد
 مقصودیمه تیکور منی ای خالق بیچون
 من در طلب زلف سمن سایی محمد
 یوزدین کوتاریب پردنی احمد سری باقغیل
 من بندۀ اول موی سیه پای محمد
 مسکین یسوی آرزوی روضۀ حضرت
 بولغایمو میسریم خاک کف پای محمد

(۲۲)

حکمت

الکذاب لا امتی دئدی بیلینک محمد
 یالغانچی لار قومی نی امت دیمس محمد
 توغری یورکان قولینی حقنی ایزلاب یولی نی
 راست یورکان قولینی امت دیکای محمد
 هر کیم امت من دیسه، رسول ایشین قویمسه
 شفاعت کونی بولسه محروم قویمس محمد
 تنکری تعالی سوزین رسول الله سنتین
 اینانماکان امتین امت دیمس محمد
 امت من دیب یورورسن، بو یروغینی قیلمس سن
 نهچوک امید توتارسن آندۀ سورمس محمد؟

مشکل دور عاصی بنده امت دیمسه آند
 رسوا بولور محشرده امت دیمس محمد
 امت دیکای محمد چین سوزلاسه قول احمد
 تانکلا بولسه قیامت محروم قویمس محمد

(۲۳)

حکمت

اون سیکیز مینک عالمغه سرور بولغان محمد
 اوتوزاوج مینک اصحابغه رهبر بولغان محمد
 یلانکاچ آچیلغه قناعت لیغ محمد
 عاصی، جافی امتغه شفاعت لیغ محمد
 تونلار یاتیب ایومس تلاوت لیغ محمد
 غریب بیرله یتیمغه مروّت لیغ محمد
 یولدین آزغان گمراهغه هدایت لیغ محمد
 مهم توشسه هر کیمکا کفایت لیغ محمد
 ابو جهل بولهبغه سیاست لیغ محمد
 ملامتنی صابونی سلامت لیغ محمد
 نماز - روزه قیلغوچی عبادت لیغ محمد
 تینمای تسبیح ایتکوچی ریاضت لیغ محمد
 ملعون لعین شیطانغه سیاست لیغ محمد
 شریعتنی یولیغه عنایت لیغ محمد
 طریقتغه رهنما ارادت لیغ محمد
 حقیقتکا مقتدا اجازت لیغ محمد
 دعا لاری مستجاب اجابت لیغ محمد
 یمانلیغغه یخشیلیق کرامت لیغ محمد
 توفیق بیرکان ظالمکا جلالت لیغ محمد
 سجده قیلغان ایگیلیب اطاعت لیغ محمد

بیش وقت نماز یولغانده امامت لیغ محمد
معراج آشیب بارغانده شهادت لیغ محمد
عرش - کرسی بازاری عنایت لیغ محمد
سیکیز بهشت ایکاسی ولایت لیغ محمد
مسکین احمد قولیغه کتابت لیغ محمد
یتیم، فقیر، غریب‌غه سخاوت لیغ محمد

(۲۴)

حکمت

بیزدین درود بسیار یا مصطفی محمد!
تحيات بی شمار یا مصطفی محمد!
یا سید المرسلین یا خاتم النبیین
یا هادی المضلین یا مصطفی محمد!
یا ایها المدثر حق ایدی قُمْ فَأَنْذِرْ
و رَبِّكَ فَكَبِّرْ یا مصطفی محمد!
حضرتده سین معظم، قربتده سین مکرم
انبیاءه مقدم یا مصطفی محمد!
سین سین حبیب خالق حق درگاهی‌غه لایق
خلاصه خلایق یا مصطفی محمد!
اصل وجود آدم مرسل نبی خاتم
راز نهان‌غه محرم یا مصطفی محمد!
طوبی قاب قوسین قمری باغ کونین
برچه‌غه قره عینین یا مصطفی محمد!
عرشی کرسیدین آشقان، حضرتیکا اولاشقان
توقسان مینک راز ایتوشکان یا مصطفی محمد!
یر - گؤک ایرور مأمورینک صحابه لار منظورینک
جمله امت مغفورینک یا مصطفی محمد!

هر کیم سنکا سیغینور تموغدین اول قوتولور
 اوچماخ سری اولانور یا مصطفی محمد!
 جانیم فداسی قیلسام، خوشنودلوقینی آلسام
 ارمان یوق ایردی اولسام یا مصطفی محمد!
 کرچه کوبتور گناهیم، کیچوزکای سین الهیم!
 سین سین منی پناهیم یا مصطفی محمد!
 یارب نچوک قیلغایمن شفاعتین قولکای من
 امتی دین بولغایمن یا مصطفی محمد!
 امتیدین بولغانلار شفاعتین قولغانلار
 اهل بهشت بولغانلار یا مصطفی محمد!
 احمد مرادی سین سین! ذکر و یاد و سین سین!
 ایشلار کشادی سین سین یا مصطفی محمد

(۲۵)

حکمت

حق تعالی فضلی برلان فرمان قیلدی
 ایشتیب اوقوب بیرکا کیردی قول خواجه احمد
 آلمیش اوچده سنت لارین محکم توتوب
 ایشتیب اوقوب بیرکا کیردی قول خواجه احمد
 بیر اوستیده اولمس بورون تریک اولدوم
 آلمیش اوچده سنت دیدی ایشتیب بیلدیم
 بیر آستیده جانیم بیله قوللوق قیلدیم
 ایشتیب اوقوب بیرکا کیردی قول خواجه احمد
 ایرانلاردین فیض و فتوح آلامادیم
 یوز یکره بیشکا کیردیم بیلامادیم
 حق تعالی طاعت لارین قیلالمادیم
 ایشتیب اوقوب بیرکا کیردی قول خواجه احمد

بولغای من مو محمد نی خاص امتی
 امت دیسه عاصی لارین خوش دولتی
 بالدین تاتلیغ ایرور منکا بو محنتی
 ایشتیب اوقوب بیرکا کیردی قول خواجه احمد
 بیزار اوچون جانلار چیکتی اول محمد
 امت بولسنگ غم ییمس سین یالغان امت
 کیچه - کوندوز حاصل لارینک عیش عشرت
 ایشتیب اوقوب بیرکا کیردی قول خواجه احمد
 ایلک یاشده ندا کیلدی اولمک آسان
 شرطی اولدور سنده بولسه نور ایمان
 تانکلا بارسنگ دیداریغه قیلور مهمان
 ایشتیب اوقوب بیرکا کیردی قول خواجه احمد
 ای مؤمن لار بو دنیانی پایانی یوق
 چین اولور سین هرکز مونی یالغانی یوق
 کیم بیللمسه والله آنی ایمانی یوق
 ایشتیب اوقوب بیرکا کیردی قول خواجه احمد
 اصلیم تفراق (توپراق)، نسلیم تفراق، برجه دین خوار
 باسیب اوتسنگ مردار جسمیم قیلغوسی عار
 کیم عار ایتسه شیطان قومی هواسی بار
 ایشتیب اوقوب بیرکا کیردی قول خواجه احمد
 چین ذاکرغه خدا اوزی قیلدی رحمت
 تانکلا یارسه جنت ایچره بیرور خلعت
 روز محشر دیدار کوروب سورکای دولت
 ایشتیب اوقوب بیرکا کیردی قول خواجه احمد
 بنده بولسنگ محنت تارتغیل غافل آدم
 عاقل ایرسنگ غنیمت دور سنکا شول دم
 امانت دور عزیز جانینک یورمه بی غم
 ایشتیب اوقوب بیرکا کیردی قول خواجه احمد

آلتیش اوچده سنت بولدی بیرکا کیرمک
 رسول اوچون ایکی عالم بر باد بیرمک
 عاشق لارنی سنتی دور تریک اولمک
 ایشتیب اوقوب بیرکا کیردی قول خواجه احمد
 امت بولسنگ ایشتیب جانینگ بیرمس موسن
 مصطفی غه جانینگ قربان قیلمس موسن
 جان نه بولغای ایمانیکنی بیرمس موسن
 ایشتیب اوقوب بیرکا کیردی قول خواجه احمد
 قول "خواجه احمد" آلتیش اوچده غایب بولدی
 ادب ساقلاب مصطفی غه نایب بولدی
 سلطان بولدی، محنت تارتیب تایب بولدی
 ایشتیب اوقوب بیرکا کیردی قول خواجه احمد

(۲۶)

حکمت

قهار آتلیغ قهرینکدین قورقوب ییغلار خواجه احمد
 رحمن آتلیغ رحمینکدین امید توتار خواجه احمد
 گناهیم کوب الهیم! کیچورکای سن گناهیم
 برجه قوللار ایچیده عاصی قول دور خواجه احمد
 منافقلار یورارلار، فسق و فجور قیلورلار
 حرام، شبهه یورلار قورقوب ییغلار خواجه احمد
 طریقتنی بیلمادیم، حقیقت غه کیرمادیم
 پیر بویروغین توتمدیم عذری کوبتور خواجه احمد
 آخر زمان بولغاندور، پادشاه ظالم بولغاندور
 حرام، شبهه تولغاندور حیران بولور خواجه احمد

شرمنده عاصی قول من، عشق یولیده بلبل من
 آرسلان بابا کا قول من قولونک بولور خواجه احمد
 قول "خواجه احمد" طاعت قیل، ییغلامقنی عادت قیل،
 بلا کیسه طاعت قیل! حقدین بولور خواجه احمد

(۲۷)

حکمت

توبه قیلیب حقه یانغان عاشقلارغا
 اوچماخ ایچره تورت اریغده شربتی بار
 توبه قیلمای حقه یانماکان غافلارغه
 تار لحدده قاتیغ عذاب حسرتی بار
 اوچماخ ملکین اومان قوللار توبه قیلسون
 توبه قیلیب حضرتیغه یاق بولسون
 حور، قصور، غلمان، ولدان، خادم بولسون
 الوان - الوان کیار تشریف خلعتی بار
 توبه قیلغان عاشقلارغه نوری ایرور
 تونی، کونی صایم بولسه کونکلی یارور
 قچان اولوب کورکا کیرسه کوری کینکرور
 اوغان ایذیم رحیم، رحمن رحمتی بار
 توبه سیزلار بو دنیا دین کیچماس بیلور
 اولوب بارسه گور عذابین کورمس بیلور
 قیامت کون تانک عرصات آتمس بیلور
 هیهات هیهات نوحه فریاد کونلاری بار
 نماز، روزه توبه اوزره بارغانلارغه
 حق یولیغه کیریپ قدم قویغانلارغه
 اوشبو توبه برله آنده بارغانلارغه
 یارلقامیش قوللار برلان صحبتی بار

نماز برله روزه‌لاری اوتن الار
 عالم خلقی سویونوب انی حقدین تیلار
 قیامت کون کوروب آنی آلا ر تینکلار
 نه قول ایرمیش بو سعادت نصرتی بار
 اول اریغلر کیمکا تورور بیلکیل آنی
 توبه قیلغان عاشقلارکا ایچورور آنی
 توبه‌سیزلار اول اریغ دین ایچمس ولی
 انکا ایچورور زهر - زقوم شربتی بار
 قیامت‌نی بیر کونی ایلک مینک ییلچه بولور
 بو دنیانی سانشه ییل نیچه بولور
 قیامت کون یتیمیش مینک ییل اوتده قالور
 توبه قیلکان قول‌لار کویمس مهلتی بار
 هر کیم حقنی قولی بولسه حقه یانسون
 حقه یانمس اوزین دیکان ناری بارسون
 قول خواجه احمد نچوک مونده اورون تابسون
 کیچه کوندوز قورقه تورور هیبتی بار

(۲۸)

حکمت

بهشت دوزخ تلاشور تلاشمقده بیان بار
 دوزخ ایتور من آرتوق منده فرعون، هامان بار
 بهشت ایتور نه دیرسین؟ سؤزنی ییلمای ایتورسین
 سینده فرعون بولسه منده یوسف کنعان بار
 دوزخ ایتور من آرتوق بخیل قول‌لار منده بار
 بخیل لارنی بوینی‌ده اوتلوغ زنجیر کشان بار
 بهشت ایتور من آرتوق پیغمبرلار منده بار
 پیغمبرلار آلدیده کوثر، حور و غلمان بار

دوزخ ایتور من آرتوق ترسا، جهود منده بار
 جهود، ترسا آلدیده تورلوك عذاب سوزان بار
 بهشت ایتور من آرتوق مؤمن قوللار منده بار
 مؤمنلارنى آلدیده تولورك نعمت الوان بار
 دوزخ ایتور من آرتوق ظالم قوللار منده بار
 ظالملاركا بیروركا زهر - زقوم چندان بار
 بهشت ایتور من آرتوق عالم قوللار منده بار
 عالملارنى كونكلى ده آیت حدیث قرآن بار
 دوزخ ایتور من آرتوق منافقلار منده بار
 منافقلار بوینی ده اوتدین اشكل كشان بار
 بهشت ایتور من آرتوق ذاكر قوللار منده بار
 ذاكرلارنى كونكلى ده ذكر اللهی سبحان بار
 دوزخ ایتور من آرتوق بی نمازلار منده بار
 بی نمازلار بوینی ده ییلان بیلان چیان بار
 بهشت ایتور من آرتوق دیدار كۆرمك منده بار
 دیدارینی کورساتورغه رحیم آتلیغ رحمن بار
 دوزخ انده تيك توردی بهشت عذرینی ایدی
 قول خواجه احمد نه بیلدی بیلدور کوچی یزدان بار

(۲۹)

حکمت

دیدارینی طلب قیلسنك ای ذاكرلار
 جاندین کیچیب خلقه ایچره کوزونك دیدار
 شوقینك بيله الله ایتیپ راستكا قایتیب
 تون اویقوسین حرام ایلاب بولکیل بیدار
 بیدارلاركا حق رحمتی بولور یاق
 بیدارلارنى كونكلى سینوق، کوزی یاشلیق
 من منلیكنی جزاسینی بیرکای تموق
 تکبرنى دوزخ ایچره حالی دشوار

سىندىن بورون يارالارىنىڭ قىيان كىتى
 بو دىياغە مىل قىلماي يىغلاپ اوتى
 عمرىنىڭ آخىر بولدى نوبىتى سىنكا يىتى
 گناھنىڭ كا توبە قىلگىلى ئاى بد كىردار!
 نىفسىنىڭ سىنى باقىپ تورسىنىڭ نىلاردىمىس
 زارى قىلىسنىڭ اللە سىرى بىيۇن سونمىس
 قولغە ئالسنىڭ بىيان قوشىدىك قولغە قونمىس
 قولغە ئايب تون اويقوسىن قىلگىلى بىيدار
 نىفس يولىغە كىرگان كىشى رسوا بولور
 يولدىن ئازىپ تايىپ توزوب گىمراە بولور
 ياتسە قوبسە شىيطان بىيلە ھىمراە بولور
 نىفسىنى تىكىلى نىفسىنى تىكىلى ئاى بد كىردار
 نىفسىنىڭ سىنى آخىر دىمدە گدا قىلگىلى
 دىن اويىنى غارت قىلىپ ادا قىلگىلى
 اولار وقتدە ايمانىنىڭدىن جدا قىلگىلى
 عاقل ايرىسنىڭ نىفسى بىددىن بولگىلى بىزار
 فرعون، قارون، شىيطان سوزىن مىھىم توتدى
 بول سىبىدىن يىتر يارىلدى ئانى يوتدى
 موسى كلىم ناصىھ بولوب سوزلار ايتدى
 قولاق توتماي اول ايكىسى اولدى مىردار
 گناھنىڭ كا توبە قىلىپ يىغلاپ يورغىل
 كىتار مىن دىپ يول باشىغە بارىپ تورغىل
 كىتكىنلارنى كوروب سىن ھىم عبرت ئالغىل
 عبرت ئالسنىڭ ياتمىش يىرىنىڭ بولور گىلزار
 مۇمىن قوللار درد ھالىت پىدا قىلدى
 ھىق يولىدە جان و دلنى شىدا قىلدى
 دىنيا تاشلاپ آخىرتنى سودا قىلدى
 سودا قىلىسنىڭ ھور وغلان بارى طىيار

قول "خواجہ احمد" نفس ایلکیدین قیلورمن داد
 پیر مغان بولغای موکین انکا جلاد
 بیخبرلار ایشیتماسلار داد و فریاد
 قان ییغلاغیل ایشیتسون اول پروردگار

(۳۰)

حکمت

عشق یولیده فنا بولای حق بیر و بار
 هر نه قیلسنک عاشق قیلغیل پروردگار
 ایلکیم آچیب دعا قیلای ایزیم جبار
 هر نه قیلسنک عاشق قیلغیل پروردگار
 عشقی تیکسه کویدور کوسی جان و تنی
 عشقی تیکسه ویران قیلور ما و منی
 عشق بولمسه تانیب بولمس مولیم (مولام) سنی
 هر نه قیلسنک عاشق قیلغیل پروردگار
 عشق دفتری سغماس دوستلار درکاهی کا
 جمله عاشق ییغیلیب بارکای بارکاهی کا
 یتی دوزخ طاقت قیلمس بیر آهی کا
 هر نه قیلسنک عاشق قیلغیل پروردگار
 خاص عشقینکنی کورسات منکا شاکر بولای
 ارّه قویسه زکریادیك ذاکر بولای
 ایوب صفت بلاسیغه صابر بولای
 هر نه قیلسنک عاشق قیلغیل پروردگار
 عشق دردینی طلب قیلدیم درمانی یوق
 عشق یولیده جان بیرکانی ارمانی یوق
 بو یول لارده جان بیرمسه امکانی یوق
 هر نه قیلسنک عاشق قیلغیل پروردگار

قایدین تاپای عشقینک توستی قراریم یوق
 عشق ثناسین تونی کونی قویاریم یوق
 درکاهنکدین اوزکا بیرکا باراریم یوق
 هر نه قیلسنک عاشق قیلغیل پروردکار
 عشق بازاری. اولوغ بازار سودا حرام
 عاشق لارکا سندین اوزکا غوغا حرام
 عشق یولیغه کیرکانلارکا دنیا حرام
 هر نه قیلسنک عاشق قیلغیل پروردکار
 عاشق‌لیق‌نی دعوی قیلیب یورالمیم
 نفسدین کیچیپ من امری‌نی قیلالمادیم
 نادان‌لیقده حق امرینی بیلالمادیم
 هر نه قیلسنک عاشق قیلغیل پروردکار
 قول "خواجه احمد" عشق دین قاتیغ بلا بولماس
 مرهم سورمه عشق دریغه دوا بولماس
 کوز یاشیدین اوزکا هیچ کیم گواه بولماس
 هر نه قیلسنک عاشق قیلغیل پروردکار

(۳۱)

حکمت

هر کشی کورسه جمال‌نک دنیا ایشین برباد ایتار
 کیچه کوندوز تنه بیلماس خداینی یاد ایتار
 کیم آن‌نک کوینده بولسه حق آن‌نک کونکلنده‌دور
 هر ساری بارسه اوشال یاری بیلان پرواز ایتار
 کاشکی من دایم سنک یاد‌نک بیلان بولغای ایدیم
 باقشنک یوز مینک متنک‌داک بنده‌نی آزاد ایتار
 معرفت میدان‌ی ایچره بو کونکلنی شاد ایتیپ
 دنیاسین ترک ایلکلنلار حق بیلان سودا ایتار

عارف اول دور بولسه عاشق حلقهده جولان ايتيب
 استعانتني تىلاب اول پيرنى قالقان ايتار
 خوش عجايب و غرايب بو خدانينك ايشلارى
 بيرسين گويا قىلوين بيرسين ترکان ايتار
 كوركىل اوشبو دنيا ايچون كوب جفالار ايلسانك
 آخرى هيچ اوشبو دنيا ييرييلان يكسان ايتار
 كيچه - كوندوز آرزو قىلسانك آنك ديداريني
 صاف قىلغىل بو كونكلنى بير كونى دربار ايتار
 اى قول احمد سين يوروب غمكين كونكلنى اولاغىل
 اهل دل بولغان كشى غمكين كونكلنى شاد ايتار

(۳۲)

حکمت

ناگهان توروريمده قموغ بزرک
 حق عشقنى كونکلوم ايچره سالدی دوستلار
 خضر بابام حاضر توروب لطف ايلابان
 مدد قىليب ايلکيم توتوب آلدی دوستلار
 اوتوز بيرده خضر بابام مى ايچوردی
 وجوديمدين عازيلنى حق قاچوردی
 سودا قىلديم، يازوقلاريم حق كيچوردی
 آندين سونکره حق يوليغه سالدی دوستلار
 اوتوز ايکي ياشده يتي حقدین فرمان
 بنده ليک کا قبول قىلديم قيلمه ارمان
 جان بيوروده بيرکوم سنکا نور ايمان
 غريب جانيم شادمان بولوب کولدی دوستلار

خالقیم دین خبر یتی شاکر بولدوم
 هر کیم سوکتی بلکه تیبتی صابر بولدوم
 بو عالمده هیچ اوخلامای حاضر بولدوم
 های - هوس، ما و من لیک کیتی دوستلار
 اوتوز اوچده ساقی بولوب می اولاشتیم
 جام شراب قولغه آلیب توپا ایچتیم
 لشکر توزاب شیطان برله مین اوروشتیم
 بحمد الله ایکی نفسیم اولدی دوستلار
 اوتوز تورتده عالم بولوب دانا بولدوم
 حکمت ایت دیب سبحان ایدی گویا بولدوم
 چلتن برلان شراب ایچتیم همراه بولدوم
 ایچ و تاشیم حق نوریغه تولدی دوستلار
 اوتوز بیشده مسجد کیریپ دوران سوردم
 طالبلارکا عشق دوکانین تولا قوردوم
 ایگری یولغه هر کیم کیردی سوکتوم اوردم
 عاشقلارکا حق دین مژده یتی دوستلار
 اوتوز یتی یاشقه کیردیم او یغانمادیم
 انصاف قلیب الله سری تولغانمادیم
 سحر وقتده زاری قلیب اینکرانمادیم
 توبه قیلدیم خواجم قبول قیلدی دوستلار
 اوتوز سیکز یاشقه کیردیم عمروم اوتی
 بیغلامیمو اولار وقتیم یاق یتی
 اجل کیلیب پیمانہ سین منکا توتی
 بیلمای قالدوم عمروم آخر بولدی دوستلار
 اوتوز توقوز یاشقه کیردیم قیلدیم حسرت
 وادریغا اوتی عمروم قانی طاعت
 طاعت لیکلار حق قاشیده خوش سعادت
 قیزیل یوزوم طاعت قیلمای سولدی دوستلار

ساچ و سقال خوب آقاردی کونکلوم قرا
 روز محشر رحم ایتما سنک حالیم تباہ
 سنکا عیان عمل سیز من کوبتور گناه
 جمله ملک یازوقلاریم بیلدی دوستلار
 پیر مغان جرعه سیدین قطره تاتیم
 یول تاپایدیب باشیم برله تونلار قاتیم
 بحمد الله لطف ایلادی نورکا باتیم
 کونکل قوشی لامکانغه یتی دوستلار
 قیامت نی شدتی دین عقلم حیران
 کونکلوم قورقغان، جانیم هورکان، خانه ویران
 صراط آتلیغ کوفروکی دین دلیم لرزان
 عقلم کیتی بیهوش بولوب قالدیم دوستلار
 قول "خواجه احمد" قیرقه کیردینک نفسینکی قیرق
 مونده ییغلاب آخرته بولکیل اریق
 پوست ایمان شریعت دور مغزی طریق
 طریق کیرکان حقدین اولوش آلدی دوستلار

(۳۳)

حکمت

اولیالار ایتکان وعده کیلدی بولغای
 قیامت نی کونی یاوق بولدی دوستلار
 عاقل قوللار بولغانی نی ییلدی بولغای
 خلق ایل دین مهر شفقت کیتی دوستلار
 اولوغ کیچیک یارانلاردین ادب کیتی
 قیز و ضعیف جوانلاردین حیا کیتی
 الحیاء من الایمان دیب رسول ایتی
 حیا سیز قوم عجایب لار بولدی دوستلار

مسلمان مسلماننی قیلدی قاتل
 ناحق توتوب حق ایشلارین قیلدی باطل
 مرید پیرغه قیلما دیلار یوزی خاطر
 عجب شوملوغ زمانه لار بولدی دوستلار
 اهل دنیا خلقمیزده سخاوت یوق
 پادشاهلارده وزیرلارده عدالت یوق
 درویشلارنی دعاسیده اجابت یوق
 تورلوك بلا خلق اوستیغه یاغدی دوستلار
 آخر زمان عالم لاری ظالم بولدی
 خوش آمد ایتکوچی لار عالم بولدی
 حقنی ایتکان درویشلارکا غنیم بولدی
 عجب شوملوغ زمانه لار بولدی دوستلار
 قیامت کون یاوق یتتی قالغانی یوق
 قول احمدنی ایتکان سوزین یالغانی یوق
 اوز اوزیغه بیر نصیحت قیلغانی یوق
 نصیحتین خلقه ایتیپ دوستلار

(۳۴)

حکمت

محبتنی جامین ایچکان دیوانه لار
 قیامت کون اوت آغزیدین ساچار دوستلار
 قدرت برله یراتیلکان یتتی تموغ
 عاشقلارنی نعره سیدین قاچار دوستلار
 دوزخ ییغلاب داد ایلاکای خدایی کا
 طاقتیم یوق عاشقلارنی بیر آهی کا
 قاچیب بارکای حق تعالی پناهی کا
 عاشقلارنی یاشی برلان اوچار دوستلار

عاشقلاری عشق دوکانین بارسه قوروب
 انشاء الله دوزخ قاچقاي آندین قورقوب
 یاشین ساجیب کوکسین آجیب یوزین سوروب
 ییتی آسمان طاقت قیلمای کوچار دوستلار
 رحمن ایکام ساقی بولوب می ایچورسه
 اهل عیال خانماندین پاک کیچورسه
 وجودیمدین عزازیلنی حق قاچورسه
 جرم عصیان کره لارین آچار دوستلار
 عشق بابی نی حق یوزیغه وا ایلاسه
 خاص عشقنی کونکل ایچرد جا ایلاسه
 لطف ایلاسه ایکی عالم شاه ایلاسه
 عاشقلاری حق ساریغه اوچار دوستلار
 سبحان ایکام بیر قطره می قیلسه انعام
 ذکر سرنی ایته ایته قیلسام تمام
 حور و غلمان جمله ملک انکا غلام
 اوچماخ ایچره حریر تونلار بچار دوستلار
 الله دیبان گوردین قوپسه عالم کوپار
 خاص بندم دیب رحمان ایکام یالغوز سویار
 یاش اورنی غه قانین توکوب یوزنی بویار
 حمدین ایتسه شیطان لعین قاچار دوستلار
 مین ایتمادیم الله اۆزی وعده قیلدی
 یولسیز ایدیم لطف ایلابان یولغه سالدی
 غریب بولوب ناله قیلدیم. قولوم آلدی
 انداغ عاشق شوق شرابین ایچار دوستلار
 قول خواجه احمد عشق سیزلارنی ایشی دشوار
 تانکلار بارسه حق کورساتمس انکا دیدار
 عرش کرسی لوح قلم همه بیزار
 عشق سیزلارکا دوزخ بابین آچار دوستلار

کوزوم نملیک دلیم غملیک جان الم لیک
 نیچوک علاج ایتاریمنی بیلمام دوستلار
 بو حسرتده ندامتده یاشیم آقیب
 قایو طرف کیتاریمنی بیلمام دوستلار
 تورلوك تورلوك علامتلار بولدی پیدا
 یوراکیمده جراحتلار بولدی پیدا
 بو دنیاده لحظه فارغ بولماغ پیدا
 نیچوک علاج ایتاریمنی بیلمام دوستلار
 الله اوچون فرزندلاریم یتیم قیلسام
 جاندين کیچیب مالدين کیچیب غریب بولسام
 بیابانده یالغوز قاز دیک ناله قیلسام
 نیچوک علاج ایتاریمنی بیلمام دوستلار
 خاص قوللار دیک کیچهلاری قایم بولسام
 مردانلار دیک کوندوزلاری صایم بولسام
 کیچهلاری آرام آلمای ریم دیسام
 نیچوک علاج ایتاریمنی بیلمام دوستلار
 تخم عصیان بیحد ساجتیم طاعتیم آز
 اوتی عمروم غفلت بیلان هم قیش و یاز
 یاقین تورور جانم قوشی قیلسه پرواز
 نیچوک علاج ایتاریمنی بیلمام دوستلار
 قول خواجه احمد خدمتیده جان بیرمه
 دهقان ایرمس کیتمان چاییب نان بیرمه
 وا بولمغای کل غنجهسی نم بولمه
 نیچوک علاج ایتاریمنی بیلمام دوستلار

(۳۶)

حکمت

عشق سزینی بیان قیلسام عاشق لارکا
طاقت قیلمای باشین آلیب کیتار دوستلار
تاغ [قه] تاشقه باشین اوروب بیخود بولوب
اهل عیالیم خانماندین اوتار دوستلار
عشق شدتی باشقه توشسه عاشق تیلار
بیکانه لار تاشلار آتیب آنکا کولار
دیوانه دیب باشین یاریب قانغه بولار
شاکر بولوب حمد ثنا ایتار دوستلار
عشق سیزلارنی هم جانی یوق هم ایمانی
رسول الله سؤزین ایدیم معنی کانی
نیچه ایتسام ایشیتکوچی بیلکان قانی
بیخبرکا ایتسام کونکلی قاتار دوستلار
عشق گوهری توبسیز دریا ایچره پنهان
جاندین کیچیب گوهر آغان بولدی جانان
بولهوسلار عاشق مین دیب یولده قالغان
دین لارینی پوجک پلغه ساتار دوستلار
اوتقه کویدوم، جاندین تویدوم، حیران بولدوم
بو نچوک اوت؟ کویمای، یانمای، بریان بولدوم
محبتنی آتین ایشیتیب کریان بولدوم
کوزی کریان مرادیغه ینار دوستلار
زار ییغلابان زار اینکرا کیل رحمی کیلسون
یول اداشنک رحمی کیلیب یولغه سالسون
آمین دینکلار پیر مغان قولونک آلسون
خدمت قیلغان مرادیغه یتار دوستلار

زمانه آخر بولدی خویونك كیتی
 رسول الله وعدهلاری یاوق ییتی
 خاص قوللاری یخشی سوزکا قولاق توتی
 یمان قوللار کوندین کونکا بتر دوستلار
 کل یوم بتر دیدی حق مصطفی
 امت بولسنگ قولاق سالغیل اهل وفا
 یخشیلارنی اجرین بیروور بدکا جزا
 قیامت کون جزالارین تارتار دوستلار
 فاسق، فاجر هوا قیلیب ییرنی باسماس
 روزه، نماز قضا قیلیب مسواک آسماس
 رسول الله سنتلارین کوزکا آلماس
 گناهلاری کوندین کونکا آرتار دوستلار
 دنیادارلار مالین کوروپ هوا قیلور
 من - من لیک دین اول دعوی خدا قیلور
 اولار وقتده ایمانیدین جدا قیلور
 جان برارده حسرت برلان کیتار دوستلار
 قموغ دنیا یقانلارنی والله کوردوم
 اولار وقتده قلا ی سین دیب حالین سوردوم
 شیطان ایدی ایمانی غه چنکال اوردوم
 جان چیغاردده ییغلای ییغلای کیتار دوستلار
 قول خواجه احمد عاشق بولسنگ جانینگ کویسون
 صدقینگ برلان الله دیکیل تنکری بیلسون
 دعا قیلغیل مؤمن قوللار دنیا قویسون
 دنیا قویغان آخرتقه یتار دوستلار

محبت‌نی شرابی‌دین ایچورمسه
 جان، دلیم حسرت ییلان کیتار دوستلار
 الله یادین ورد ایلامای اولوب کیتسام
 ایسز عمروم ارمان برله اوتار دوستلار
 الله دیکان چین عاشقلار براق مندی
 معشوقیدن محنت یتسه بویون سوندی
 طریقت‌نی بازارینده جولان قیلدی
 حقیقت‌نی دریاسیدین اوتار دوستلار
 حقیقت‌نی دریاسیدین آغان کشی
 اوزی مونکلوغ، کونکلی سینوق، کوزده یاشی
 خوارلیق، زارلیق، مشقت‌دور دایم ایشی
 دیدارینی طلب قیلیب تاپار دوستلار
 حقیقت‌لیغ عاشقلارنی نفسی اولوک
 اوچ یوز آلتیمیش، تورت یوز قرق تورت همه سلوک
 سوزی شرین خلق خوشی یوز مینک تورلوك
 بو دنیانی پوچک پل‌غه ساتار دوستلار
 عارف، عاشق بولای دیسنک الم تارتغیل
 حق وصلی‌غه یتای دیسنک تونلار قاتغیل
 بو دنیانی عشرتی‌نی تاشلاب آتغیل
 تاشلاب آتسنک ما و من لیک کیتار دوستلار
 قیامت‌نی شدتی‌نی بیلماکانلار
 قاتیغ عذاب تار لحد‌دین قورقماغانلار
 حق قهریدین قورقوب یاشین توکماکانلار
 دوزخ ایچره یوز مینک عذاب تارتار دوستلار

وا دريغا اوتي عمریم بيالامادیم
 جاندين کيچيب حضرت سري بارالمادیم
 نفسدين کيچيب حق امريني قيلالمادوم
 اولوب بارسام حسرت منکا يتار دوستلار
 اوتي عمروم شريعتکا يتالمادیم
 شريعتسيز طريقتکا اوتالمادیم
 حقيقتسيز معرفتکا باتالمادیم
 قاتيغ يولدور پيرسيز نيچوک اوتار دوستلار
 قول خواجه احمد نفسيم سالدی اوشبو يولغه
 آينک اوچون قاچتیم دوستلار چولدين چولغه
 الله ديب هيچ باقمادیم اونک سولغه
 الله ديکان شوق شرايين ايچار دوستلار

(۳۸)

حکمت

يراتقان بير و باريم يولين ايزلاب
 شيطان لعين يوللاری دين قايتينک دوستلار
 اخلاص برلان محبتني جامين ايچيب
 جان و دلده حیّ ذکريني ايتينک دوستلار
 حیّ ذکرين ايتيب ايچکان جام شراب
 يول اوستيده عزيز باشی مثل تراب
 الله اوچون حالی خراب. بغري کباب
 جان و دلده حیّ ذکريني ايتينک دوستلار
 آستانه غه باشيم قويوب زاری قيلسام
 حلقه قوروب کيم ذکر ايتسه یاری بيرسام
 ذکرين ايتيب اول صحبتده درلار تيرسام
 جان و دلده حیّ ذکريني ايتينک دوستلار

عمل قىلماي عالم علمين باسيب يوركاي
 اولوب بارسه تار لحدده جانى كويكاي
 الله رسول دينيك كيمديب هيبت قىلكاي
 جان و دلده حى ذكرينى ايتينك دوستلار
 منكر - نكير "من رَبُّكَ" ديب سؤال قىلغاي
 قال علميدىن بير نكتهسى كار قىلماغاي
 وا حسرتا عمل سىزلار نيچوك قىلغاي
 جان و دلده حى ذكرينى ايتينك دوستلار
 الله ديكان قند و عسل پيدا قىلدى
 آخرتده الله برله سودا قىلدى
 عمل قىلغان چين عالمنى دانا قىلدى
 جان و دلده حى ذكرينى ايتينك دوستلار
 قالينك چراغ، حالينك پلته، ياغى ياشينك
 نچه ايتسام بهره آلمس كونكلى تاشينك
 يول اوستيده تفراق بولسون عزيز باشينك
 جان و دلده حى ذكرينى ايتينك دوستلار
 ايسز عالم عمل قىلماي يولده قالور
 اوقوب - اوقماي دنيا مالين قولغه آلور
 من - من ليكيدىن ايسز عمرين ضايع قىلور
 جان و دلده حى ذكرينى ايتينك دوستلار
 ظاهر بوزوب باطن توزه عالم بولسنىك
 روز محشر قولونك توتقاي تانكلار بارسنىك
 وا ويلتا ندامت ديب يولده قالسنىك
 جان و دلده حى ذكرينى ايتينك دوستلار
 عالم اولدور، نماز اوقوب طاعت قىلسه
 حقدىن قورقوب آخرتنى غمين ييسه
 قرآن اوقوب حقدىن قورقوب زاراينكراسه
 جان و دلده حى ذكرينى ايتينك دوستلار

آنداغ عالم ايكي گوزي گريان بولور
 سحرلاري ايرته قوپوب نالان بولور
 حق يولیده کویوب یانیب بریان بولور
 جان و دلده حی ذکرینی ایتینک دوستلار
 خوارلیق تارتقیل کافر نفسینک باشی قاتسون
 دایم مدام بو دنیادین ییغلاب اوتسون
 تفراق بولغیل عالم سنی باسیب اوتسون
 جان و دلده حی ذکرینی ایتینک دوستلار
 خوارلیق تارتیب حق مصطفی امت دیدی
 عاصی جافی امتلارین غمین ییدی
 آننک اوچون امتلاری قوت آلدی
 جان و دلده حی ذکرینی ایتینک دوستلار
 امت اوچون بغریده یوق ذره بوتون
 امت دیسه دماغی دین چقاي توتون
 حق تعالی قیلغایمو دیب بیزنی اوتون
 جان و دلده حی ذکرینی ایتینک دوستلار
 قول خواجه احمد آلاي دیسنک حقدین اولوش
 بایزیددیک نفسینک ییله تون کون اوروش
 ای بیخبر امت ایرسنک بولدور روش
 جان و دلده حی ذکرینی ایتینک دوستلار

(۳۹)

حکمت

دیدار اوچون جاننی قربان قیلماکونچه
 اسماعیل دیک دیدار آرزو قیلمنک دوستلار
 جاندین کیچیپ طریقت کا کیرماکونچه
 عاشق مندیب یالغان دعوی قیلمنک دوستلار

عاشق ليق اولوغ دعوى قيلسنىك مونى
 محنت برله سنار ايرميش موليم سيني
 رنج محنت برله بولسنىك تونى - كونى
 معشوقينكىدين كونكل اوزكا قيلمنىك دوستلار
 منليك برله طريقتكا كيرمادىلار
 جاندين كيچماي يولغه قدم قويمايلا
 نفس اولتورماي تسليم فنا بولمايلا
 خام طمعليغ برله يولغه كيرمنىك دوستلار
 اوشبو عشقنى يولى تيليم بولمق ترور
 مونده يغلاب آخرنده كولماق ترور
 كل رنىكلارى زعفران ديك سولماق ترور
 مونداغ بولماي عاشق منديب ايتمانىك دوستلار
 مرشدلارنى خدمتىنى قيل اختيار
 اوزلوكومدين يولغه كيرديم ديمه زنهار
 يخشى بيلسنىك طريقتنى خطرى بار
 قلاوزسىز اوشبو يولغه كيرمنىك دوستلار
 مرشدلاركا خدمت قيلسنىك نفسكا آفت
 تيكمه نادان بو يوللارده قيلمس طاقت
 صادق قوللار بو يوللارنى بيلور راحت
 تريك اولماي ديدار آرزو قيلمنىك دوستلار
 الكذاب لامتى ديدى سيزكا
 اول محمد حق رسولى ديدى بيزكا
 يالغانچى غه جنت يوقتور والله آنكا
 يالغان سوزلاب ايمانسىزين كيتمنىك دوستلار
 خانمانين ترك ايتمايين كورمس ديدار
 ديدار كوراي ديكان عاشق بولور بيدار
 آنداغ عاشق آخر كوركاي آنده ديدار
 ديدار كورماي سردين خبر توبنمنىك دوستلار

سردین معنی تویماکانلار بیکانه دور
 اول عاشقنی مکان لاری ویرانه دور
 عشق یولیده جان بیرکانلار جانانه دور
 جاندین کیچمای جاندین خبر بیلمنک دوستلار
 قول خواجه احمد اوزدین کیچمای دعوی قیلمه
 خلق ایچیده عاشق من دیب تیلکا آلمه
 عاشق لیغ اولوغ ایشدور غافل بولمه
 غافل بولوب حق دیدارین کورمنک دوستلار

(۴۰)

حکمت

محبتنی جامین ایچیب رقص ایلاکان
 دیوانه لیغ مقامی غه کیردی دوستلار
 آج و توقلوق سود و زیان هیچ بیلماکان
 سرمست بولوب رقص سماع اوردی دوستلار
 رقص سماع اورکانلارکا دنیا حرام
 اهل عیال خانماندین کیچتی تمام
 سحر وقتده حقه سیغنیب ییغلار مدام
 آندین سونکره رقص سماع اوردی دوستلار
 رقص سماع اورکان عاشق اوزین بیلماس
 بیهوش یورار دنیا مالین قولغه الماس
 یوز مینک آدم تقصیردیه مغرور بولماس
 دنیا تیغیب رقص سماع اوردی دوستلار
 دنیا تیغمای رقص سماع اورکان جاهل
 حق یادینی بر دم ایتمای یورور غافل
 درویش من دیر دنیا سری کونکلی مایل
 دنیا اوچون رقص سماع اوردی دوستلار

اوزدین کیتمای رقص سماع اورمق خطا
 سبحان ایکان انکا قیلمس ایمان عطا
 طاعت قیلسه دل لارینی قیلمس صفا
 ریا قیلیب رقص سماع اوردی دوستلار
 وای اوشنداغ نادانلاردین امید قیلمانک
 فیض فتوح آلور من دیب یوکروب یلمنک
 نفسی اولوغ شرعی بوزوغ ولی بیلمنک
 شیطان لعین نوخته اورمای مندی دوستلار
 اوزدین کیتمای رقص ایلاسه الله بیزار
 سماعیدین یر تبرانیب تارتقای آزار
 دعا قیلای کورساتمسون انکا دیدار
 دین دین کیچیپ رقص سماع اوردی دوستلار
 دیوانه لیغ غالب کیلمای سماع اورار
 حق مصطفی چهار یار دین بیزار یورار
 باشدین ایاغ کنه لاری حاضر تورار
 کنه تیلاب رقص سماع اوردی دوستلار
 شبلی عاشق سماع اوردی پرتو کوروب
 مصطفی نی حاضر کوروب سؤال سوروب
 دنیا عقبین آرقه تاشلاب کوزین یوموب
 انداغ قول لار رقص سماع اوردی دوستلار
 شبلی عاشق ییغلاب ایدی ایا رسول
 بیطاقت من سماع اورسام هم من ملول
 رسول ایدی انشاء الله قیلکای قبول
 رخصت تیلاب رقص سماع اوردی دوستلار
 قول خواجه احمد رقص سماع هر کیمکایوق
 تقلید برله اورسه کیرکای تموق
 بو روایت پنهان ایردی ایتسام قموق
 حقنی تاپیب رقص سماع اوردی دوستلار

شریعتنی شرایطین بیلکان عاشق
 طریقتنی مقامی نی بیلور دوستلار
 طریقتنی ایشلارینی ادا قیلیب
 حقیقتنی دریاسیغه باتار دوستلار
 دیدارینی کوروب بولمس تون - کون اویوب
 پاک عشقنی قولغه آلمای بولمس یوروب
 حقیقتنی دریاسی نی خطری کوب
 هیچ اوخلامای دیدارینی کوردوم دوستلار
 ایا عاشق بو دنیا ده محنت تارتقیل
 تارتقان جور و جفالارنی راحت بیلکیل
 هو صحبتین قورغان بیرکا اوزونک اورغیل
 اورکان عاشق مرادیغه یثار دوستلار
 بو یوللارنی غذاسی دور قیغو محنت
 محنت تارتیب جفا چیکان کورار راحت
 سحرلارده زاری قیلغان خوش سعادت
 هو - هو تیو بو دنیا دین اوتار دوستلار
 چین دل برله ییغلاغانلار کورکای لقا
 سبحان ای کام دیدارینی قیلغای عطا
 قلاوزسیز یولغه کیرمنک عین خطا
 یولغه کیرکان منزل لاردین اوزار دوستلار
 وا دریغا اوتی عمروم بیلمای قیلدیم
 بو دنیا اسبابی نی قولغه آلدیم
 دنیا ایزلاب دین ایشینی آرتقه سالدیم
 بیالامس مین حالیم نیچوک بولور دوستلار

محبتنى شرابى دین تاتماغانلار
 بايزيد ديك هر گون اوزين ساتماغانلار
 بو دنيانى عزتى دین اوتماكانلار
 حيوان ايرور بلکه آندین بتر دوستلار
 عاشق بولسنىك عشق يوليغه قويغیل قدم
 دنيا عقبين طلاق قويغیل مثل ادهم
 عاقل ايرسنىك دنيا اوچون ييماكيل غم
 قيامت گون جزالارين بيرار دوستلار
 سر شرابين ايچكان عاشق اوزين بيلمس
 بو دنيانى عزت لارين كوزكا ايلمس
 يوز مينك دانا ناصح بولسه پندین آلمس
 وا شوقا ديب اوزين بيلمای يورار دوستلار
 روز الست خدا اوزى ندا قيلغان
 "قالوا بلى" ديبان روح لار جواب بيركان
 حضرت تبا روح لار اوچوب قارشو كيلكان
 انداغ عاشق حق جمالين كورار دوستلار
 قول خواجه احمد عاشق بولسنىك دنيا قويغیل
 آخرتنى عذابى دین قايغو ييكيل
 ايرانلارنى قيلغانلارين سين هم قيلغیل
 خدمت قيلغان آخر مراد تاپار دوستلار

(۴۲)

حکمت

حقه يانيب مؤمن بولسنىك طاعت قيلغیل
 طاعت قيلغان حق دیدارين كورار دوستلار
 يوز مينك بلا باشقه توشسه اينكرانمكيل
 اندین سونكره عشق سرینی بيلار دوستلار

عاشقلاری زار اینکرا بان یولغه کیردی
 هر نه جفا تیکسه آنی حقدین بیلدی
 راضی بولوب بیر آستیغه حاضر بولدی
 زار ییغلابان سحرلارده قوپار دوستلار
 ایا دوستلار هیچ بیلدیم من یولومنی
 سعادته باغلامدیم من بیلیمنی
 غیبت سوزدین هیچ ییغمادیم من تیلیمنی
 نادانلیقیم منی رسوا قیلدی دوستلار
 کیچه - کوندوز بی غم یوردوم ذکرین ایتما
 جهد ایلابان تونی - کونی فکرین ایتما
 محبتنی بازارینده اوزنی ساتما
 نفسیم منی یوز مینک طعام تیلار دوستلار
 نفسینکنی سن اوز رأیی کا قویمه زینهار
 ییمای، ایچمای، طاعت برله بولغیل بیدار
 آخر بیر کون کورساتکوسی سنکا دیدار
 بیدار بولغان انده دیدار کورار دوستلار
 ایا غافل حق ذکرینی تیلدین قویمه
 دنیا لیکدین بیر ذرّه سین قولغه آلمه
 ایرانلارنی آرقاسیدین هرکز قالمه
 یولغه کیرکان آخر مراد تاپار دوستلار
 وا دریغا ارمان بیله عمریم کیچتی
 نفسیم منی طغیان قیلدی حددین آشتی
 جانیم قوشی پرواز قیلسه روحوم قاجتی
 غافل یورکان عمرین ییل کا ساتار دوستلار
 دیدار کورای دیکان قوللار بیدار بولور
 یورسه، قوبسه، یاتسه، تورسه، ذکرین ایتور
 ایچی تاشی انداغ قولنی نورکا تولور
 الله نورین انداغ قولغه ساچار دوستلار

عارف عاشق اوز جانینی اوتقه یاقمس
 بی دردلارکا عشق چیقماقین یاقیب چیقمس
 دنیا کیلیب جلوه قیلسه قیا باقمس
 عشق سیز کشی بهایمدین بتر دوستلار
 قول خواجه احمد بنده بولسنگ ییغلاب یورکیل
 محبتنی مجلسی غه اوزونک اورغیل
 قیامتنی شدتیدین ماتم قورغیل
 ماتم قورغان سردین خبر آلور دوستلار

(۴۳)

حکمت

روح قوشینی تترار بولسه بال پری
 پرواز قیلیب عرشدین عرشقه قونار دوستلار
 قول مین دیکان دایم تینمای ذکرین ایتار
 عشق اوتی غه بغری کویوب فریاد ایتار
 بیخبرلار عمرین بیلمای ییل کا ساتار
 غفلت برلان جهنم کا کیتار دوستلار
 آخر زمان شیخی توزار صورتلارین
 زهد تقوی قیلمای بوزار سیرتلارین
 کرامت دیر خواب غفلت رؤیتلارین
 ریا برله خلقه اوزین ساتار دوستلار
 ایا غافل عمرینک سنی اوتار ییل دیک
 کوز یاشینکنی آقوزدایم آب سیل دیک
 سینی سویار درکاهیده مثل قول دیک
 خواجه سویسه سینی آزاد ایتار دوستلار

غفلت برله عمرينك سنى اوتار بيلكيل
 جانينك برله پير خدمتين توروب قيلكيل
 اندين سونكره دركاهى كا لايق بولكيل
 خدمت قيلكان مرادىغه يتار دوستلار
 قول خواجه احمد حكمت ايتيب ييغلا سحر
 ايرانلارنى الفاظى دين آليب خبر
 سوز اصلنى بيلكانلاركا اصل گوهر
 ظاهرىغه باقغان قوروغ قالار دوستلار

(۴۴)

حكمت

كيلينك دوستلار الله يادين دايم ايتينك
 الله يادى كونكل ملكين آچار دوستلار
 استغفر استغفارنى تينماي ايتينك
 شيطان لعين تن ملكى دين قاجار دوستلار
 شيطان لعين سيزكا دشمن حاضر بولونك
 كيچه الله كوندوز الله، ايتيب كويونك
 تار لحدكا كرار وقتده نوركا تولونك
 ملايك لار الله نورين ساجار دوستلار
 الله نورى قبر ايچىنى روشن قيلكاي
 ملايك لار تيكراسيده روزن قويكاي
 مؤمن بنده كوروب آنى حيران قالكاي
 بو عالمنى روشنيدين كيچار دوستلار
 بارچه ارواح يغليب كيلكاي مبارككا
 خلایق لار مشغول بولكاي تبارككا
 دعا قيليب يانغاندين سونك قالوريكا
 جمله ارواح سويونوب بر بر قوچار دوستلار

ييتى قدم قويغاندين سونك منكر نكير
هيبت برلان كيريب كيلكاي قىليب قهير
ايكى كوزى اوتديك يانيب اوقراب تورير
نورين كوروب تعظيم قىليب قاچار دوستلار
منكر نكير سورماي چىقيب ناله قىلغاي
كوز ياشىنى آقزوبان ژاله قىلغاي
حق يادىنى آيتىب اوزين واله قىلغاي
پرواز قىليب هوا سري اوچار دوستلار
ندا كيلكاي الهيم دين نه يىغلادىنك
خاص قولوم دين قبر ايچنده نه تىنكلادىنك
اي بى ادب قولاق ساليب نه آنكلادىنك
منكر نكير اونك سونكى كا قاچار دوستلار
يورسه، تورسه، ياتسه، قوبسه ميني يادىم
خط برات قولغه آلغان اول آزادىم
انداغ قولنى صيدى دور من، اول صيادىم
قىلميش، ايتميش كندالارين كيچار دوستلار
كندالارين حق باغيشلاب نظر قىلغاي
اونكده، سونكده ياتقانلارى شاكِر بولغاي
اندين سونكره بارچه ارواح حاضر بولغاي
قبرستانغه حق رحمتين ساچار دوستلار
بحمد الله يخشى كىلدى بيز قوتولدوك
قبر ايچنده هر عذابدين فارغ بولدوك
نيچه يىللار مرده ايردوك باز ترىلدوك
دعا قىليب حقه ايلكىن آچار دوستلار
منكر نكير يىغلاب ايتورسين بيلورسين
ذاتىنك اولوغ هر نه قىلسنك سين قىلور سين
لطف ايلاسنك يول سزلاركا يول بىرورسين
سجده ايلاب شاكِر تىلين آچار دوستلار

لَا إِلَهَ إِلَّا اللَّهُ غه شیدا بولغان
 دیدار اوچون بو عالمده رسوا بولغان
 دنیا قویوب آخرت نی سودا قیلغان
 حوض کوثر شرابی دین ایچار دوستلار
 روز ازل تقدیر قیلسه حق جمالی
 یوز مینک شیطان قصد ایلاسه یوق زوالی
 کوندین کونکا زیاد بولغای قال و حالی
 دانا بولوب حق یوللارین آچار دوستلار
 محبت نی میدانیده جولان قیلغان
 حقیقت نی دریاسیدین کوهر آغان
 معرفت نی مناعی نی ایچکا سالغان
 یورسه، تورسه، دُر و گوهر ساچار دوستلار
 عاشق اولدور حقه جانین قربان قیلسه
 ذکرین ایتیپ چهار ضرب اوروب سحر تورسه
 ایرانلاردین فیض فتوح توله آله
 سلطان بولوب دُر و گوهر ساچار دوستلار
 حق تعالی بویین آغان مونده تورمس
 دعوی قیلیب ایشانلیق نی لافین اورمس
 قایدہ بارسه فقیر مسکین دوکان قورمس
 غریب بولوب ویرانه غه کوجار دوستلار
 قول خواجه احمد نفس دین اولوغ بلا بولمس
 ییر و کوکدین طعمه بیرسنگ هرکیز توبمس
 تفراق اولوب ییرده یاتسنگ کافر اولمس
 نفسی اولکان حور غلمان قوجار دوستلار

حکایتده بیلینک مونداغ کیلتوردیلار
 "بابا ماچین" اول سلطاننی ییتکوردیلار
 خراسانده تورت یوز یاشنی یاشادیلار
 یکرمه تورت یغاچ هر کون اوچار دوستلار
 ایشتی "بابا ماچین" اول زمانده
 احمد آتلیغ بیر شیخ چیقمش ترکستانده
 صحبت قیلیمش قیز و جوان برلان انده
 منع ایتکالی ترکستانغه کیلدی دوستلار
 کیلدی ایرسه کوردیلار اول مشایخنی
 سین شیخ موسین آزغورغوچی خلایقنی
 اوشل آیغان کمراده دور من بیلکیل مونی
 تیو حضرت آنکا جواب بیردی دوستلار
 امر ایتیلار حکیم خواجه سلیمانغه
 اوشل صوف محمدی دانشمندغه
 باغلاب اورونک بیش یوز قمچی اول نادانغه
 بر ستونغه محکم باغلاب قویدی دوستلار
 یوز کشی کیلسه توتا بیلمس ایدی
 ایکی کشی توتوب آنی هم باغلادی
 اوشل دمده بیش یوز قمچی سیناب اوردی
 نه آد دیدی. نه واد دیدی، بیلینک دوستلار
 یلانکاچ قیلیب آنی باغلاب قویدی
 بیش یوزدین بیر قمچینی آرتوق اوردی
 بیر قمچی ده زار ییغلابان فریاد قیلدی
 انا احمد ییشتوروبان قویدی دوستلار

اوڭش دمدە مریدلاری قیلدی سؤال
 بیش یوز قمچی اورغانده یوق هیچ قیل و قال
 بیر قمچی نی اوردی ایرسه بولدی بیحال
 سر نیدور دیب اصحاب انده سوردی دوستلار
 اتا ایدی آرقاسیده دیو پری
 اورناب ایردی بیش یوز قمچی آنکا تیکدی
 دیو پری آرقاسیدین در حال کوچتی
 بیر قمچی سی آنکا تیکدی بیلینک دوستلار
 "بابا ماچین" اولدوم ایدی وا احمد
 کیلمسم رسوا بولوب خلقلار آرا
 اولایا ایردیم اوشبو حالت برلان منا
 زار ییغلابان عرض حالین ایتی دوستلار
 اتانینک ایرلیکی نی انده بیلدی
 ریاضت تارتقوزوبان یول کورساتی
 اتا برله اوچ مرتبه خلوت کیردی
 مراد مقصد پیردین ایرمیش بیلینک دوستلار
 مرشد بولمای هرکز مراد تابمادیلار
 خدمت قیلمای حقه واصل بولمادیلار
 زار ییغلابان کیچه بیدار بولمادیلار
 زار ییغلامای حق دیدارین کورمس دوستلار
 یاد ایتالوک قول "خواجه احمد" اولیانی
 مریدلاری "بابا ماچین" اول سلطان نی
 قوللاغایمو عاصی یوسف بیضاوی نی
 نظم ایلادیم بو حکایت بیلینک دوستلار

(۴۶)

حکمت

خضر بابام سالدی مینی اوشبو یولغه
آندین سونکره دریا بولوب تاشتیم دوستلار
شریعت نینک بازارینی سیران قیلدیم
معرفت نینک بوستانیده جولان قیلدیم
طریقت نینک پیشگاهنده طیران قیلدیم
حقیقت نینک ایشیکینی آچتیم دوستلار
الست خمرین پیر مُغان تويا بیردی
ایچار بیردیم مقداریم چه قویا بیردی
قول خواجه احمد ایچ و تاشیم کویا بیردی
طالب لارکا دُرّ و گوهر ساجتیم دوستلار

(۴۷)

حکمت

قایو مخلوق خالقیغه مطیع بولسه
عالم خلقی اوشل قولنی سویار دوستلار
یادین ایتیپ بغری پیشیب ایچی کویسه
دم اورسه سانسیز اوچقون اوچار دوستلار
تیلی کونکلی سری برلان ذاکر بولوب
اوج یوز آلتیش تمورلاری قانغه تولوب
یازی قیشین بلبل لارین واله بولوب
سیرایو شاخ دین شاخقه قونار دوستلار
بو کونکل بوستانیدور عجب بوستان
ایچنده سیراشورلار هزار دستان
کورونور هر شاخ اوزره تورلوك الوان
نعمت لارنی بیشکانینی کورار دوستلار

ظاهر نعمت شکرینی غافل بیلماس
 باطن داغین قیاس برله کورسه بولماس
 ظاهر کوزی غفلت برله باقیب کورماس
 ظاهر کوزی آچلسه اول کورار دوستلار
 باطن کوزی آچلسه جمله پرده
 آجلور کیتار. قالماس حجاب سرده
 جان نینک کوزی حیران بولور اوئل بیرده
 باقیب ایمان نوری برله کورار دوستلار
 قول "خواجه احمد سوی" نینک اوئشو سوزی
 عجب ایرمس باقیب کورسه سردین کوزی
 فنالیق مقامینده اوزنینک اوزی
 فنالیق ایچره باقیب کورار دوستلار

(۴۸)

حکمت

خوش غایب دین یتوشتی بر جماعه درویشلار
 باطینده "هو" - دیرلار سری پنهان درویشلار
 تینمای روان یورارلار تنسه تکبیر ایتورلار
 تابسه صحبت قورارلار خوش صحبت لیغ درویشلار
 جندهلاری پر صلاح تسبیح لاری الا الله
 خدمت قیلور هر صباح بلا خوردور درویشلار
 ژندهلاری کیرجفان کونکلیده یوز مینک ارمان
 اوئشو دنیا بی پایان کوزکا ایلمس درویشلار
 ژندهلاری ایکنیده، عصالاری ایلکیده
 ایزد یادی کونکلیده الله دیور درویشلار
 اصلی فقیر بیلسهلار وجود شهرین کیزسهلار
 ظاهر - باطن تورسهلار سعادتلغ درویشلار

مشايخ لار سراسرار خدمتیده بول زينهار
 پيغمبردين يادكار قالغان ترور درويشلار
 قول خواجه احمد مسكين بول، مسكين لاردين معنى سور
 درويشليكنى بيل حضور "هو" قوشيدور درويشلار

(۴۹)

حکمت

يول اوستیده اولتوروب يولنى سوركان درويشلار
 عقيددين خبر ايشتيب يولغه كيركان درويشلار
 عصالارى ايلکينده، همت قورى بيلينده
 ايديم يادى تيلينده الله ديكان درويشلار
 خرقلارى كيرچفان كونكليده يوز مينك عيان
 بيلينكز ايكي جهان كوزكا ايلمس درويشلار
 درويش حقنك منظوري ذكرى تورور كلزارى
 حقنى يادى اسرارى خوب ادبليغ درويشلار
 يازوقوم كوب يولاتمس اسباب داروسين تابماس
 كوزده ياشين قوروتمس ياشى اققان درويشلار
 سري برلان سوزلارلار تيلكا حكمت توزارلار
 عشق برلان جان كزارلار رنكى سريغ درويشلار
 ايت نفسيني اولدورور قيزيل يوزين سولدورور
 خواجه احمد قول بوتورور ساتيب يسون درويشلار

(۵۰)

حکمت

اون سيكز مينك عالمده حيران بولغان عاشقلار
 تابماي معشوق چراغين سرسان بولغان عاشقلار
 هر دم باشى اورگولوب كوزى حلقه تيلمروب
 "هو - هو" تيو جور كولوب كريان بولغان عاشقلار

کویوب، یانوب کل بولغان، عشقیده بلبل بولغان
 کیمنی کورسه قول بولغان، مردان بولغان عاشقلار
 یول اوستیده خاک بولغان سینهلاری چاک بولغان
 ذکرین ایتیپ پاک بولغان نالان بولغان عاشقلار
 همّت قورین باغلاغان یورک بغرین داغلاغان
 فریاد اوروب ییغلاغان کریان بولغان عاشقلار
 کاهی یوزی سارغایب کاهی یولیده غریب
 تسبیحلاری یا حبیب جولان بولغان عاشقلار
 احمد سین هم عاشق بول صدقینک برله صادق بول
 درکاهی کا لایق بول جانان بولغان عاشقلار

(۵۱)

حکمت

غریبلیغده غریب بولکان غریبلار
 غریبلار حالینی بیلکان غریبلار
 سبب برله یراق بیرکا باریبان
 قرینداش قدرینی بیلکان غریبلار
 سوساکانده سوکا محتاج بولغان
 تریکده زار اولوب اولکان غریبلار
 کشی بیلمس غریبلار حالی نیدور
 مکر بیلکای غریب بولغان غریبلار
 غریبلیغ قاتیغ ایشدور ای عزیزیم
 کیم اول بیقدر اولار مسکین غریبلار
 کیل ایمدی احمد اوزونکا باقغیل
 غریب سین سین غریب مسکین غریبلار

(۵۲)

حکمت

حق قول لاری درویش لار حقیقتنی بیلیمیش لار
حقه عاشق بولغانلار حق یولیغه کیرمیشلار
حق یولیغه کرکانلار الله تیو یورکانلار
ایرانلار ایزین ایزلاب مملکتدن دین کیچمیشلار
عالم فخری مصطفی انداغ ایدی مرجبا
معراج تونی ایتی فخر فقیر یولی نی آلمیشلار
کونکل بیرمای دنیاغه شروع قیلمای حرامغه
حقنی سویکان عاشقلار خلائق دین کیچمیشلار
دنیا مینیک دیکانلار جهان مالین آغانلار
کرکس قوشدیک بولوبان اول حرامغه باتمیشلار
ملا، مفتی بولغانلار ناحق دعوی قیلغانلار
آقنی قرا قیلغانلار اول تموغه کیرمیشلار
قاضی، امام بولغانلار نا حق دعوی قیلغانلار
اول حماردیک بولوبان یوک آستیده قالمیشلار
حرام یکان حاکملار رشوت آلیب یکانلار
اوز بارماقین تیشلابان قورقوب توروب قالمیشلار
تاتلیغ - تاتلیغ یکانلار تورلوك - تورلوك کیکانلار
آلتون تخت اولتورکانلار تفراق آستین قالمیشلار
مؤمن قول لار صادق لار صدقی برله تورکانلار
دنیا لغین صرف ایتیپ اوچماخ حورین قوچمیشلار
قول خواجه احمد بیلیمیش سین حق یولیغه کیرمیش سین
حق یولیغه کیرکانلار حق دیدارین کورمیشلار

(۵۳)

حکمت

هر حلقه‌سی قورولدی ای درویشلار کیلینکلار
حق سفردسی یایلدی آن‌دین اولوش آلینکلار
"قال" علمنی اوقوبان "حال" علم‌کا ییتیان
یوقلوق ایچره یاتیان بارلیقلاردین آلینکلار
یرتیب شفقت پرده‌سین تیلاب دیدار وعده‌سین
آچیب کونکل دیده‌سین مشاهدہ قیلینکلار
"هو" اَرده‌سین آلیبان نفس باشیغه سالیبان
تونى - کونى طالبلار جاننى قربان قیلینکلار
حلقه ایچره هو دینکیز عشق اوتیغه یانینکیز
تن جان برلان طالبلار تکبیر باشلاب ایتینکلار
"هو - هو" تیوزار اینکراپ "هو" دیمکده معنی بار
دیدارین امید وار رحمتیدین آلینکلار
قول خواجه احمد قول بولغان یول اوستیده کل بولغان
طالب لارغه مل بولغان اندین عبرت آلینکلار

(۵۴)

حکمت

قد علمنا انت فی کل امور
انت کافی، انت عافی، یا غفور
کافی فی الغیب هو من فی الحضور
انت کافی، انت عافی، یا غفور
مصطفی در حالت نزع ایردیلا
بیر کروهنی عاصی دیب قایغوردیلار
امتیم وای، امتیم دیب ایدیلا
انت کافی، انت عافی، یا غفور

بیزنی سویدی اوزکالارنی سویمدی
 هم اتا اناسی نی هم سویمدی
 یرلقادیم دیما گونچه قویمدی
 انت کافی. انت عافی، یا غفور
 حق تعالی دین ندا کیلدی آنکا
 امتینک اشین حواله قیل منکا
 جمله سین باغشلایین انده سنکا
 انت کافی. انت عافی، یا غفور
 ایدی مندین سونکره امت بولغوسی
 فرض و سنتنی قویوب فسق ایتکوسی
 اکثر امت دین ایمان کیتکوسی
 انت کافی. انت عافی، یا غفور
 امتیم امتلار ایچره صافی دور
 نیلایین کوبراکی عاصی، جافی دور
 قادریم اوز وعده سیغه وافی دور
 انت کافی. انت عافی، یا غفور
 مسکین احمد سین بو یازوق زهریدین
 قوتولونک ایچسنک شراب مهریدین
 کرچه کوب قورقوم الهیم قهریدین
 انت کافی. انت عافی، یا غفور

(۵۵)

حکمت

محمدنی بیلینک ذاتی عرب دور
 طریقتنی یولی کل ادب دور
 حقیقت بیلمکان آدم ایمس دور
 بیلینکز هیچ نیمه کا اوخشاماس دور

بیلینک بیچون ایرور هم بی چکونه
 و بی شبهه ایرور هم بی نمونه
 قهرلانس قیلور ییر برله یکسان
 بولادور زلزله ییر برله آسمان
 رحم قیلسه بیلینکیز رحمتی بار
 بیروور بولسه توکانمس نعمتی بار
 محمدنی صفت قیلسم کمینه
 آناسینی آتی بیلکیل امینه
 اتاسی آتی عبدالله ایکان دور
 آنادین توغمایین اولکان ایکان دور
 محمدنی باباسی ساقلان دور
 یلانکاج آچلارنی یوقلان دور
 باباسین بیلسنکیز عبدالمطلب
 کونکلده ساقلاکای سیزیخشی بیلیم
 باباسینی اتاسی ایردی هاشیم
 ایشیتکانده آقادر کوزده یاشیم
 بیلینک تورتونچی سی دور عبد المناف
 آلارنی بیلسه هرکیم کونکلی دور صاف
 رسولنی بیلسه هرکیم تورث پشترین
 قیامتده کزار سیکز بهشتین
 باباسی یتتی یاشیده اولوب دور
 رسولنی عمی سی کا بیریب دور
 ابوطالب علینی آته سی دور
 قاموغ اعرابی لارنی کاته سی دور
 ابوطالب بولادور ایش یاشیده
 محمد اولتورور دایم قاشیده
 محمدنی یاشی اون یتتی بولدی
 که اول وقتده خدیجه آنی کوردی

محمدنی بیلینک کیم مثل شونقار
 خدیجه آنی کوروب بولادور زار
 خدیجه کونکلیده آنی سویادور
 محمد عشقیده ایچی کویادور
 کیچه - کوندوز تیلار آنی خدادین
 بیلینکیز عاقبت تابتی مرادین
 کورونکیزلار خدانی شیوه سینی
 محمد باقغان ایکان تیوه سینی
 خدیجه غه رسول چاکر بولوبتور
 بو باعث برله بیل آنی آلیب دور
 خدیجه نی خدا بختین آجیب دور
 رسولنی باشیغه دُرلار ساجیب دور
 رسولنی یاشلاری قرقه یتیب دور
 که اندین سونک خدادین وحی اینیب دور
 که آندین سونک محمد بولدی پادشاه
 رسولنی کونکلیده یار بولدی الله
 محمدنی ایشین الله بیتوردی
 خلایق بارجه سی ایمان کیتوردی
 رسولنی باشیده بولدی عمامه
 کمال تابتی اوتوز اوچ مینک صحابه
 رسول غه بارجه سی خدمت قیلادور
 ادب برلان یوروب عزت قیلادور
 رسول آلدیغه بیر یتیم کیلیب دور
 غریب و مبتلا مین دیب ایتیب دور
 رحم قیلدی رسول آنی حالیه
 تیلکانین آنی بیردی قولیه
 رسول ایدی ایکامین هم یتیم مین
 یتیم لیکده، غریب لیغده یتیب مین

محمد ايدىلار هر كيم يتيم دور
 بيلينكلار اول ميني خاص امتيم دور
 يتيم نى كورسنگيز آغريتمنگيزلار
 غريب نى كورسنگيز داغ ايتمنگيزلار
 يتيملار بو جهانده خوار ايكاندور
 غريبلارنى ايشى دشوار ايكاندور
 غريبلارنى ايشى دايم سلوك دور
 تريك ايرمس غريب مثل اولوك دور
 خدايى غه غريبلار بيلكولوك دور
 غريب نى ايرته اخشام سوركولوك دور
 صفت قيلسام على شير خدادور
 كه شمشير برله كافرنى قرادور
 كافرلارنى قيلور ايمانغه دعوت
 برادور هر زمان اسلام كا قوت
 كه مؤمن بولغانين آليب كيلادور
 قبول قيلماغانين چاپيب كيلادور
 كه شمشير قولغه آليب مينسه دلل
 توشادور قوم كافرلارغه غلغل
 قوليدهكى يراغى ذوالفقارى
 چاپوشقاندە اوزالور قرق قارى
 على نى بار ايدى اون سيكز اوغلى
 آنى هر قايسىسى دور كاته توغلى
 على اسلام اوچون قانلار يوتادور
 كه اسلام توغىنى محكم توتادور
 "خواجہ احمد" بيل غريبليك كا توشوب دور
 رسول اولادىغه سوزلار قاتيب دور

(۵۶)

حکمت

کورکان زمان اینانکان ابابکر صدیق دور
اوستون یولوب تیانکان ابابکر صدیق دور
مونکلاشقانده ییغلاکان قوللوقغه بیل باغلان
ایچ بغری نی داغلان ابابکر صدیق دور
بیر قولیدین قیتماکان سرین هرکز ایتماکان
غافل بولوب یاتماکان ابابکر صدیق دور
جان جانانغه قاوشورکان قزین قولدین تابشورکان
قول قاوشوروب یالبارکان ابابکر صدیق دور
اینکان سوزیکا ییتکان نفس هوادین کیتکان
حق رسول نی برکیتکان ابابکر صدیق دور
محمدکا قین انا قیلکان ایمر هیچ خطا
بوینیغه سالغان پوطا ابابکر صدیق دور
قول "خواجه احمد" قیل تصدیق یار غارین قیل تفریق
عارف لیکده بیل صادق ابابکر صدیق دور

(۵۷)

حکمت

ایکنچی سی یار بولغان عدالت لیغ عمردور
مؤمن لیغده یار بولغان عدالت لیغ عمردور
بالانغه اذان ایتورکان شریعت نی بیلدورکان
دین سوزینی اوقتورکان عدالت لیغ عمردور
کعبه ایشیکین آچدرکان بارجه بتنی سندورکان
رسول کونکلین تیندورکان عدالت لیغ عمردور

شریعتنی پاس توتقان طریقتنی راست توتقان
 حقیقتنی خوب بیلکان عدالتلیغ عمردور
 اوغلین جرابلس کیلتورکان دره اوروب اولتورکان
 عدل قیلیب یول سورکان عدالتلیغ عمردور
 چراغ بولوب اوجماکان دین یولیدین یانماکان
 ناحق ایشنی ایتماکان عدالتلیغ عمردور
 مسکین "احمد" قیلکیل یاد قیلکیل عجزینکنی بنیاد
 شاید روحی شاد قیلکای عدالتلیغ عمردور

(۵۸)

حکمت

اوچونجی دوستی یار بولغان عثمان با حیادور
 هر نفسده یار بولغان عثمان با حیادور
 حق رسولنی دامادی دینمیزنی آبادی
 بندهلارنی آزادی عثمان با حیادور
 اوقوغانی شاطبی آیت حدیث کاتبی
 منبر اوزره خطیبی عثمان با حیادور
 مناجاتی کوه طور آغانلاری ایکی نور
 ایتکانلاری بارچه دُر عثمان با حیادور
 کوبلار کیلیب پیاده قویمادیلار شهزاده
 شهید قیلدیلار انده عثمان با حیادور
 توصیف قیلدینک عثماننی خواجه احمد سینانی
 یوقتور شک و کمانی عثمان با حیادور

(۵۹)

حکمت

تورتونچی سی یار بولغان شیر خدا علی دور
هم معراجده یار بولغان شیر خدا علی دور
ایتکان سوزی رحمانی کورسنگ یوزی نورانی
کافرلارنی قرآنی شیر خدا علی دور
همت قوری بیلیده مولیم یادی تیلیده
ذوالفقاری ایلکیده شیر خدا علی دور
منیب جیقسه دلدغه بیرکا توشار زلزله
کافرلارغه غلغه شیر خدا علی دور
دشمنلارکا مقابل بولدی کافرغه . قاتل
زایل قیلکان باطلنی شیر خدا علی دور
رحمت قیلکای بیر و بار هر نه قیلسه ایرکی بار
"خواجه احمدکا" مددکار شیر خدا علی دور

(۶۰)

حکمت

حکمت برلان اول عدم دین بار ایلادی
اون سکیز مینک قاموغ عالم حیران ایرور
"قالوا بلی" دیکان قوللار اولوش آلدی
سکوت ایتکان قوللار دینی ویران ایرور
حق تعالی ایمان عطا قیلدی بیزکا
اول مصطفی رسولی ایدی بیزکا
درود ایتسک قوّت برور دینمیزکا
یوق ایرسه قیلغانلاریم یالغان ایرور

اول "اَلَسْتُ بِرَبِّكُمْ" دیدی خدا
 "قالوا بلی" دیان روح لار قیلدی صدا
 ییغلاب کیلدوک ایشکینک کا جمله کدا
 لطف ایلاسنگ یوزمینک عاصی خندان ایرور
 توبه قیلسام کیچارمو کین قادر اله
 یوق ایرسه نیتکوم انده مین رو سیاه
 تانکلا بارسام ایلیک آیاغ بارچه کواه
 حق قاشیده برجه ایشلار آسان ایرور
 ییغلامیمو اوتی عمروم ایا شاهیم
 قسب کیلدی قرانغولوق چیقیل ماهیم
 سندین اوزکا یوق پناهیم. تکیه گاهیم
 کیچه - کوندوز تیلاکانیم ایمان ایرور
 امت اوچون رسول دایم قایغو یددی
 تیلاب امت کناهی نی حقدین آلدی
 کیچه - کوندوز قایم توردی تنکریم بیلدی
 تیلده امت مین دیر دلدہ یالغان ایرور
 امت بولسنگ مصطفی غه پی رو بولغیل
 ایغانلارین جان دلدہ سین هم قیلغیل
 کیچه قایم کوندوزلاری صایم بولغیل
 چین امت نی رنکی مثل سامان ایرور
 سنتلارین محکم توتوب امت بولغیل
 کیچه کوندوز درود ایتیبت الفت بولغیل
 نفس نی تیغیب محنت یتسه راحت بیلکیل
 انداغ عاشق ایکی کوزی کریان ایرور
 قول "خواجه احمد" نفس دین مدام سوا بولغیل
 کویوب پشیب دردی برلان ادا بولغیل
 کیچه - کوندوز تینمای ییغلاب کدا بولغیل
 دردین تارتسنگ خواجه سیندین رضا ایرور

اوشبو سرنی بیلماکان جاہل کشی
 درویشلارنی قدرینی قاچان بیلور
 تیل اوچیده امت مین دیب دعوی قیلور
 مصطفیٰنی قدرینی قاچان بیلور
 طریقتنی لذتی دین تاتقان کشی
 دنیا سنی دین یولیده ساتقان کشی
 کیچه - کوندوز کوزده یاشی آققان کشی
 بو دنیانی قدرینی قاچان بیلور
 کیچه - کوندوز طاعت قیلسه اوشال عاشق
 بو دنیاده کناهی دین بولور فارق
 درویشلارنی غیبت قیلغان اول منافق
 معرفتنی قدرینی قاچان بیلور
 دنیا مالین ییغیب یولنی یتورکانلار
 ایسز عمرین کفر ایچینده کیچورکانلار
 قلاوزسیز بیابانده یوروکانلار
 محبتنی قدرینی قاچان بیلور
 کوب کیشیلار دعوی قیلور نفس کوزاتیب
 ییب ایچیب حیوان کبی تونلار یاتیب
 روزه توتمس زکوة بیرمس هم او یاتیب
 حق تعالی قدرینی قاچان بیلور
 کل متقی آل مین دیب ایدی رسول
 ای قول "احمد" بو حدیثنی قیلغیل قبول
 سویری خلقی قبول قیلمای بولدی ملول
 جاہل خلقی پیر قدرینی قاچان بیلور

(۶۲)

حکمت

عارف عاشق جان ملکیده الم تارتسه
اون سیکز مینک قاموغ عالم غلغل بولور
کونکل قوشی شوق قناتین توقوب اوچسه
جمله وجود یادین سیرار بلبل بولور
محبتنی میدانغی اوزین سالسه
معرفتنی میدانغی اوزین اورسه
سر شرابین ایچیپ عاشق روحی قانسه
مودتنی کلزاریده خوش کل بولور
ایرانلار حق یادی دین غافل بولماس
"رجال لا تلهيهم" دیر خالق الناس
ایران یولین توتقان هرکز یولده قالماس
اول حضرتده سر اسراری مقبول بولور
"الست" خمیرین کیمکا بیرسه اوشال ساقی
بلا مدام ایچیپ اسرو منکو باقی
تنین، جانین کویدوروب شوق احراقی
ایچیدین کویار یاقیلور هم کل بولور
ظاهرین آتی برلان بزه کانلار
باطنلارین آتی برله توزه کانلار
شوق اوتی نی ایچ کونکل کا کیزا کانلار
ماسوی برلان قاچان مشغول بولور
طریقت دور بو یول آتین بیلسه درویش
معرفتنی متاعیدین آلسه درویش
اوزکا یوللار باد هوا سانسه درویش
حقیقتنی میدانیده ایر اول بولور

قاتیغ لانیب قول "خواجه احمد" یولغه کیرکیل
 قولنی کورسنگ قولی بولوب معنی سورکیل
 یا الهیم روزی قیلسه معنی آلکیل
 معنی سوراب معنی آغان چین قول بولور

(۶۳)

حکمت

سبحان ایدیم بنده سیغه لطف ایلاسه
 ایچی یاروب تاشی کویوب بریان بولور
 پیر ایتاکین توتوب عاشق یولغه کیرسه
 حقنی ایزلاب ایکی کوزی گریان بولور
 جاندین کیچمای عشق سرینی بیلسه بولماس
 مالدین کیچمای من - من لیکنی قویسه بولماس
 سومی بولمای یالغوز اوزین سویسه بولماس
 انداغ عاشق ایل کوزیدین پنهان بولور
 جانینک قیناب زقوم چیناب عاشق بولکیل
 یاشینک توکوب کوزونک سولاب صادق بولکیل
 اندین کین درکاهی غه لایق بولکیل
 جانینک بیرسنگ رحم ایلاسه جانان بیلور
 عشق یولیده کیچه - کوندوز ییغلاغانلار
 جاندین کیچیب بیلین محکم باغلاغانلار
 خدمت قیلیب حق سرینی آنکلاغانلار
 تون اویقونی حرام قیلیب نالان بولور
 وا دریغا عشق یولیده جانم بیرمای
 غواص بولوب دریا ایچره کوهر تیرمای
 حقدین اوزکا غفلت لارنی یراق سالمای
 تانکلا بارسه ندامت لار چندان بولور

عاشق بولسنىك بايزيدديك اوزونك ساتقىل
 واللّه. باللّه دنيا حرام تاشلاب آتقىل
 قانلار توكوب كوزلارينكىدىن تونلار قاتقىل
 بير لحظه ده شيطان ملكى ويران بولور
 تانك آتقونچه ذكرين ايتكىل جانينك برله
 تاغ - چولنى بستان قىلكىل قانينك برله
 تاشدين قاتيغ تاشقه ياتقىل يانينك برله
 يولدين آرغان يوزمينك غافل مردان بولور
 تاشدين قاتيغ تاشنى سوزكان بى خبرلار
 عقبى ايشين آرقة تاشلاب دنيا ايزلار
 آيت - حديث بيان قىلسام قاتيغ سوزلار
 ظاهر آدم باطنلارى شيطان بولور
 ذكرين آيغىل قانلار آقسون سوزلارينكىدىن
 حكمت آيغىل، درلار تامسون سوزلارينكىدىن
 كللار اونسون هر بر باسقان ايزلارينكىدىن
 كل كا باقسنىك كل آچىلىب بوستان بولور
 سحرلارده ايرته توروب قانلار يوتكىل
 پير مغان ايتاكىنى محكم توتكىل
 حقه عاشق بولغان بولسنىك جاندين اوتكىل
 جاندين كيچكان چين عاشقلار عريان بولور
 بو دنياده فقيرلىقنى عادت قىلكان
 خوارلىق تارتىپ مشقتنى راحت بىلكان
 قول "خواجه احمد" يخشىلاركا خدمت قىلكان
 قيامت كون انداغ كشى سلطان بولور

(۶۴)

حکمت

تجلی نی مقامی دور عجب مقام
اول مقامه عاشق قول لار جولان قیلور
قی کونکل کا تجلی سین پَرْتُو سالسه
بیخود بولوب اوزین بیلماي افغان قیلور
اول مقام نی یول لارینی رهزنی بار
قلاوزسیز یولغه کیرسه یولدین آزار
وسواس ایلاب شیطان لعین دینین بوزار
اوز یولغه سالیب آنی حیران قیلور
اول مقام نی بیلدورکالی رهبر کراک
طریقتنی بیشه سیده صفدر کراک
اوشبو یولنی ضبط ایلاکان سرور کراک
انداغ مرشد اوجماق ملکین طیران قیلور
اول مقام غه ییتکان عاشق شراب ایچار
خانمانین بریاد بیریب جاندین کیچار
شوق قناتین حضرت تبا توقوب اوچار
عرش، کھسی، لوح، قلم طیران قیلور
دیدار تیلاب ترک ایلاسنگ ماسوانی
اولماس بورون وجودینکنی ایلا فانی
"وَأَنهَارٌ مِّنْ عَسَلٍ مُّصَفًّی"
اوجماخنی خاص قولی غه احسان قیلور
اول مقام نی توحید آتلیغ درختی بار
سایه سیده عاشق قول لار براق سوار
هر بر شاخی مینک ییل چیلیق یولنی توتار
هر قایسی سی اوز اوزیکا عنوان قیلور

اول درخت نی میوه سیدین تاتقان قول لار
 دنیاسینی آخرت قه ساتقان قول لار
 کور ایچنده آسایشده یاتقان قول لار
 سحرلارده کوز یاشینی عمان قیلور
 همت قورین قول "خواجه احمد" بیل کا باغلا
 محبت نی اوتی برله یورک داغلا
 یقام توتوب تانک آتقونچه تینمای یغلا
 شاید سنکا رحم ایلابان جانان قیلور

(۶۵)

حکمت

محبت سیز خلایق دین هر کیم قاچسه
 عارفلارنی صحبتیدین جولان قیلور
 اورتاب کویوب عشق یولیده یاشین ساچسه
 سبحان ایکام عرش اوستیده مهمان قیلور
 بندم دیکای کویکان لارنی سویوب الله
 حق کورسانکای دیدارینی والله، بالله
 قایده بارسه تسبیح لاری "شیئاً لله"
 هر نه تابسه حق یولیده احسان قیلور
 ذاکر بولوب ذکرین ایتسه کیلکان ندا
 شیطان لعین یتیمیش فرسنگ بولغای جُدا
 دردی بولسه حق درد یغه بیرکای دوا
 انداغ قولنی اوزی ایزلاب جانان قیلور
 تون سحرلار حق اویغاتیب قان ییغلانار
 بیدار قیلیب اوز عشقی غه بیل باغلانار
 دواسی یوق دردنی بیریب زار اینکراتار
 مونده ییغلاب انده بارسه سلطان قیلور

حقہ عاشق بولغان قوللار دايم بیدار
 رضوان ایماس مقصودلاری ایرور دیدار
 اهل عیال خانماندین بولور بیزار
 اسماعیل دیک عزیز جانین قربان قیلور
 دیوانه ژولیده مو حقنی تابقان
 شمشیر حق قولغه آلیب نفسنی چابقان
 قایدہ بارسه کوزنی یوموب سرنی تابقان
 انداغ سرنی تابقان کشی مردان بولور
 شیخ مین تیو باش کوتارکان حقہ رقیب
 من لیک قیلیب سبھانی غه بولماس حبیب
 بیدار بولوب دردسزلارکا بولغان طبیب
 بو دنیانی مؤمنلارکا زندان قیلور
 ای مؤمنلار طاعت قیلیب طایانمنک لار
 امانت دور عزیز جانغه اینانمنک لار
 حرام حریش ییغمیش مالغه اینانمنک لار
 ماللارینکنی قریش آتلیغ ییلان قیلور
 بو دنیاغه بنا قویغان قارون قانی
 دعوی قیلکان فرعون بیلہ هامان قانی
 وامق، عذرا، فرهاد، شیرین، مجنون قانی
 قهر ایلاسه بیر لحظه ده یکسان قیلور
 هیچ بیلدینکمو آدم اولمای قالغانی
 بو دنیانی وفاسینی بیلکانی
 دنیا طلب بوی خدا آلقانی
 الله دیسنک کوز یاشینکنی باران قیلور
 عشق دردیغه دوا سورغان حاضر تیلہ
 ظاہردہ یوق باطن ایچرہ قیلور جلوہ
 مغز سرینک بغرینک ایچرہ قیلور غلبہ
 عشق دردیغه دوا قیلسه رحمن قیلور

كيمن كورسنگ بو يول لارده يالغان عاشق
 ظاهر صوفى باطن ايچره ايرماس صادق
 انينك اوچون معشوقيغه بولماس لايق
 يالغانچىنى روز محشر سرسان قيلور
 تن سوزلامس، جان سوزلامس ايمان سوزلار
 جاندين كيچكان چين عاشقلار حقنى كوزلار
 عارفلاركا خدمت قيليپ يولين توزلار
 اول عاشقنى خلايققه سلطان قيلور
 عاشق بولسنگ كيچه - كوندوز عشق استاكيل
 طاعت قيلكيل كيچه قوپوب هيچ ياتماكيل
 عاقل بولسنگ نادانلاركا سن ايتماكيل
 چين درويشلار طاعتلارين پنهان قيلور
 درويش بولسنگ طاعت قيلكيل قيلمه ريا
 هر كوشه ده طاعت قيليل تنكريم كواه
 يالغان درويش قايدە بارسه رزق و دعا
 عادل پادشاه طاعتلارين عصيان قيلور
 وای اوشنداغ درويشلاردین پناه بيركيل
 اول نادانغه الفت قيلماي جانيم آلكيل
 ايا محبوب يولده قالديم يولغه سالكيل
 توبه ليقنى خواجم جاين بستان قيلور
 درويش مين ديب طاعت قيلور خلق ايچنده
 ريا قيليب يوكوروب يورار انده مونده
 الله اوچون طاعت قيلكان درويش قنده
 چين درويشلار تاغ - چولنى مكان قيلور
 عاشق بولسنگ عشق يولیده فنا بولكيل
 ديدار ايزلاب حسرتیده ادا بولكيل
 مرهم بولوب چين دردليك كا دوا بولكيل
 خلق خوشنى جان آلورده آسان قيلور

عاشقلاری حقه باقیب نعره تارتار
 محبتنی دریاسیغه چوموب باتار
 کوهر آلیب معشوقیغه رازین ایتار
 قطره یاشی بیرکا تامسه عمان قیلور
 عاشقلارکا بیردی عشقین کویلدورکالی
 زیخادیک قدین دوتا قیلدورکالی
 ریاضتده رنک - رویین سولدورکالی
 چین عاشقنی رنک - رویین سامان قیلور
 عاشقلاری حق قهریدین قورقوب تترار
 پیر و کوکده ملایک‌لار بیغلاب تورار
 کاهی قیزیل، کاهی سریغ بولوب یوزار
 ناله قیلیب پیر و کوکنی لرزان قیلور
 عاشقلارنی خاص معشوقی سحر خیزلار
 ندا قیلکای یا عبدی دیب باطن کوزلار
 عشق شدتی طغیان قیلسه دردی زورلار
 قایده سیندیپ یورک بغرین بریان قیلور
 قایده سیندیپ، قایده‌سین دیب عاشق ایتار
 عاشقلارده حدنه بولغای معشوق ایتار
 آغزی ایتمس، تیلی ایتماس دلی ایتار
 اوج یوز التمیش تمورلاری لرزان قیلور
 عاشقلارنی قیامت کون حالین سورکای
 چین عاشقنی کوکسین یاریب داغین کورکای
 پاک آغزیدین کفکی آقیب یوکروب یورکای
 کیمکا بیرسه پاک عشقنی حیران قیلور
 عاشقلارنی، طلب‌لاری جام شراب
 معشوقیغه یتماک اوچون بغری کباب
 روح‌لارینی غذاسی دور چنک، رباب
 آهی چیقسه یتتی اقلیم ویران قیلور

قدرت برله هر نه قیلسه ایرکلیک اوزی
 قدرتیدین معلوم تورور قیش و یازی
 ای نا انصاف الله بیله قیلمه بازی
 قهار ایکام جانلیغ لارنی بیجان قیلور
 ییغلامقنی هر آدم غه بیرکان قانی
 ییغلاماقلیغ آسان ایماس بغرقانی
 کوز یاشینکنی ریا قیلمه حقنی تانی
 حق تعالی سویکان لارنی کریان قیلور
 قول "خواجه احمد" بندهمین دیب اورمکیل لاف
 ریا برلان قیلغان طاعت بارجه کذاب
 شریعتده طریقتده کارینک خلاف
 آخرتده کذابلارنی عریان قیلور

(۶۶)

حکمت

محبتنی بوستانیده هزار داستان
 بلبل لاری سیرار انده افغان قیلور
 معرفتنی میدانیده جولان قیلغان
 کیچه - کوندوز کوز یاشینی عمان قیلور
 اول بلبلنی آوازینی ایشکانلار
 تکبرنی تاغین کسیب اوشاکانلار
 بو دنیانی مزاسینی اونوتقانلار
 فریاد اوروب ییغلاب کوزین کریان قیلور
 عاشق قوللار بو دنیانی کوزکا ایلماس
 دنیا عشقین زاهد قوللار تیلکا آلماس
 کیچه - کوندوز مست و حیران اوزکا کیلماس
 دیدار تیلاب کوکسین تیشیب نالان قیلور

وا دريغا كيچتى عمروم تويمای قالديم
 راحله سيز يولغه كيريب هاريب قالديم
 همت قورى بيل كا محكم چاليب آلديم
 اوزى سويكان عاشق لارين سرسان قيلور
 ايا عاشق كيچه - كوندوز تينماي ييغلا
 كويوب پشيب يورك بغرينك ايزيب داغلا
 اجل ييتسه مردانه وار بيلينك باغلا
 مونداغ عاشق بارسه انده مهمان قيلور
 شيخ منصور اوز باشيني دارد كوردى
 پرتو سالدى حق ديدارين انده كوردى
 بيخود بولوب اوزين بيلمای افغان قيلدى
 واشوقا ديب اوزين بيلمای جولان قيلور
 شيخ شبلى عاشق بولوب بيلمای اوتى
 شيخ بايزيد ييتميش يولى اوزين ساتدى
 بو دنيانى عزت لارين تاشلاب آتى
 اوتكان ايشقه ندامت ديب افغان قيلور
 انداغ ايرلار صحبتى نى تابقان كيشى
 مست و حيران بولوب يورار ياز و قشى
 سحرلارده چار ضرب اورمق آنى ايشى
 ظاهر خنده باطن لارين پنهان قيلور
 مونداغ بولماي حق وصلی غه ييتيب بولماس
 رسوا بولماي سردين معنى آليب بولماس
 "هو" ذكرينى ايتيب دايم تيلدين قويماس
 وهمى برلان دل لارينى لرزان قيلور
 قول "خواجه احمد" بو حكمت نى كيمكا ايدينك
 عارف مين ديب خلايقغه اوقوب يايدينك
 تأثير قيلماس عالم لارغه ايغان پندينك
 عارف اولدور تن ملكى نى ويران قيلور

(۶۷)

حکمت

محبتنی دریا سیده غواص بولوب
معرفتنی کوه رینی آغوم کیلور
طریقتنی میدانیده پرواز قیلیب
اول طوبی درختی غه قونغوم کیلور
اول طوبی درختی نی ایکسه بتماس
الله دیکان عاشق قول دین تقصیر کیلماس
چین عاشق ایران هرکز یولده قالماس
عاشق بولوب الله یادین ایغوم کیلور
عاشق قول لار حق یادی دین خالی ایماس
حقیقت لیغ بو دنیا غه میل قیلماس
چین عاشق لار دنیا عقبین هرکز آلماس
من تقی بو دنیانی قویغوم کیلور
تجلی نی نوری برلان عقلی شاشقان
الله تیو کونکل باغلاب طور غه آشقان
محبتنی اوتی برلان قیناب تاشقان
من تقی الله تیو بارغوم کیلور
الله یادی کونک لارنی قیلدی خرم
بلخ ملکی نی تاشلاب کلیم کیدی ادهم
کلیم کیب هدایت کا اوردی قدم
هدایت کا انداغ قدم اورغوم کیلور
کلیم کیکان اول عزیزلار حقه یاقار
جون سرلاری دوکان ایچره حقنی تاپار
آه لاری دین تلیم تاغلار سیزیب آقار
سلیم بولوب اول کلیمنی کیکوم کیلور

سلیم بولوب صاف بولدی جنید شبلی
 نفسین تیغیب قهر قیلدی حسن بصری
 خلقنی قویوب فنا بولدی ذو النون مصری
 عزیزلارکا متابعت قیلغوم کیلور
 الله یادی تکبرنی اویین بوزدی
 مشایخلار بو حلقهنی کورکلوک توزدی
 چون "هو" دیدیم معصیتلار توزکا توزدی
 من هم تقی اول حلقهده بولغوم کیلور
 شوق شرابین ایچتیم ایرسه قیلدی خراب
 محبتنی اوتی برلان بغریم کباب
 دیدارینی روزی قیلسه ایذیم وهاب
 دارالسلام سراییغه کیرکوم کیلور
 قول "خواجه احمد" کوهرینکلیغ حکمت ایدی
 عزیزلارنی مدح برلان سوزین یایدی
 اوزون توننی کونکا اولاب قیام توردی
 دعا اوقوب روان حکمت ایغوم کیلور

(۶۸)

حکمت

قایو بیرده عزیزلارنی جمعی بولسه
 اوشال بیرده حال علمینی ایغوم کیلور
 آلارنی صحبتینی خوشلاسّم مین
 اوزومنی اوزلاریغه قاتقوم کیلور
 خوش صحبتلیغ درویشلارکا جانیم بیرسام
 هر بر باسقان ایزلارینی کوزکا سورسام
 خدمت قیلیب بخشیلاردین دعا آلسام
 اندین سونکرده شوق شرابین تاتقوم کیلور

شوق شرايين ايچكان قیلور دنیا طلاق
 خضر بابام کیلیب آنکا ییروور سباق
 دنیا تیغیب قیلیب یورکیل یوز مینک طلاق
 شونداغ ایرکا عزیز جانیم بیر کوم کیلور
 وا دریغا خوبلار همه ییغلاب اوتی
 اناسیدین توغدی ایرسه ماتم توتی
 کوزوم یوموب تا آچقونچه عمریم اوتی
 بو دنیانی پوچک یلغه ساتقوم کیلور
 تیلی برله امت مین دیب یالغان سوزلار
 کیشی مالین آلماق اوچون هزیان سوزلار
 حلالی نی مونده تاشلاب حرام کوزلار
 نادانلارغه بو سوزلارنی ایغوم کیلور
 زمانه آخر بولسه عاقل کیتکای
 آدم اوغلی بر - برینی توتوب ییکای
 دنیا اوچون ایمان اسلام دینین ساتغای
 عاقللارغه بو سوزلارنی ایغوم کیلور
 ملائک لار ییغلیب بر کون صحبت قوردی
 رقص سماع اورمق اوچون یوکوروب یوردی
 معراج اوزره حق مصطفی مونی کوردی
 ایمدی مین هم رقص سماع اورغوم کیلور
 حق مصطفی بیخود بولوب اوزدین کیتی
 جبریل کیلیب حق مصطفی باشین توتی
 سبحان ایکام قدرت بیلان ذکر اورکاتی
 امت بولسام مین هم ذکرین ایغوم کیلور
 عاشق بولسنگ کوز یاشینکنی ساچیب یورکیل
 بایزیددیک دنیا عقبین تیغیب یورکیل
 ادهم صفت تخت بخت دین کیچیب یورکیل
 همت بیرسنگ دنیا عقبین تبکوم کیلور

قول "خواجه احمد" دنيا كورسنىڭ زىنھار قاقچىل
 ذكرين ايتىپ طريقتنى يولین آچقىل
 آیت - حديث سوزى برله دینار ساچقىل
 ایرانلاردین دُر و کوهر آغوم کیلور

(۶۹)

حکمت

محبتنى بوستانىغە بلبل کىي
 سحرلارده ناله ايلاب قونغوم کیلور
 اوشل وقتده الهيمنى جمالىنى
 معنى کوزى برله عيان کورکوم کیلور
 مردان ايرور حق يولينى باشچىلارى
 مرید برله خدا آرا ایلچىلارى
 وحدانيت درياسىنى يولچىلارى
 آستانهده باریب دربان بولغوم کیلور
 حق وصالین تیلکانلار تونى - کونى
 تینمای جانی برله ایتور ذکر "هونى"
 حقدین الهام یتیب کیلور بیلسنک مونى
 آخرتنى آزوقىنى آغوم کیلور
 مودتنى عصاسىنى الکا آلیب
 سعادتنى خرقةسىنى تنکا سالیب
 محبتنى یونكى برلان قناتلانیب
 معرفتنى بوتاغىغە قونغوم کیلور
 ایرانلار بارچه باروب بولدى مزار
 قاتیغلانیب ای دوستلاریم بولکیل بیدار
 موسی صفت طور تاغیده کوروب دیدار
 "رَبِّ أَنْظِرْ إِلَيْكَ" دیب ایغوم کیلور

وا دریغا ایسز عمروم بیردیم بیلکا
 عبادتدین هیچ نیمه یوق باقسم قولکا
 قوللوق قورین کیچ باغلادیم ایمدی بیلکا
 همت قیلیب پیر خدمتین قیلغوم کیلور
 قول "خواجه احمد" دون اهللی دین بیل ایرمس اول
 ریاضت سیز هیچ عالمین کور گوزمس اول
 الله دیمک مؤمن قولغه عار ایمس اول
 حق یادیغه جانیم قربان قیلغوم کیلور

(۷۰) حکمت

ایا دوستلار عشق غواصی بولماکونچه
 وحدانیت دریاسیغه کیرسه بولماس
 اول دریانی کوهریدور حق وصالی
 جاندین کیچیپ کیرمکونچه کورسه بولماس
 همت قورین جان بیللیغه محکم چالما
 ماسوانی محبتین اوزدین سالمای
 کوز یاشینی نیاز ایلاب رازین ایتما
 اسرار یولین مردان لاردین بیلسه بولماس
 "يُجِبُّهُمْ" شرابی نی ایچماکونچه
 "وَيُحْيِيهِمْ" لباسینی کیماکونچه
 ریاضت نی پوته سینی بوغماغونچه
 حق جمالین مرادینچه کورسه بولماس
 "لِي مَعَ اللَّهِ" مقامیغه بارماکونچه
 "أَنْ تَمُوتُوا" سرايغه کیرمکونچه
 "فَنَّا فِي اللَّهِ" دریاسیغه چومماغونچه
 "بقا بالله" کوهریدین آلسه بولماس

شریعت نی سلاحی نی کیماکونچه
 طریقت نی براقی غه مینماکونچه
 جذب جنون عالمی غه بارماکونچه
 حقیقت نی میدانی غه کیرسه بولماس
 مردانلارنی مرادی دور حق دیداری
 حق دیداری کیراک بولسه بول بیداری
 قول "خواجه احمد" سحر وقتیده قیلغیل زاری
 بیدار بولمای حق جمالین کورسه بولماس

(۷۱)

حکمت

ایا طالب جفا چیکیب یولغه کیرکیل
 جفا چیکمای یولغه کیرسنگ وفا بولماس
 جفا چیکمای آخرتده یوقتور راحت
 جفا چیکمای کوزونک یاشی ضیا بولماس
 کیمنی کورسنگ قولی بولوب خدمت قیلکیل
 رحم ایلابان غریبلارکا شفقت قیلکیل
 عالم لار کیلسه توروب عزت قیلکیل
 نا جنس لارده ذره هرکز وفا بولماس
 غریبلارکا رحیم قیلماق رسول ایشی
 غریبلارنی کورکان بیرده آقار یاشی
 غریبلارکا کویار دایم ایچی تاشی
 غریبلارنی دعاسیدیک دعا بولماس
 مدینه کا رسول باریب بولدی غریب
 غریب بولوب حقه آخر بولدی قریب
 رحمن ایکام دیدارینی قیلدی نصیب
 چین دردلیک کا غریبلیک دیک دوا بولماس

امت بولسنىك حق رسولغه تابع بولكىل
 اتى چىقسە درود ايتىب تعظيم قىلكىل
 غريب بولوب غريبلار دين معنى آلكىل
 غريب بولكىل غريبلاردىك كدا بولماس
 غريبلارنى كوركان ييرده آغرىتمىنكىز
 غريبلارغه آچىغلانىب سوز قاتمىنكىز
 ضعيف كوروب غريبلارغه تاش اتمىنكىز
 بو دنياده غريبلىك دىك بلا بولماس
 شامغه توشوب غريب بولدى حكيم اتا
 يىغلای - يىغلای قدى آنى بولدى دوتا
 ايزىم قىلكاى جمله قولغه ايمان عطا
 چىن غريبنى قدى هرگز دوتا بولماس
 تركستانده غريب بولدى قول خواجه احمد
 آنىك اوچون حق رسولغه بولدى امت
 ايچمىش، يىمىش نعمتلارى قايغو محنت
 تن پرستدين حق تعالى رضا بولماس

(۷۲)

حکمت

عشق دعوى سين قىلكان عاشق كريان بولور
 بو دنيانى غربتىدين اولسه بولماس
 هوشى كىتىب بغرى آنى بريان بولور
 حيا كىتىب پردهسىنى ترسه بولماس
 بو دنيانى عشرتىدين كيچكان كشى
 بيخود يورار تىنماي آقار كوزدين ياشى
 واله بولوب حيران يورار ياز و قىشى
 وحشى يىنكلېغ ايلدين چقار يورسه بولماس

کیچه - کوندوز کوزده یاشین ژاله قیلکان
 فریاد اوروب سحرلارده واله بولکان
 کوکسین تیشیب چار ضرب اوروب ناله قیلکان
 مونداغ ایرنی درکاهیدین کیتسه بولماس
 کیچه توروب یرمای تینمای ییغلاکانلار
 عشق اوتی‌عه یورک بغرین داغلاکانلار
 رسوا بولوب سردین معنی انکلاکانلار
 خلق ایچیده رسوا بولوب یورسه بولماس
 الله یادین ایتیب یوروب زاری قیلکان
 کوزده یاشین آقوزوبان جاری قیلکان
 سرسان بولوب قباب برله یوروش قیلکان
 آنداغ ایردین جدا بولوب یورسه بولماس
 عاشقلاردای دایم مدام حقنی ایزلار
 ظاهر یوزوب باطننده عرشنی کوزلار
 طالب‌لارکا آیت حدیث سوزین سوزلار
 سر سوزینی نادانلارغه ایتسه بولماس
 قایده بارسه عشق دوکانین انده قوردی
 لیلی مجنون بو دنیانی دورین سوردی
 شیخ منصور انا الحق دیب غوغا قیلدی
 آنداغ عاشق بولدی کورونک بشر حافی
 ایر اول ترور وعده‌سیده بولسه وافی
 وفا قیلکان ایرانلاردین یانسه بولماس
 سردین معنی تویماکانلار بیکانه‌دور
 اول عاشقلار مکانلاری ویرانه‌دور
 قایده بارسه همخانه‌سی جانانه‌دور
 تونلار قویمای عاشق مین دیب یورسه بولماس

غواص بولمای کوهر اوچون دریا چومماس
 جاندین کیچمای جومغونچه هرکز آلماس
 بیر قطره‌غه قانع بولمای اول در بولماس
 قانع بولمای شوق شرابین ایچسه بولماس
 قول "خواجه احمد" لاهوت ارا مقام توتمای
 "فنا فی الله" مقامیدین ییلیب اوتمای
 پیر مغان قطره‌سیدین جرعه یوتمای
 "لی مع الله" مقامی‌غه یتسه بولماس

(۷۳)

حکمت

معرفت‌نی منبریغه مینماکونچه
 شریعت‌نی ایشلارینی بیلسه بولماس
 شریعت‌نی ایشلارینی ادا قیلمای
 طریقت‌نی میدانی‌غه کیرسه بولماس
 طریقت‌ده تورلوك ادب بیلماکونچه
 نفسی برله محاربه قیلماکونچه
 عشق یولیغه اوزین لایق ایتماکونچه
 حقیقت‌نی سرلارینی بیلسه بولماس
 شریعت‌ده مراد اولدور یولغه کیرماک
 طریقت‌ده مراد اولدور نفسدین کیچماک
 حقیقت‌ده عزیز جان‌نی فدا قیلماک
 جاندین کیچمای عشق شرابین ایچسه بولماس
 بو ریا بولمای شیخ مین دیان دعوی قیلکان
 اوزی قیلمای خلق‌لار آرا وعظین ایغان
 سوزی یالغان دنیا اوچون عمل قیلکان
 دنیا قویمای حال علمی‌نی بیلسه بولماس

ایرانلار اوشبو یولغه قدم اوردی
 مجاهده مونکی برله عمل قیلدی
 مکاشفه باطن ایچره معلوم بولدی
 مونداغ بولمای درکاهی غه ییتسه بولماس
 نی عمل دور ایرمن تیو دعوی قیلماق
 سجاده‌نی خلقلار آرا تورکا سالماق
 اوزی بیلمای بو معنی کا نفسین اورماق
 غواص بولمای در کوهرنی آلسه بولماس
 وحدانیت کیمه‌سینی سرین بیلمای
 عشق اسرار سوزلاریدین خبر آلمای
 تجرید، تفرید ایشلارینی ادا قیلمای
 او توحیدنی میو‌سیدین آلسه بولماس
 قول "خواجه احمد" تجرید، تفرید امید قیلغیل
 مصطفی‌نی سورلاریغه عمل قیلغیل
 توبه دیبان تونلار قوبوب زار اینکراکیل
 زار ییغلامای دیدارینی کورسه بولماس

(۷۴)

حکمت

محبت‌نی دریاسیغه جوماغونچه
 ای دوستلاریم عشق کوه‌رین آلسه بولماس
 تانک آتقونچه فریاد اوروب زار اینکرامای
 صراف بولوب عشق دردینی بیلسه بولماس
 عشق دردینی بیلکان کیشی دنیا تبار
 ایرانلارنی ایزین آلیب تینمای اوپار
 محبت‌نی شوقی برلان یاشین سبار
 یاشی آقمای ریاضت‌ده سولسه بولماس

حقه عاشق درویشلاری سنك محك
 بو عالمده مكان قيلماس جانی فلك
 نفسی اولوك، كونكلی تیريك مثل ملك
 مونداغ بولمای سردین بهره آلسه بولماس
 جاندین کیچیب باش اوینامای خالص بولماس
 تیريك اولمای مجازیغه راس سورلاماس
 حقیقتنی شاهی برله راز ایتاماس
 خالص بولمای دنیا عقبن سالسه بولماس
 اخلاص کیراك ایا طالب عاشق بولسانك
 جاندین کیچیب محنت تارتیب صادق بولسانك
 آندین سونكره دركاهی كا لایق بولسانك
 لایق بولمای دیدارینی کورسه بولماس
 عاشقلاركا درد و بلا آفت کیراك
 حقدین بیزارتن بیورورغه راحت کیراك
 ملامت كا اهانت كا طاقت کیراك
 طاقت قیلماق حقه عاشق بولسه بولماس
 عشق سیزلارنی کوردوم دوستلار حیران یورار
 مؤمن مین دیب ایمانلاری ویران یورور
 روز محشر دیدار کورمای سرسان یورور
 پیر مغان نظر قیلمای کورسه بولماس
 عاشقلاری محنت استار جاندین بیزار
 روزه، نماز تسبیحلاری پروردکار
 تینمای کویار طاعتلاری حقسین دیدار
 یار استمای بنده میندیب تورسه بولماس
 طریقتنی شوقی ذوقی کویماك یانماق
 حقدین قاجقان ناجنسلاردین قاجیب تانماق
 یوز مینك تورلوك جفا تیکسه بویون سونماق
 بویون سونمای عشق دوکانین قورسه بولماس

نادان کیم دیب سورسه ایتینک بیخبرلار
 حقدین قورقماي ناجنس لارنی سوراب ایزلار
 آیت حدیث بیان قیلینک قاتیغ سوزلار
 همدم بولوب نادان برله تورسه بولماس
 زینهار - زینهار قاچیب یورکیل بولسه نادان
 حق یادینی ایتسه هر کم اوئل مردان
 جاننی جانغه پیوند قیلسه اوئل ایشان
 اورسه سوکسه اول عزیزدین تانسه بولماس
 تبرک دور اول عزیزدین اولوش آلینک
 یاستانیان آستانه سین یولی سورینک
 یول کورساتسه جان دلنی بر باد بیرینک
 بر باد بیرمای عشق یولیغه کیرسه بولماس
 عاشق لارنی خلق ایچینده سزی پنهان
 آهی سردی کوک کا یتار رنکی خزان
 کوزی کریان، بغری بریان خانه ویران
 مونداغ بولمای حق یولی نی بیلسه بولماس
 قول "خواجه احمد" زاهد بولمه عاشق بولکیل
 بو یول لارده بی باک یورمه صادق بولکیل
 لیلی - مجنون، فرهاد - شیرین، وامق بولکیل
 عاشق بولمای حق دیدارین کورسه بولماس

(۷۵)

حکمت

دوستلاریغه آچدیم ایدیم کوهری نی
 آسان لیق برله او کوهردین آلسه بولماس
 جفا چیکمای محنت تارتمای خدمت قیلمای
 اوشبو پیرنی سرایی غه کیرسه بولماس

عاشق قوللار خله كييب براق منار
 حور و قصور اونك سونك فرشتهلار
 اول براققه باقيب آندە حيران قالار
 عاشق بولماي اول براققه مينيپ بولماس
 رحمان ايكام رحم قيليب كيركوز يولغه
 رحمتينكدين مژده بيركيل عاصي قولغه
 يولدين آزغان قوللارينكني سالكيل يولغه
 قلاوزسز اوشبو يولغه كيرسه بولماس
 محبتني درياسیغه جوموب باتقيل
 عاشقلارني صحبتیغه اوزونك قاتقيل
 محبتني بازاریغه اوزونك ساتقيل
 اوزين ساتماي حق رحمتين آلسه بولماس
 ايرانلارني ايزين ايزلاب يولغه كيرسنگ
 كيچكيل فاني دنيا سيدين چين قول بولسنگ
 قلاوزسيز اوشبو يولغه كيرار بولسنگ
 ايزلاب آني تابماغونچه كيرسه بولماس
 محبتني درياسیغه آچكيل كوزني
 توبه قيليب حق يولیغه آلكيل اوزني
 محبتني درياسیغه سالكيل اوزني
 توبه قيلماي بو سوداني قيلسه بولماس
 شريعتنينك ميدانیغه اوزين سالمای
 طريقتنينك بوستانیده جولان قيلماي
 حقيقتنينك درياسيدین کوهر آلمای
 معرفت آدابينی بيلسه بولماس
 قول "خواجه احمد" حق يولیده تورغيل مدام
 عاشقلاركا درمان بيركيل علی الدوام
 عاشقلارني آرزوسيدور دارالسلام
 عاشق بولماي دارالسلام كيرسه بولماس

"کل من علیها فان" آیتند
 بیر خدادین اوزکا مخلوق اولار ایرمیش
 اسرافیل سورین آلیب هورکاننده
 کوردین ینه تیر کوزوبان قویار ایرمیش
 ایلیک مینک ییل کور باشنده تورکاننده
 آندین کین عرصاتکا سورکاننده
 ییلانک باش وییلانک ایاغ یورکاننده
 آدم اوغلی بیهوش ینکلیغ بولار ایرمیش
 اول حساب ایلاکای طهارتدین
 ایکنچی حساب ایلار نمازینکدین
 اوچونچی حساب ایلار حلال - حرامینکدین
 مین مین دیکان حیران بولوب قالار ایرمیش
 حساب ایلاب یوروتکایلار محشر ساری
 خلایقلار قدم اورکای ناجار باری
 معاینه انده کورکای دوزخ ناری
 الامان دیب اوکروشوبان تورار ایرمیش
 جمله امت یوزیکرمه مینک صف بولغایلار
 اطرافیدین فرشتهلار صف توزکایلار
 "أَيُّنَ الْمَقَرَّ" نداسینی بیتکورکایلار
 قاجنب قوتولوب بولمس دیبان ایتار ایرمیش
 اول وقتده ندا کیلکای "وَأَمَّا زُورًا الْيَوْمَ"
 اوشل کونده دستکیر بولغای نماز - صوم
 عقل هوشینک کیتب اندر قالمکای فهم
 تیل لال بولوب سوزلا یالمای قالار ایرمیش

بارجه خلقلار آدم آتا سری بارکای
 ای اتامیز ایمدی بیزنی قوللانک دیکای
 نافرمانلیغ میندیب اوتی فرزند دیکای
 ابراهیم کا بارالوک دیب ایتار ایرمیش
 ابراهیم کا باریب ایتکای آدم اتا
 شفاعت قیل بولارنی سین باریب حالا
 اول هم ایتور سیزده نوقرب آدم اتا
 موسی سری بارالوک دیب ایتار ایرمیش
 موسی دیکای ربّ آرنی دیدیم اولکون
 خجالت دین چقانیم یوق تا اوشبو کون
 بارالوک محمدکا بولوب واژکون
 بارجه لاری حضرت ساری بارار ایرمیش
 موسی دیکای یا محمد اورغیل قدم
 امتلارینک دوزخ ایچره بولدی عدم
 محمد هم ابا قلیب تورکای اولدم
 موسی قویمای ایکاولاری بارار ایرمیش
 تاجین آلیب کیسو سالیب عرش آستنده
 نعره تارتیب ییغلاب تورکای او شل کونده
 "یا قادرا"، "یا غفورا"! دیکاننده
 یا حبیبیم باش کوتاردیب ایتار ایرمیش
 آلیب کیلکیل امتینکنی درکاهمغه
 باغشلایین بارجه سینی من سزلارغه
 داخل قیلای جمله سینی جنتیمغه
 مونداغ دیبان حقدین ندا کیلار ایرمیش
 زاهد، عابد، خاص قوللاردین علمانی
 آلیب کیلکان درکاهیغه اوشبولارنی
 تنکریم ایغای یا محمد عاصی قانی
 عاصی لایق ایماس دیبان ایتار ایرمیش

عاصی، جافی لایق دیکای رحمتیم کا
 داخل ایتای مین اولارنی جنتیم کا
 کنادلارین باغشلایین بارین سنکا
 رسول خرم بولوب یوکوروب کیلار ایرمیش
 موسی برلان رسول اللہ یوکوروب کیلکای
 عاصی، جافی امت لاریم یورونک دیکای
 کنادلارینک عفو ایلابدی قادر، حی
 بهشت ایچره آلدین سالیب کرار ایرمیش
 قول "خواجه احمد" قیامت دین ایدی مونی
 حکمت قلیب خلايقه یایدی مونی
 اولوغ - اولوغ کتابلاردین ایدی مونی
 اوقوغاندین دعا طمع قیلار ایرمیش

(۷۷)

حکمت

شریعت کا مرشد بولغان عاشق قول لار
 شریعت دین آلور منزل آلار ایرمیش
 نمازیغه شروع قیلغان مؤمن قول لار
 اوجماخ اوین امید توتوب تورار ایرمیش
 ملك الموت فرمان برله جانیم آلسه
 اگا اینی بارجه ییغلیب قویوب یانسه
 یتتی قدم باسقان دین سونک خبر بیرسه
 منکر نکیر کیریپ سؤال سورار ایرمیش
 منکر نکیر سؤال سورور بولسه
 اول اوتلوغ عمود برله اورور بولسه
 یاشین یاشناب جان تنیم اوتقه یانسه
 قیناب جانیم تار لحدده کویار ایرمیش

تورت يوز قرق تورت پيغمبر مرسل نبي
 قالماديلار بو دنيادين اوتى بازى
 كل نفيس ذائقة الموت آيتى
 قرآن ايچره مونداغ خبر بيرور ايرميش
 شريعت دين، طريقت دين بيان قيلدى
 حقيقت دين قرآن سوزى كلام بولدى
 بول جهان غه محمدنى نورى تولدى
 اول نوريلان ايكي جهان يارور ايرميش
 خوش دولت دور ولايتده پادشاه بولسه
 عادل بولوب بير مؤمننى قاضى قيلسه
 اوشل قاضى بارجه ايلنى راضى قيلسه
 راضى ليق دين اوچماخ اوين آلا ر ايرميش
 مؤمن قول لار نماز اوقوب بولسه فارغ
 اول قولنى مونده بولغاي رنكى ساريغ
 اول خدمتدين حق قاشيده بولوب لايغ [لايق]
 حور قيزلارى قرشو كيليب قوچار ايرميش
 جاهل كيشى نماز قدرين قچان بيلور
 هر نمازده ايمان باشدين تازه بولور
 صلوٰة ديسه غافل باشين يوركاب اويور
 غافل قول لار عمرين ييل كا ساتار ايرميش
 قول خواجه احمد! "قول من" - ديسنك طاعت قيلكيل
 قيامتنى كونلاريني ياق بيلكيل
 حقه ياقين بولاي ديسنك جاتينك بيركيل
 طاعت قيلكان حقه ياق بولار ايرميش

(۷۸)

حکمت

طریقت کا شریعت سیز کیرکانلارنی
شیطان کیلیب ایمانی نی آلور ایرمیش
اوشبو یولنی پیرسیز دعوی قیلکانلارنی
سرسان بولوب ارا یولده قالور ایرمیش
طریقت کا سیاست لیغ مرشد کیراک
اول مرشدکا اعتقاد لیغ مرید کیراک
خدمت قیلیب پیر رضاسین تاپماق کیراک
مونداغ عاشق حق دین اولوش آلاز ایرمیش
پیر رضاسی حق رضاسی بولور دوستلار
حق تعالی رحمتیندین آلاز دوستلار
ریاضتده سر سوزیدین بیلور دوستلار
آنداغ قوللار حقّه یاوق بولور ایرمیش
اوشبو یولغه ای برادر پیرسیز کیرمه
حق یادیدین لحظه غافل بولوب یورمه
ما سواکا عاقل ایرسنک کونکل بیرمه
شیطان لعین اوز یولغه سالور ایرمیش
ایا دوستلار هیچ بیلمادیم مین یولومنی
سعادت غه باغلامدیم مین بیلمنی
ماسوادین هیچ ییغمادیم مین تیلیمنی
نادان لیقیم مینی رسوا قیلور ایرمیش
شریعتنی طریقتنی بیلائی دیسنک
طریقتنی حقیقت کا اولائی دیسنک
بو دریادین دُرّ و گوهر آلائی دیسنک
جان دین کیچان خاصلاری آلاز ایرمیش

عاشق قول لار كيچه - كوندوز هرگز تينماس
 بر ساعتی حق ياديدين غافل بولماس
 انداغ قولنی سبحان ايكام ضايع قويماس
 دعا قيلسه اجابت ليغ بولور ايرميش
 وآه دريغا كيچتي عمروم غفلت بيلان
 سين كيچوركيل كناه لاريم رحمت بيلان
 قول "خواجه احمد" سنكا ياندي حسرت بيلان
 اوز اوزيغه اوزی يانيب كويار ايرميش

(۷۹)

حکمت

عارف عاشق شوقی برله قیامت کون
 خدایی غه بحث و جواب قيلور ايرميش
 بو عالمده تارتقان جور و جفالارين
 كوكسين ياروب حق قاشيغه سالار ايرميش
 بو عالمده قيلدينك مینی خلق غه رسوا
 دیداریمنی كورساتای ديب قيلدينك شيدا
 عالم خلقيں دشمن قيليب سالدینك غوغا
 خدایی غه باریب عرضه بولار ايرميش
 دیداریمنی آرزو قيلسنك كيچه ياتمه
 بو دنيانينك طعمه سيدين ذرّه تاتمه
 حالدين سورسه نادانلاركا سرنی ساتما
 مونداغ ايرلار فيض فتوح آلاز ايرميش
 دیداریمنی طلب قيلسنك عرشقه باققيل
 عرش اوستيده آهنگ برله اوتلار ياققيل
 امت بولسنك محمدغه قپوق قاققيل
 سبحان ايكام چين عاشقنی سنار ايرميش

ایشیتیب عاشق رقص و سماع اورغای
 یتتی کوکدین ملایک لار ییغلیب کیلکای
 عرش کرسی لوح قلم داد ایلاکای
 بیر تیرانیب حقّه زاری قیلار ایرمیش
 ای بیر و کوک! عاشقلاردین حذر قیلینک
 اوتلوغ آهی چیقار بولسه حاضر بولینک
 کوک کا باقیب نعره تارتسه قورقوب تورینک
 بیر آه اورسه عالم یکسان بولار ایرمیش
 چین عاشقلار ضعیف بولوب سلام قیلکای
 قدرت بیلان پرده ایچره علیک آغای
 دیدار اوچون کویکان لاریم کیل کیل دیکای
 لطفین کوروب چین عاشقلار تیلار ایرمیش
 "صفاً - صفاً" عاشقلارکا ندا کیلکای
 یوز یکره مینک عاشق تیکین صفی بولکای
 جنت کیردیب الهیم دین ندا کیلکای
 جنت کیرمای دیدارینی کورار ایرمیش
 ندا کیلکای . ملایک کا زنجر سالکیل
 زنجر سالیب محشرکا ده آلیب یورکیل
 دیدار اوچون کویکان لاریم معلوم قیلکیل
 عاشقلاری بیخود بولوب یورار ایرمیش
 ایتکان لارین قیلغان عاشق دیدار کورکای
 اصل بولوب محشر آرا دوران سورکای
 افغانی دین یتتی دوزخ اورناب یانغای
 مالک کیلیب قاچغای تعظیم قیلار ایرمیش
 عاشقلارنی هیتتی دین مالک قاچغای
 قورقوب باریب دوزخ ایچره اوتلار ساچقای
 وهم برله زهر زقوم تويا ایچکای
 قدرتی غه حیران بولوب قالار ایرمیش

ملك لاردين عاشقى كوب اى بى خبر!
 بير آه اورسه عالم بولور زير و زير
 زاهد. عابد، سالكلارين عشق بتر
 عشق سيز آدم والله يولده قالار ايرميش
 قول "خواجه احمد" ديدار ايزلاب كدا بولكيل
 كيچكيل اهل - عيالنكدين جدا بولكيل
 الله حقى بولار دشمن رسوا بولكيل
 جدا بولغان ديداريني كورار ايرميش

(۸۰)

حکمت

كيلينك، ييغلينك ذاكر قوللار ذكر ايتالوك
 ذاكرلارنى خدا بيشك سويار ايرميش
 عشق سيزلارنى ايمانى يوق اى يارانلار!
 دوزخ ايچره تينماي دايم كويار ايرميش
 محبتليك عاشقلارنى خدا سويدي
 آئينك اوچون دنيا عقبين طلاق قويدى
 جاندين كيچيب ياشين ساجيب عاشق بولدى
 روز محشر ديداريني كورار ايرميش
 عاشقلارنى چين دوستيغه جاني قربان
 شوقى برلان آنى ايزلاب قيلور افغان
 عشق سوداسى باشه توشسه خانه ويران
 شيدا بولوب آنى ايزلاب يورار ايرميش
 عاشق بولسنىك كيچه - كوندوز تينماي ييغلا
 پير مغان خدمتىغه بيلينك باغلا
 كويوب بيشيب دردى برله كوكسنىك داغلا
 داغده كيتكان وصاليني كورار ايرميش

حقنى سويكان عاشقلارى تابتى مراد
 يالغان عاشق بولوب يورمه تانكلا. اويات
 قيليج دين تيز قيل كفروكنى آتى صراط
 يالغان دعوى قيلغان اوتماي قالار ايرميش
 عاشق بولسنىك يالغان دعوى قيلمه زنهار
 يالغان دعوى قيلغانلاردين خدا بيزار
 قهار ايكام قهر ايلاسه آتى قهار
 قيامت كون يوزى قرا قوبار ايرميش
 عاشقلارى كيچه ييغلاب سحر قوپار
 سر شرايين ايچكان عاشق سرنى ياپار
 هر كيم سوكسه بلكه تبسه قولين اوپار
 آنداغ ايرانلار فيض فتوح آلا ايرميش
 محبت دين خبر الغان خاننى بيلماس
 باشين كيته تايارى يوق جاننى بيلماس
 عشق كلامى ذوق طعامى ناننى بيلماس
 "هو - هو" تيو ذكرين ايتيب يورار ايرميش
 عاشقلارنى كوزى كريان. بغرى بريان
 پرواسى يوق. ناموسى يوق. يورار عريان
 ايل كوزيكا تفرق دين كم سري پنهان
 جاني برله يادين ايتيب يورار ايرميش
 توغرى يوركان عاشقلاردين خدا راضى
 عاشقلار ايشى آسان ايماس قيلمه بازى
 يالغانچى لار عاشق مين دير الله قاضى
 ايماننى پوچك پلغه ساتار ايرميش
 عاشقلىقنى آسان ايشى باش بيرمكليك
 منصور صفت اوزدين كيچيب جان بيرمكليك
 "موتوا قبل ان تموتوا" خاك بولمكليك
 عاشقلارى اولماس بورون اولار ايرميش

سودا قیلسنك آخرت نی سوداسینی
 باشقه آلمه بو دنیانی غوغاسینی
 عمل قیلغیل، جنت آلکیل ماسواسینی
 جنت آغان دیدارینی کورار ایرمیش
 قول خواجه احمد! عاشق بولسنك جان دین کیچکیل
 آندین سونکره شوق شرابین تو یا ایچکیل
 کناهنکنی سبك قیلیب مونده اوچکیل
 عاشقلاری اوجماق ایچره اوچار ایرمیش

(۸۱)

حکمت

لا إِلَهَ إِلَّا اللَّهُ دیکان قول نی آغزیدین
 بیر یاشل قوش بولوبان اوچار ایرمیش
 قناتلاری توقوغلوق درّ یاقوت دین
 پرواز قیلیب عرشدین عرشکا اوچار ایرمیش
 اول قوشقه قدرت برلان مینک تیل بیرکای
 بارچه تیلده اوشال قولنی حقدین قولکای
 ربانی غه چنکالی نی اوروب یولغای
 تونی - کونی یارلقه دیب ایتار ایرمیش
 ایا دوستلار اوشال قوشتی عیانی نی
 مین ایتاین سیز تینکلانکیز بیانی نی
 کوب نادانلار بیلماس اولقوش پایانی نی
 قولونك توتوب بهشت ایچره کرار ایرمیش
 اول قوش ایتور هرکز تینمام مین بر زمان
 تا بیرمه قادر منکا دار الامان
 هیچ قالماکای بوکونکلده ذره کمان
 آندین سونکره قرار تاپیب قونار ایرمیش

روزه توتوب نماز اوقوب توبه قیلغان
 سحر توروب الله تیو قولوق قیلغان
 مشایخ لار خدمتی نی تمام قیلغان
 آنداغ قول لار حق دیدارین کورار ایرمیش
 بو یسوی مسکین احمد حیران قالیب
 لا اله الا الله نی تیل کا آلیب
 حق ذکر نی جان دلغه واصل قیلیب
 اوچ قوشینی لامکانده کورار ایرمیش

(۸۲)

حکمت

محبت دین خبر بیلکان عاشق لاری
 الله دیسه توقوز آسمان کویار ایرمیش
 عرش اوستیدا نعره تارتسه صادق لاری
 فرشته لار عزیز جان دین تو یار ایرمیش
 سین عاشق بول پرتو سالور عاشق لارغه
 پرده آلیب جلوه قیلور صادق لارغه
 دیدارینی حق کورساتور لایق لارغه
 حق تعالی لایق لارنی سویار ایرمیش
 عاشق بولسنگ شونداغ بولغیل بیر سون شراب
 صدیق صفت خلقغه یتسون بوی کباب
 الله دیسنگ لیک دیب بیرسون جواب
 آنداغ عاشق دنیا عقبین قویار ایرمیش
 عشقه قدم قویغان عاشق اوزین بیلماس
 شیخ بایزید مرید بولسه قولین آلماس
 دنیا کیلیب جلوه قیلسه کوزین سالماس
 کوز قانندین ساچ و سقال بویار ایرمیش

عاشقلارغه بیر خدادین اوزکا حرام
 رحمتی دین قطره تامسه ایشی تمام
 رزق روزی ایزلاماسلار توکل تام
 حق ذکرینی آیه آیه تویار ایرمیش
 عاشق لاری حق دین قورقوب بولور بیدار
 حقیقت لیغ عاشقلارنی فکری دیدار
 باش بیردیه جان و ایمان آنکا طیار
 جان دین کیچیب حق یولیده اولار ایرمیش
 لالا دیکیل عالم سینی کافر دیسون
 کافر دیبان منصور صفت دارغه آسون
 باشینک بیرکیل دیدارینی حق کورساتسون
 باشین بیرکان حق دیدارین کورار ایرمیش
 دروازه آسیب قویونک جمله کورسون
 مونی کوروب خلق عالم عبرت آسون
 اولوغ کیچیک یول بارغوجی اوروب اوتسون
 انا الحق دیب پنھاسویونوب کولار ایرمیش
 خواجه ملا شاه آلدیغه یغیلیب باردی
 کافر منصور اولمادی دیب عرضه قیلدی
 رسول شرعی نه بویورسه قیلینک دیدی
 ظاهرین لر شادغه تعظیم قیلار ایرمیش
 شریعت دور دیب عالم لاری بویوردیلار
 کافر منصور اولمادی دیب کویوردیلار
 آخر قیلیب کلین کوککا سوردیلار
 تاغ توزلار انا الحق دیب تورار ایرمیش
 شوقی برلان اوت کویوردوب کوککا چیققی
 ملایکلار افغان قیلیب حقه باقتی
 جنت ایچره حور و غلمان قپوق قاقتی
 دیوانه لار یا منصور دیب کویار ایرمیش

کلین یغیب دریا ایچره تاشلا آتی
 زمستانده دریا تاشیب نعره تارتی
 شهر خلقی یوکوروب بیلیب باسی قاتی
 جاندین قورقوب داد فریاد قیلار ایرمیش
 شیخ ذوالنون شاه منصورنی پیری ایردی
 پادشاه یوکوروب ولایتکا خبر بیردی
 بر اولیاء بارموکین دیب زاری قیلدی
 شیخ ذوالنون پنهایوروب بارار ایرمیش
 غریب منصور قولاغیمکا بیر سوز دیدی
 خاکستردین بیر کف آلیب مینکا بیردی
 دریا تاشسه یا منصور دیب سالینک دیدی
 ان شاء الله تاشقان دریا قیتار ایرمیش
 پادشاه ایدی حاضر پیریم بارا کورونک
 خاکستریں دریا ایچره سالا کورونک
 غریب یتیم ایلکین توتوب آلا کورونک
 پادشاه وزیر تعظیم ایتیپ تورار ایرمیش
 شیخ ذوالنون خوب بولوردیب بیردین قوبتی
 پادشاه وزیر اخلاص قیلیب ایزین اوبتی
 شیخ ذوالنون دریا سری یوروب یتتی
 خاکستریں دریا ایچره سالار ایرمیش
 خاکستریں یامنصور دیب سوغه سالدی
 قدرت برله دریا قوروب خاموش بولدی
 خواجه ملا مونی کوروب شاکر بولدی
 ایلکین آجیب شیخغه دعا قیلار ایرمیش
 پادشاه ایدی شهریم یر مین سیزکا برای
 حضرت پیریم بر قیزیم بار چوری قیلای
 اهل - عیالیم، احبابلاریم خادم قیلای
 شیخ ذوالنون قبول قیلماي تورار ایرمیش

مین دنیادین سوی بولغان ایشتیب پادشاه
 ظاهر پادشاه باطن ایچره مین شهنشاه
 دنیا عقبین طلاق قویا بولغیل آگاه
 کیلکان نذرین خلقه انعام قیلار ایرمیش
 ای بیخبر حقه اخلاص قیلماسموسین
 مونده اخلاص آنده خلاص بولماسموسین
 ایکی عالم خداینکنی بیلماسموسین
 بیخبرنی دوزخ ایچره سالار ایرمیش
 باطل کوزلار خاص ولینی تانومس لار
 آندین یوز مینک سرلار کورسه اونامس لار
 کیم یخشیدور، کیم یماندور، تانومس لار
 اول سبب دین آرا یولده قالار ایرمیش
 تازه - تازه حکمت لاریم ثانی دفتر
 ایسز سوزوم نادانلارغه قیلور ابتر
 بهره آلمای کوندین کونکا بولور بتر
 سوزکا یتیمای اوزکا بنا قیلار ایرمیش
 لا مکاندین چیقتی روحوم الله دیدی
 سلطان احمد ایشتیب مونی خلقغه یایدی
 منکرلاری شک کیلتوردی کوزین اویدی
 ناجنس لارنی حق جزاسین بیرار ایرمیش
 عاشق لارنی سرین ایتیم یالغانی یوق
 یالغان طالب بو یول لارکا کیرکانی یوق
 یالغانچیلار حق دین اولوش آلمان یوق
 اولوش آلمان فقر تونین کیار ایرمیش
 فقیر تونین کیکان عاشق بولور تفریق
 زار ییغلابان دیداریغه بولور مشتاق
 ملایک لار آت قویارلار آنکا آفاق
 آنداغ عاشق ایلدین قاچیب یورار ایرمیش

نسیمی دیک حقنی ایتکیل، تیرینک سویسون
 خواجه ملا سامان تیغیب آسیب قویسون
 کوزینک یومکیل بو دنیا دین نفسینک اولسون
 کوشت، پوستین حق سوزلاتیب قویار ایرمیش
 قول خواجه احمد روحونک ایدی "قالوا بلی"
 وعدہ قیلدینک هیچ ایتمادینک حمد ثنا
 غضب قیلسه. نه قیلغای سین؟ قادر خدا
 یالغان بنده وعدہ سیدین تانار ایرمیش

(۸۳)

حکمت

کیلینک دوستلار بارچه توروب ایتالینک
 یادی بیزنی یاروغلو ققہ تارتار ایرمیش
 یادی برلان شروع قیلغان عاشقلارنی
 نیازلاری کوندین کونکا آرتار ایرمیش
 کیم که ایتسه حق یادینی بغری کویوب
 کوز یاشینی باران قیلیب رنکی سولوب
 اوز یاقاسین یانکلیدیم دیب اوزی توتوب
 آنداغ عاشق سر شرابین تانار ایرمیش
 اوشبو یولنی مزا سینی بیلماکانلار
 اوز یاقاسین توتوب توبه قیلماکانلار
 دنیا سیغہ مغرور بولوب یوروکانلار
 حیوان ایرور بلکه آندین بتر ایرمیش
 عشق سوداسی کیمکا توشسه خانه ویران
 کیجه - کوندوز دیدار تیلاب یورار حیران
 عشق یولیده کوزی یاشلیغ. بغری بریان
 شیدا بولوب اوزین ایزلاب یورار ایرمیش

ایا دوستلار قېساب کیلدی قرانغولوق
 امیدیم بار اول ایزیم وین هم یاروغلوق
 طریقتنی بازاری دور هم قوروغلوق
 نیازلیق قول کیریپ سودا ایتار ایرمیش
 قول خواجه احمد عبرت آغیل صد هزاردین
 نیازسیزلار بهرد آلماس اول بازاردین
 فاضل لیقده قروغ قالور اول نظردین
 نادان عمرین پوچک پلغه ساتار ایرمیش

(۸۴)

حکمت

عاشق کیشیلار کیچه لاری یاتمسه بهراق
 هر درد و الم تیکسه فغان ایتمسه بهراق
 باشینی یاریب قانغه بویاب قیلسه ستملار
 اوردی مینی دیب ظالمه سوز قاتمسه بهراق
 درویش بولوبان خلق ایچیده تسبیح اوکوروب
 صوفی بولوب عالمغه اوزین ساتمسه بهراق
 اوتکان صوفی لار ایل کوزیدین یورماین قاچتی
 حقنی تیلاکان خلق ایچیده یورمسه بهراق
 هر بیرده خدا حاضر و ناظر کلدرولار
 بیجا اوتوروب حقنی بلند ایتمسه بهراق
 صوفی بولوبان صاف بول ای بنده الله
 صوفی بولوب اول یالغان دمی اوتمسه بهراق
 الله دیسه قیلسه نهان بدعت بسیار
 آنداغ صوفی لار روزه - نماز توتمسه بهراق
 هر کیمنی اوز یولیده ایلائی شیدا
 دیوانه ژولیدنی عیب ایتمسه بهراق

حغنی تنوکان اوزکانی هرکز تانومس لار
 الله دیماکان بولسه انی اولکانی بهراق
 صوفی بوله سین های - هوس قیلماغیل اصلا
 ایت نفسی اوچون بنده که قان توتمسه بهراق
 رزاق دیدینک بیردی سینکا رزق فراوان
 شیطان سوزیکا بنده قلاق سالمسه بهراق
 حقدین ایشیتیب ایدی مونی احمد مسکین
 چین بنده سینی سینه سیدین کیتمسه بهراق

(۸۵)

حکمت

عاشق لیقنی دعوی سینی قیلغان کیشی
 معشوقیدین ذره غافل بولغانی یوق
 عشق کوهری توب سیز دریا ایچره مهمان
 جاندین کیچمای اول کوهردین آلغانی یوق
 کوهر آلور غواص اکر جاندین کیچسه
 شیدا بولوب عشق شرابین هر کیم ایچسه
 نیچه آیلار، نیچه کونلار اکر اوتسه
 عشقنی کلی آچیلیب هرکز سولغانی یوق
 عاشق بولوب تاپای دیسنک حقنی یولین
 اسراغین سین عشق باغیده اسرار کلین
 محنت برلان سنار ایرمیش یخشی قلین
 چین عاشقنی اندین کونکلی قالغانی یوق
 محنتنی دریاسیدا موج اورغوسی
 علم - عمل، قیل - قال لار شوق اولکوسی
 بوتنکزکا کیم کیریبان؟ کیم چقغوسی
 عاشق قول لار معشوقیدین قالغانی یوق

قول خواجه احمد قبول قیلدی ایماغلیقنی
قبول قیلدی عشق اوتی غه کویماغلیقنی
جانین بیریب ساتقون آلدی کویماغلیقنی
چین سوزوم دور هرکز آنی یلغانی یوق

(۸۶)

حکمت

عشق سرینی بیان قیلسام بو عالمده
بی خبرلار ایشیتیب قولاق توتقانی یوق
حق یادینی کیمکا ایتای همه غافل
مؤمن من دیب بو دنیا دین اوتکانی یوق
ایشان شیخ خواجه ملا دنیا ایزلار
اول سببدین پادشاهلارغه یالغان توزلار
آیت. حدیث سوزین قویوب مالنی کوزلار
حق یولیده هرکز محنت تارتقانی یوق
دنیا تیغیب حقنی سویکان تابتی مراد
شوق شرابین ایچکان عاشق شوقی زیاد
قیامت کون کذابلارنی یوزی اویات
یالغانچیلار حق یادنی ایتکانی یوق
آخر زمان شیخلار ایشی همه ریا
روز محشر ریالاری بولغای کواد
شیخ مین تیو مونچه هوا، مونچه بنا
الله اوچون ذره ثواب ایتکانی یوق
ایشان مین دیب تورلوك طعام تیریپ ییکای
یخشیلارنی کوزکا ایلمای مین مین دیکای
دنیا مالین آلیب بارسه سویونوب آلكای
والله. بالله مین - مین لیکدین اوتکانی یوق

محمد دیک تفراق صفت حقیر بولسون
 ریاضتده رنکی، روی زهیر بولسون
 حق مصطفی ایل کا قاتیغ باققانی یوق
 خلقلار قلیب خلایقغه سوزلار ایتی
 یوز مینک کافر بت دین کیچب دین کاقیتی
 خلقلاریدین عالم همه نورکا باتی
 آندین سونکره ایمان اسلام کیتکانی یوق
 بنده بولسنک خلقلار قلیب امت بولغیل
 آندین سونکره ایمان اسلام قولغه آغیل
 سحر وقتده حقه ییغلاب زاری قیلغیل
 الله سخی هیچ کیم نومید قایتغانی یوق
 ایکی عالم شاهی تورور بیر یخشی خلق
 خلقلاریدین حق مصطفی بولدی اولوغ
 حق تعالی آیت بیرى مِمَّ خُلُق
 غافل آدم آیت ایشیتیب اوقغانی یوق
 "خلق مماء دافق" قاتیب ایدی
 مصطفیغه امتلارکا اوقوب بایدى
 ییلغان امت وعدهسیدین قایتیب تاپتى
 سبحان ایکام گناهیدین اوتکانی یوق
 میخانه دیب ایشیتیب قولاق کرکان ایماس
 ایرانلارنینک خدمتی نی قیلغانی ایماس
 پیری کامل مکمل نی کورکان ایماس
 یالغانچی دور وحدت می دین تاتقانی یوق
 جاندین کیچکان چین عاشقلار دنیا دیماس
 نفسی اولوک آب طعام غمین ییماس
 بو دنیاده سود و زیان بولسه بیلماس
 دنیا کیلیب جلوه قیلسه باقانی یوق

محبت لیک دیوانه نینک نشانی بار
 جان و دلده عشق دردی نینک بیانی بار
 نی درد لارنی کیم نی کورسه کمانی بار
 بایزید دیک هر کون اوزین ساتقانی یوق
 عاشق بولسنک بغینکده یوق کوزنیک قانی
 ای نارسا جبهنکده یوق عشق نشانی
 خدمت قیلسنک پیری مغان درنیک کانی
 خدمت قیلمای درکانی غه باتقانی یوق
 بولھوسلار عاشق مین دیب کوب لاف اورار
 بی خبرلار قایدا بارسه دوکان توزار
 یالغان سوزلاب بو دنیانی دورین سورار
 دنیا ایزلاب تابانی غه تیکانی یوق
 حقدین قورقمای مین مین دیکان شہلار قانی
 آی - کون کا دعوی قیلغان مهلار قانی
 کیچه ییغلاب سحر تورکان خوبلار قانی
 عبرت آلیب قان زرداب توککانی یوق
 قروق زاهد حق عشقی نی کوزکا ایلماس
 جنت ایزلاب دیدارینی طلب قیلماس
 عاشق لارنی ناله سیغه قولاق سالماس
 بو دنیانی ارقه تاشلاب اتقانی یوق
 قول خواجه احمد قول مین دیسه قولوم دیکیل
 اندین کین بنده لیک کا مقبول بولکیل
 محبت نی میدانیده باش اویناغیل
 باش اوینمای حق وصلی کا یتکانی یوق

عشق دعوی سین منکا قیلمه یالغان عاشق
 عاشق بولسنک بغرینک ایچره کوزقانی یوق
 محبتنی شوقی برله جان بیرمه
 ضایع کیچار عمری انی یالغانی یوق
 عشق باغی نی محبت تارتیب کوکارتمسنک
 خوارلیق تارتسه شوم نفسینکی اولدورمسنک
 الله دیوب ایچ کا نورنی تولدورمسنک
 والله - بالله سینده عشقنی نشانی یوق
 حق ذکرینی مغز جان دین چیقارمسنک
 اوچ یوز التمش تمورلارینک تیرانمسنک
 تورت یوز قرق تورت سونکارلارینک کل قیلمسنک
 یالغانچی دور حقیقه عاشق بولغانی یوق
 نفسدین کیچیپ قناعتنی پیشه قیلغان
 هرکیم تپسه راضی بولوب بویون سونغان
 یخشی لارغه خدمت قیلیب دعا آغان
 انداغ عاشق محشر کونی آرمانی یوق
 راحت تاشلاب جان محنتین خوشلاکانلار
 سحرلارده جانین قیناب اشلاکانلار
 های - هوس، ما و میننی تاشلاکانلار
 چین عاشق دور هرکز آنی یالغانی یوق
 عشق دردینی بی دردلارکا ایتیپ بولماس
 بو یول لارنی عقبه سی کوب اوتوب بولماس
 عشق کوهرین هر نامردکا ساتیب بولماس
 بی خبرلار عشق قدرینی بیلکانی یوق

عشقه توشتونك، اوتقه توشتونك كرىوب اولدونك
 پروانه ديك جاندين كيچيب اخكر بولدونك
 دردكا تولدونك غمكا سولدونك تيلبه بولدونك
 عشق دردينى سورسنگ هرگز درمانى يوق
 باشينك كيتار بو يول لارده حاضر بولغىل
 عشق يولیده اولماس بورون زينهار اولغىل
 پير ايتاकिन محكم توتوب خدمت قيلغىل
 خدمت قيلغان هرگز يولده قالغانى يوق
 عاشق ايرماس جانانیکا جان بيرمه
 دهقان ايرماس كتمان چايب نان بيرمه
 مونده ييغلاب آخرت ده جان بيرمه
 يولدا قالغان بوى خدا آغانى يوق
 اى بى خبر عشق اهلیدين بيان سورمه
 درد استاکیل عشق دردیغه درمان سورمه
 عاشق بولسنگ زاهدلاردین نشان سورمه
 بو يول لارده عاشق اولسه تاوانى يوق
 زاهد بولمه، عابد بولمه، عاشق بولکیل
 محنت تارتيب عشق يولیده صادق بولکیل
 نفسنى تيغيب دركاهى غه لايق بولکیل
 عشق سيزلارنى هم جاني يوق، ايمانى يوق
 عشق سوداسى كيمكا توشسه رسوا قيلور
 پرتو سالب حق اوزيغه شيدا قيلور
 مجنون صفت عقلين آليب ليلا قيلور
 الله حقى بو سوزلارنى يالغانى يوق
 قول خواجه احمد جاندين كيچيب يول غه كيركيل
 آندين سونكره ايرانلارنى يولين سوركيل
 الله دييان حق يولیده جانينك بيركيل
 بو يول لارده جان بيرماسنگ امكانى يوق

حاجت ایرماس عشق دردیغه دوا سورمق
 ویران ایتیب کیتکان ایرمیش دواسی یوق
 جائینک قیناب. یاشنک اقیب. هوشینک کیتب
 عشق دردیدین دوستلار قاتیغ بلاسی یوق
 هر کیم کویار جانغه آلار عشقنی اوتین
 جانی کویسه اعضاسیدین چیقار توتون
 بغری انی صد پاره دور یوقتور بوتون
 خلق غه ظاهر کورونوب تورکان یراسی یوق
 جاندین کیچمای تابماس هرکیم جانانه نی
 کوروب همت قیلماق کیراک پروانه نی
 کوروب بیلیم اوتقه اوردی اوز جانی نی
 سود و زیان برله هرکز پرواسی یوق
 انچه یوردونک انچه توردونک ای بی خبر
 نفس شیطان ایشلاریدین قیلغیل حذر
 بیزدین بورون تیلیم کاروان قیلغان سفر
 ایتا کیتکان بو دنیانینک وفاسی یوق
 ایتیب اوتکان ایرانلاردین یولنی سورکیل
 سحرلارده اورده قوبوب چار ضرب اورغیل
 هو صحبتین قورغان ییرکا اوزونک اورکیل
 یولغه کیرکان ایرانلارنی هواسی یوق
 قول خواجه احمدایدی دوستلار ایشیتنک مونى
 قاف تاغی دیک تاشلار تیکسه چیقماس اونى
 کیمکا ایتیب. کیمکا ییغلاى عشق دردینى
 والله. بالله عشق دردینى دواسی یوق

خوش غایب دین یتوشتی یخشی سوزوم تبرک
 عاشق بولسنگ ای طالب ریاضت ده بیلینک بوک
 تون کیچه لار اوخلاهای یاش اورنی غه قانینک توك
 ارسلان بابام سوزلارین ایشیتینکیز تبرک
 ارسلان بابام ایدیلار طالب لارده یوق اخلاص
 پیرینک حاضر بولغانده نه حاجت خضر و الیاس
 پیرغه قدم قویغانده یا ایتمه غوث الغیث
 ارسلان بابام سوزلارین ایشیتینکیز تبرک
 طالب مین دیب ایتورلار والله بالله نا انصاف
 نامحرم غه باقارلار کوزلاریده یوق انصاف
 کیشی مالین بیورلار چون دل لاری ایماس صاف
 ارسلان بابام سوزلارین ایشیتینکیز تبرک
 پیر خدمتین قیلدوق دیب طالب مین دیب یورارلار
 ییب حرام حریشنی کولباریغه اورارلار
 کوزلاریده نمی یوق حلقه ایچره کیرارلار
 ارسلان بابام سوزلارین ایشیتینکیز تبرک
 ذاکر مین دیب زور اورار چیقماس کوزیدین یاشی
 دل لاریده غمی یوق ناکه آغریغای باشی
 مکر و حيله قیلورلار معلوم خداغه ایشی
 ارسلان بابام سوزلارین ایشیتینکیز تبرک
 طالب مین دیب ایتورلار کونکلیده یوق ذره نور
 چین طالبنی سورسنگیز ایچی تاشی کوهردور
 حقه عیان سرلاری ییمیش لاری صفا نور
 ارسلان بابام سوزلارین ایشیتینکیز تبرک

صورتلاری صوفی نقش قیامت دین قورقماسلار
 فسق - فجور حاصلی کنازلاردین هورکماسلار
 ایا تسبیح ایلکینده ییغلاب یاشین توکماسلار
 ارسلان بابام سوزلارین ایشیتینکیز تبرک
 ایا تسبیح ایلکینده زنار یخشی بیلسنکیز
 حق رضاسی بوتورور عشق سوداسین قیلسنکیز
 عشقین آلیب محشرده رسوا بولوب تورسنکیز
 ارسلان بابام سوزلارین ایشیتینکیز تبرک
 عشقه قدم قویغانلار حق دیدارین کورارلار
 موسی صفت محشرده حق دین سؤال سورارلار
 سرمست بولوب وصلیده "هو" ذکرینی قورارلار
 ارسلان بابام سوزلارین ایشیتینکیز تبرک
 انشاء الله ایشیتکاننی حقدین تیلاب آلور مین
 شیطان یولیدین آلیب حق یولیغه سالور مین
 مدد قیلسه مصطفی کنازلارین تیلارمین
 ارسلان بابام سوزلارین ایشیتینکیز تبرک
 ارسلان بابانی سورسنکیز پیغمبرغه اعتبار
 صحابهلار اولوغی خاص بنده کردگار
 یاتقان ییری ناهموار بر کازه خوار زار
 ارسلان بابام سوزلارین ایشیتینکیز تبرک
 چهار شنبه کون ایشیتیپ ناکه حضرت باردیلار
 ارسلان بابانی اویغه اولکون مهمان بولدیلار
 یاتکان یری ناهموار کوروب حیران قالدیلار
 ارسلان بابام سوزلارین ایشیتینکیز تبرک
 اول محمد مصطفی توروب دعا قیلدیلار
 ملائک لار آمین دیب ایلکین آچیب توردیلار
 شونداغ امت بیردینک دیب حق شکرینی قیلدیلار
 ارسلان بابام سوزلارین ایشیتینکیز تبرک

صحابه‌لار ايديلار ارسلان بابا دور آتينكيز
 عرب‌لارنى اولوغى پاكيزه دور ذاتينكيز
 تربيت تن فرض ديدى فرجه ساليب ياتينكيز
 ارسلان بابام سوزلارين ايشيتينكيز تبرك
 آخر زمان امت‌لار نقش قيلور اويلارين
 نفس هواغه قوانينب بوزار هر دم خويلارين
 شان شوكت‌لار بيلان برپا قيلور بويلارين
 ارسلان بابام سوزلارين ايشيتينكيز تبرك
 آخر زمان امت‌لار دنيا فانى ييلماسلار
 كيتكانلارنى كوروبان آندين عبرت آلماسلار
 ايرانلارنى قيلغانين كوروب كوزكا ايلماسلار
 ارسلان بابام سوزلارين ايشيتينكيز تبرك
 يخشى يول‌لاردين آزيب يامان يولغه آوشقان
 شيطان لعين پيريم ديب دامنى غه ياپوشقان
 غزايلىنى پيريم ديب ايرته آخشام كوروشقان
 ارسلان بابام سوزلارين ايشيتينكيز تبرك
 ايمان اسلامين آيب اولمايمن ديب كولوشكان
 اولمايمن ديب دنيا ده موليم برلان اوروشكان
 غافل ليق برله هر دم عمرينى برباد بيركان
 ارسلان بابام سوزلارين ايشيتينكيز تبرك
 وقتى ييتسه عزرائيل امانتنى بيردركاى
 شيطان لعين پيريم ديب جان بيرارده كورمكاى
 ايمان اسلامين آلوب حال دلين سورمكاى
 ارسلان بابام سوزلارين ايشيتينكيز تبرك
 توبه قيلسه توبه سين موليم قبول قيلماكاى
 الله ديسه خواجه سى قولين توتوب آلمكاى
 جرم، عصيان كرهين پيركا باريب چچيماكاى
 ارسلان بابام سوزلارين ايشيتينكيز تبرك

ييتى ياشده ارسلان باب تركستانغه كىلدیلار
باشم قويب يىغلادیم حالیه كوروب كولىدلار
مینك بیر ذكرین اوركاتیب مهربان لیغ قىلدیلار
ارسلان بابام سوزلارین ایشیتینکیز تبرک
کلیم قىلدیم خرما دین مینکا وحشت قىلدیلار
ای بی ادب كودك ديب عصا آلیب سوردیلار
وحشتی دین قورقمادیم مینکا باقیب توردیلار
ارسلان بابام سوزلارین ایشیتینکیز تبرک
آغزینك آچکیل ای كودك امانتینك بیراین
مزاسینی یوتمادیم آچ آغزینكغه سالاین
حق رسولنی بویروغین امت بولسام قیلاين
ارسلان بابام سوزلارین ایشیتینکیز تبرک
اغزیم آجتیم سالدیلار خرما ایسی قىلدى مست
ایکی عالم دین کیچیب والله بولدوم حق پرست
خواجه ملا ییغیلدى آلیب یوردی دست بدست
ارسلان بابام سوزلارین ایشیتینکیز تبرک
بابام ایدی ای بلام تکلیف قیلما دینك مینکا
بیش یوز ییلدور کامیمده سقلاب ایردیم من سینکا
مزاسینی سیز آلیب تلقین بیردینکیز مینکا
ارسلان بابام سوزلارین ایشیتینکیز تبرک
بابام ایدی ای بلام قاشیمده توراوالاین
جنازیمنی اوقوب کوم جان تصدق قیلاين
مدد قیلسه مصطفى علیین غه کرایین
ارسلان بابام سوزلارین ایشیتینکیز تبرک
یىغلاب ایدیم ای بابا یاش كودك مین بیلما سمین
کورونکیزنی قزلار من کوتاریب سالالماس مین
حق مصطفى سنتین كودك مین بیلما س مین
ارسلان بابام سوزلارین ایشیتینکیز تبرک

بابام ایدی ای بلام ملایک لار ییغیلکای
 جبرائیل امام بولوب اوزکالار تابع بولغای
 میکائیل و اسرافیل کوتاریب کورکا قویغای
 ارسلان بابام سوزلارین ایشیتینکیز تبرک
 قول خواجه احمد سوزونکنی نادانلارکا ایتماکیل
 سوزنی ایتیپ نادانکا پوچک پلکا ساتماکیل
 آج دین اولسنگ نامرد دین هرکز منت تارتماکیل
 ارسلان بابم سوزلارین ایشیتینکیز تبرک

(۹۰)

حکمت

هر کیم قیلسه طریقتنی دعواسینی
 اول قدم شریعتکا قویماق کیراک
 شریعتنیک ایشلارنی ادا قیلیب
 آندین سونکره بو دعوانی قیلماق کیراک
 شریعتسیز دم اورماسلار طریقتده
 طریقتسیز دم اورماسلار حقیقتده
 اوشبو یوللار ییری بیلنور شریعتده
 جمله سینی شریعتدین سورماق کیراک
 آندین سونکره بر ایر کیراک ارادتلیک
 بولمیش بولسه اول بر ایردین اجازتلیک
 شریعتده راست موافق کرامتلیک
 اوشال ایرنیک ایتاکنی توتماق کیراک
 کیم بیلماین بو یوللارنی شیخ مین دیسه
 کرامتدین ولایتغه خبر بیرسه
 باطل ایرور اگر روح الامین ایرسه
 اوزین آنداغ باطللاردین ساچماق کیراک

ارادت سيز. اجازت سيز مرشد بيلماس
 طريقتنينك يوللاريني هرگز بيلماس
 مبتدع دور ارادت كا لايق ايرماس
 آنداغلاردين ياراغ - ياراغ قاقماق كيراك
 آندين سونكره مجاهده تونين كيوب
 رياضتنينك بوته سنده ايريب آقيب
 من منليك اوتوب اوزنى ياراق قليب
 عزت رختين ساتيب خوارليق آماق كيراك
 اوشبو يول دور ايرانلارنينك قيلغانلارى
 طالبلارى بيلسون تيو ايغانلارى
 حق دور بيلسنگ بر ذره يوق يالغانلارى
 جان قولاقى برله مونى اوقماق كيراك
 صدقى برله هر كيم قبول قيلسه مونى
 اعتقادى برله بولسه تونى - كونى
 يادى برله مشغول بولسه تونى - كونى
 ايرانلاردين يارى مدد قولماق كيراك
 ارادت سيز اوشبو يولغه كيرماديلار
 اجازت سيز يولغه قدم قويمايديلار
 اشارت سيز ياريم نفس اورماديلار
 مرید بولغان بو صفتليغ بولماق كيراك
 هر كيم كيرسه اوشبو يولغه بيلين باغلاب
 كيراك مخدوم، كيراك خادم اوزين بيليب
 نيتىنى خدايىغه درست قليب
 توجهنى عزيزلاركا قيلماق كيراك
 هر كيم ايرسه اوشبو يولغه كيرار بولسه
 توبه قليب حضرتىكا قدم قويسه
 ذوالجلالنى جمالينى كورار بولسه
 خواجه احمد نفسنى توتماق كيراك

هر کیم قیلسه طریقتنی دعواسینی
 اول قدم شریعت کا قویماق کیراک
 شریعتنی ایشلارنی ادا قیلیب
 آندین سونکرده بو دعوانی قیلماق کیراک
 شریعتسیز دم اورماسلار طریقتده
 طریقتسیز دم اورماسلار حقیقتده
 معرفتسیز دم اورماسلار حقیقتده
 بارچه سینی شریعتدین سورماق کیراک
 آندین سونکرده برابر کیراک ارادتلیک
 بولمیش بولسه اول پیری دین اجازتلیک
 شریعت کا موافق راست کرامتلیک
 شونداغ ایرنی ایتاکی نی توتماق کیراک
 هرکیم بیلما ی بوایشلارنی شیخ مین دیسه
 کرامتدین ولایت غه خیر بیرسه
 باطل ایرور اکر روح الامین ایرسه
 آنداغ شیخ دین یراق - یراق قاچماق کیراک
 ارادتسیز اجازتسیز مرشد بولماس
 طریقتنی نشانه سین هرکز بیلماس
 مونداغ کیشی ارادت غه لایق بولماس
 اول کمراد دین یراق - یراق تورماق کیراک
 ارادتنی بیرکیل اهل اجازت کا
 قایم بولغیل تونی - کونی ریاضت کا
 سانیب آنی قوللوغی نی عبادت کا
 قوللوغی ده بیلنی باغلاب تورماق کیراک

آندین سونکرده مجاهده تونین کیوب
 ریاضت نی بوته سیده ایریب آقیب
 من - من لیک دین اوتوب اوزی نی صاف قیلیب
 عزت رختین ساتیب خوارلیق آلماق کیراک
 اوشبو تورور ایرانلارنی قیلغانلاری
 طالبلارغه بیلسون دیبان ایغانلاری
 راست دور بوسوز بیلکیل یوقتور یالغانلاری
 جان قلاق ی برلان مونی بیلماک کیراک
 صدقی برله هر کیم قبول قیلسه مونی
 اعتقادی برله بولسه تونی - کونی
 یادی برله مشغول بولسه یلدا تونی
 ایرانلاردین همت یاری قولماق کیراک
 ارادت سیز اوشبو یولغه کیرمادیلار
 انابت سیز یولغه قدم قویمادیلار
 اجازت سیز یریم نفس اورمادیلار
 مرید بولغان بو صفت لیغ بولماق کیراک
 هر کیم کیرسه اوشبو یولغه بیلین باغلاب
 قول خواجه احمد کیراک اوزنی خادم ایلاب
 نیتی نی خدایی غه درست ایلاب
 توجه نی عزیزلارکا قیلماق کیراک

(۹۲)

حکمت

عزراییل بیرکون کیلور سدت برلان
 اسیغ تن دین عزیز جان نی بیرماق کیراک
 بیش کونلوك نقد عمری نی قولدین بیریب
 چارده تابمای آخر بیرکون اولماق کیراک

اوغول - قيزينك ييغلاب قالسه فرياد اوروب
 مال ملكينك مونده قالسه حيران بولوب
 دشمنلارينك قوانوشور سيني كوروب
 بويون سونوب اوزاليبان ياتماق كيراك
 ميراث ديبان باش اياغينك باغلاكايلار
 اسىغ سونى باشدين قويوب چايقه كايلار
 تورت طرفدين آسته - آسته اوشلاكايلار
 التى قرى بوزدين كفن قيلماق كيراك
 جنازنكنى اولوغ كيچيك كوتارسه لار
 كورستانغه قراب سيني يوروتسه لار
 يىتميش ييرده سؤال سورسه فرشته لار
 بر - بر آنى جوابىنى بيرماق كيراك
 خلايقنى مزاريده عمارتنى
 كورونك انده تورلوك - تورلوك علامتنى
 لحد آتليغ دروازه قيامتنى
 سياستليغ اويغه بارىب كيرماق كيراك
 كيرىب كورسنىق قرانغولوق يوقتور چراغ
 ايچى توله حسرت ايرور اوتلوق فراق
 اولكون سينكا كيم قيلكوسى انده يراق
 تا قيامت تانك آتقونچه ياتماق كيراك
 عمرينك آخر بولغوسى دور بر كون تمام
 بو ايش برلان بارسنىق اكر دار السلام
 حلال قويب يكان بولسنىق دايم حرام
 عذابىنى بارىب انده تارتماق كيراك
 قول خواجه احمد توبه قيلغيل اولماس بورون
 قيزيل يوزونك كورده ياتىب سولماس بورون
 يىلان چيان كورينك ايچره تولماس بورون
 قضا كيلسه رضا بولوب تورماق كيراك

(۹۳)

حکمت

قراکوندور اوشال ساعت که دنیا دین سفر قیلسانک
زن - فرزند مال ملکک بار سندن کذر قیلسانک
سنی قویماس اجل هرگز نیچه حکمنک روان بولسه
حکومت برله عالمنی اکر زیر و زبر قیلسانک
محاصل دور خلايقنه اجل مثل سپاهلاردیک
غضب برله آلور جاننک نچه مازاریلار قیلسانک
بولوبدور بارچه غه فرمان اولومنی شربتین ایچمک
قاجوب آندین قوتولمزسن نیچه آندین حذر قیلسانک
خلایقیننک مزاریغہ باریب بر - بر تماشا قیل
اولوکلاردین آلوب عبرت کیراک بغرنک کباب قیلسانک
همیشه یخشیلیق قیلغیل کیترسن اوشبو دنیا دین
قیامت آب رویی غه کیراک خون چکر قیلسانک
خدا فرماننی توتغان بولور اول اولیالاردین
بولورسن اولیالاردین ریاضت کوبراک قیلسانک
قونمه مال و ملکک کا قورتور بو اجل آخر
قرا بیرکا کیررسن اخر نیچه ما کر و فر قیلسانک
خواجه احمد معصیت برله حیاتنک قیلمغیل ضایع
بولورسن لایق حضرت اکر طاعت سحر قیلسانک

(۹۴)

حکمت

ایا دوستلار آخر زمان بولدی کورونک
بی دین کافر بو عالمغه تولدی کورونک
حق قوللوغین قویوب بارجه فاسق بولدی
اینک اوچون قهار غضب قیلدی کورونک

آخر زمان نشانی اول خیرات کیتی
 قهار ایکام قهر برله حکمین ایتی
 خلایق لار فاسق بولوب دینین یوتی
 اسلام ضعیف بولوب قولدین چیقیتی کورونک
 روزده، نماز، ایمان، اسلام قولدین کیتی
 کل یوم بتر دیبان حدیث اوتی
 اریغ رسول ایتقانلاری ایمدی ییتی
 بو دنیانی قرانغولوق باستی کورونک
 عالم لار بارچه علمین مالغه ساتی
 ییلیب کوروب اوزلارینی اوتقه اتی
 اوزی عمل قیلمای خلقه علم اورکاتی
 دنیا اوچون دینلارینی ساتی کورونک
 والله حلال هیچ قالمدی بولدی حرام
 اسیر قیلیب فرزندلارین سالدی کورونک
 فعلمیزدین بیزکا غضب قیلدی خالق
 شکر ایتما دوک بیزکا جزا کوب نه جاغلیق
 خیر احسان ایشیکین سلطان قیلدی باغلیق
 آنینک اوچون یوزمینک بلا تولدی کورونک
 کون کورمکان ایسز محبوب مه پاره لار
 یورک لاری قورقوب بولدی صد پاره لار
 درد لاریغه دوا تابمای بیچاره لار
 مونکلوع بولوب کافرغه خوار بولدی کورونک
 جان دین آرتوق کورکان جانانه لار
 یوزی آی کوزی چولپان مستانه لار
 بویلارینی هیچ کورمکان بییکانه لار
 کافرلارغه زار و حیران بولدی کورونک

يىغلايورلار فغان اوروب آى واى انام
 كورمكايدوك مونداغ قاتىغ كونلارنى خام
 بونه حسرت تيو زارين ايدى كورونك
 اتام تيو كيچه - كوندوز يىغلايورلار
 آريب قالغان بوتهلاردك بوزلاريورلار
 يتيم قالغان قوزى ينكليغ منكرايورلار
 نالشيغه تاشلار ايريب سوبولدى كورونك
 نه مشكل دور كلنى اوزوب غنجه سيدين
 اناسينى جدا قىليب بچه سيدين
 كوندوزينى قرا قىليب كيچه سيدين
 باشلاريغه قرانغونى سالدى كورونك
 نه قىلغانچه سيزدين جدا بولدى انا
 سونى سندن جدا قىلدى قادر خدا
 قيامت نيك تانكى آنى وا حسرتا
 جانمىزكا مونداغ جفا سالدى كورونك
 اتالارى قان يىغلايور تابماى علاج
 باشلاريغه قرا كييب يوز يرتيب ساج
 قالدى موكين بالالاريم آج يلالكاج
 آد اوروب ايچ بوينى ايزدى كورونك
 انالارى ترملوبان قالدى حيران
 كل يوزلارين زعفرانديك سرعرتيبان
 واى قلونوم بوتام دييان آد اوروبان
 يقا يرتيب ساجلاريني يولدى كورونك
 جاندين عزيز جان ايچينده مهربانم
 نور ديدم، جكرينديم، غمكساريم
 ايكي كوزوم ياروغلوغى، تند جانم
 قايدە باردىنك تيو فرياد قىلدى كورونك

كوركانيوز قيتنب ينه سيني ايچان
 اكر كورماي اولار بولسنگده نه ارمان
 ييغلای - ييغلای، كوزی كريان، بغری بريان
 نه قيلغوسين ييلمای حيران قالدی كورونك
 حسرت داغين كونكلوميزه سالدی تمام
 ايشينك بونه قدرت تورور ای خاص عام
 قدرتين كورشنده ادهلار بولدی علام
 حق يانيب مونداغ جزا سالدی كورونك
 قيزيل كل ديك نارسیده اول اوغلانلار
 دنيا اولوب كيم كوروبدور مونداغ داغلار
 مجنون يانكليغ ديوانه ديك بولدی ساغلار
 عاجز بولوب مسلمانلار قالدی كورونك
 ايركیم بولسه شاه مردان بولغای ايرديم
 بو ايلکیم کا آلماس قيليج آلغای ايرديم
 بو كافرلار بارچه چری سینی قيرغای ايرديم
 علاجيم يوق تيو ارمان قالدی كورونك
 آق سينه منی بجل قيلديم ای فرزندیم
 نه بازوق بير خدايمغه جکربندیم
 اولومدين هم بتر بولدی مينينك درديم
 بو دنياده هجران داغين سالدی كورونك
 بارچه داغلار ايچره مشكل هجران داغی
 هجراندين هم بتر ايرميش فرزند [او] داغی
 بورا کیم دين سيريليپ ايچيم کا قان تولدی كورونك
 بلا كوبتور مونداغ هرکز بلا يوقتور
 ترملتويان بيزدين كافر ايريب ايلتور
 اجل يتيب كوركا كيرمك نه دولت دور
 مونداغ ديوان نوحه فرياده قيلدی كورونك

سىن سىز منكا طعام يمك قبقزىل قان
 سىن سىز منكا ينكا كىراك بوتنده جان
 سىن سىز منكا قرانغودور اوشبو جهان
 سىنينك دردینك تیو حسرت قیلدی كورونك
 انا فرزند بر بریغه چوغلاشتی لار
 فریاد اوروب قوجاغلاشیب ییغلاشتی لار
 حسرت ایتوب ارمان بيله ییغلاشتی لار
 نه مشكل دور الوداع ديب قالدی كورونك
 بیل بولارنى قرانغولوق باستی تمان
 بیزكا غضب قیلدی بو كون قادر اوغان
 كافر ییغیب آلیب چیققی شاد و خندان
 مسلمانلار فریاد اوروب قالدی كورونك
 توبه دینك لار نه قدرت دور خلقی جهان
 آخر زمان نشانلاری بولدی عیان
 غم داغینه یوز تسیلی قیلدیم بیان
 تانك عجایب كونلار ایمدی بولدی كورونك
 ازل كونده ایذیم بیزكا قیلدی تقدیر
 بیزدین اوتوب آنچه خطا قیلدوق تقصیر
 آنینك اوچون نارسیده بولدی اسیر
 فعلیمیزدین بیزكا جفا سالدی كورونك
 نه اناده رحم قالدی نه آتاده
 اغا اینی بر بریغه ماجرا ده
 مسلمانلار دعوی قیلور ایچار باده
 مستلیق بیلان قرینداش دین تاندی كورونك
 كورماسموسیز زمانه لار جوش ایلدی
 بورونغی قدر دانلار هیچ قالمادی
 قدر بیلماس ناكس لاركا اورون تیکدی
 عالم درویش یخشى لار خوار بولدی كورونك

ناكس، خسييس، بى ديانت قوللار حاكم
 من - منليك حددين اشيب بولدى ظالم
 خلق ايچنده خوار بولدىلار درويش عالم
 حمايتى خلقنى كافر بولدى كورونك
 كونكللارنى توتى تمن قرانغولوق
 بيزكا يوقتور ايمدى كورماك بر ياروغلوق
 يولدين آزيب شريعتنى پاس توتما دوق
 دين قالبيان بل مسلمان بولدى كورونك
 ديانت سيز، خسييسلارنىنك خطرى يوق
 دنيا مالين ييغيب هرگز تويارى يوق
 پر زور بولوب اولوم دين هيچ خبرى يوق
 او فردنىنك دين دنيا بولدى كورونك
 قول غريب نينك سوزى تقليد تحقيق ايماس
 دردى يوقتور بو سوزلاركا قان ييغلاماس
 غيب علمين حقدن او كون كيমে ييلماس
 والله اعلم بالصواب ديب ايدى كورونك

(۹۵)

حکمت

اى كونكل قىلدنك كناه هرگز پشيمان بولمادين
 صوفى مين ديب لاف اوروب طالب جانان بولمادينك
 حيف عمرونك اوتى بير لحظه كريان بولمادينك
 صوفى نقش بولدونك ولى هرگز مسلمان بولمادينك
 صوفى ليغ شونداغ مودور دايم ايشينك غفلت بيلان
 دانه تسبيح قولونكده تىللارنك غيب بيلان
 سله چل پيچ اورارسين نفس بد عزت بيلان
 صوفى نقش بولدونك ولى هرگز مسلمان بولمادينك

صوفى بولسنىك صاف بولغىل جرم عصيان بولماسون
 طاعت تقوى قىليب كونكلونك پريشان بولماسون
 جلن دلدە يىغلاغىل محشرده يالغان بولماسون
 صوفى نقش بولدونك ولى هرکز مسلمان بولمادينك
 صوفى ليق شرطى دورور تونلار قوبوب قان يىغلاماق
 هر جفاغه صبر ايتوبان بىلىنى محكم باغلاماق
 طالب الله بولوب هر يخشى سوزنى سوزلاماق
 صوفى نقش بولدونك ولى هرکز مسلمان بولمادينك
 صوفيا طاعت قىلورسين بارچهسى عجب و ریا
 جان و دل دنياغه مغرور تىللارينكده آه و آه
 جان بيوروده بولغونك نور ايماندين جدا
 صوفى نقش بولدينك ولى هرکز مسلمان بولمادينك
 صوفى بولماي نىلاسون اوידە قىلورغه ايشى يوق
 صوفى ليغ دعوى قىلور خلقغه بيورورغه آشى يوق
 آه و آه ديرلارينه كوزيده قطره ياشى يوق
 صوفى نقش بولدونك ولى هرکز مسلمان بولمادينك
 صوفى بولوب نفس اوچون هر دم ايشيك كا باقهسين
 نذر آليب كىلديموديب هر دم كيشيك باقهسين
 لعنتى اللهنى بوينونك كا هر دم تاقهسين
 صوفى نقش بولدونك ولى هرکز مسلمان بولمادينك
 صوفى مين ديب لاغ اورارسين سوز اغانينك قانى
 اشك سرخ و روى زرد و چشم خونبارينك قانى
 مرشد كامل، مكمل راه مردانينك قانى
 صوفى نقش بولدونك ولى هرکز مسلمان بولمادينك
 صوفيا بى غم يورارسين دائه تسبيح آليب
 دنياغه مغرور بولوب دين ايشينى آرقه ساليب
 قورققىل ايمدى قورققىل ايمدى خداغه يالباريب
 صوفى نقش بولدونك ولى هرکز مسلمان بولمادينك

صوفی بولوب مال کس آلماق اوچون قیلدینک جدل
 ظاهرینک صوفی نمادور باطینک دون و دغل
 ای بی خبر ای بی خبر شرمنده سین روز ازل
 صوفی نقش بولدونک ولی هرکز مسلمان بولمادینک
 دانه تسبیح آلیب ایل کوزیغه خوب صوفی سین
 نفس بدنی آلدیده ترسا جهودنی توفی سین
 بنده لیغ قیلنک خداغه یوخسه سک کوفی سین
 صوفی نقش بولدونک ولی هرکز مسلمان بولمادینک
 صوفیا اوز طورینکا یالغوز خداغه بنده سین
 اصلینکا باقسنک اکر عالم ایچنده کنده سین
 پر کنه و پر خطر هم عاصی و شرمنده سین
 صوفی نقش بولدونک ولی هرکز مسلمان بولمادینک
 صوفیا قیلدینک محبت دعوی سین دیوانه بول
 مال و ملک و خانماندین کیچیکل و بیکانه بول
 کیم خدا دیب سوزلاسه مینک اورکولوب پروانه بول
 صوفی نقش بولدونک ولی هرکز مسلمان بولمادینک
 صوفیا دعوی عشق قیل بارجه دین بیزار بول
 اویقونی ایلاب حرام تونلار قوبوب بیدار بول
 دردی یوق بیدردنی کورسنگ قاجقیل و آزار بول
 صوفی نقش بولدونک ولی هرکز مسلمان بولمادینک
 احمدا سین صوفی بولسنگ صوفی لیغ آسان ایماس
 حق رسول صوفی بولوب دنیا مالین سویکان ایماس
 دنیانی سویکان کیشی بی شک ییلینک انسان ایماس
 صوفی نقش بولدونک ولی هرکز مسلمان بولمادینک

(۹۶)

حکمت

حق تعالی پرتو سالدی جانیم کوییدی
کیلینک ییغلینک ذاکر قوللار ذکر ایتالیک
سحر وقتده پیر مغان باقیب سوردی
کیلینک ییغلینک ذاکر قوللار ذکر ایتالیک
ذاکرلارغه وعده قیلدی قادر خدا
کور ایچنده عطا قیلدی حوری لقا
ذاکرلارنی تورار جای دارالبقا
کیلینک ییغلینک ذاکر قوللار ذکر ایتالیک
ذاکر بولسه شاکر بولسه ییری جنت
قانلار آقسه کوزلاریدین قیلماس منت
امت بولسنک ذکرین ایتماک سیزکا سنت
کیلینک ییغلینک ذاکر قوللار ذکر ایتالیک
ذاکرلارکا خدا اوزی وعده قیلدی
فاذکرونی اذکرکم آیت کیلیدی
فردوس آتلیغ جنتی دین محضر کیلیدی
کیلینک ییغلینک ذاکر قوللار ذکر ایتالیک
ذاکرلاری هر نفسده ذکرین ایتار
توبه قیلیب ایکری یولدین راستغه قیتار
ذکرین ایتسه آسته - آسته شوقی آرتار
کیلینک ییغلینک ذاکر قوللار ذکر ایتالیک
ذاکرلاری حلقه ایچره پرتو کورار
آنینک اوچون حلقه ایچره اوزین اورار
معشوقی نی کورکان زمان جانین بیرار
کیلینک ییغلینک ذاکر قوللار ذکر ایتالیک

يالغان عاشق معشوقيدىن جانين ايار
 عقبى يولین آرقه تاشلاب دنیا سويار
 هو حلقه سين قورغان ييردين ايلار فرار
 كيلينك ييغليكنك ذاكر قوللار ذكر ايتاليك
 "الكذاب لامتى" دیدى سرور
 بو سوزلاركا يول بير کوچى هادى رهبر
 يالغانجى نى امت ديماس اول پيغمبر
 كيلينك ييغليكنك ذاكر قوللار ذكر ايتاليك
 رحمن ايكام چين عاشق نى يولين آچار
 محبت نى شوقى برله ياشين ساچار
 الله تيو قايدى بارسه شيطان قاچار
 كيلينك ييغليكنك ذاكر قوللار ذكر ايتاليك
 ذاكرلارى ذكرين ايتيب ناله قيلور
 كوز ياشينى سريغ يوزكا ژاله قيلور
 بيابانلار كيزيب اوزن واله قيلور
 كيلينك ييغليكنك ذاكر قوللار ذكر ايتاليك
 ذاكر قوللار حق فرمانين محكم توتار
 اخلاص برلان الله تيو قانلار يوتار
 حلقه ايچره كيركان وقتده جاندين اوتار
 كيلينك ييغليكنك ذاكر قوللار ذكر ايتاليك
 بى طهارت ذكر ايكانكا لعنت ياغار
 اوشل كوني بولغان فرزند شيطان توغار
 اولار وقتده اول كيليب شيطان باقار
 كيلينك ييغليكنك ذاكر قوللار ذكر ايتاليك
 بى طهارت ذكرين ايتكان ايمان ايتماس
 اولار وقتده حق مصطفى قولين توتماس
 سبحان ايكام كناهينى هرگز اوتماس
 كيلينك ييغليكنك ذاكر قوللار ذكر ايتاليك

مؤمن بولسنىڭ بى طهارت ذكرىنى ايتىمە
 كرامەتلار ايتىپ ھلقە دىنىنىڭ ساتمە
 مىللىيەتلىك دىنىي قىيلىپ كافر كىتمە
 كىلىنىڭ يىغلىنىڭ ڤاكر قوللار ڤاكر ايتالىك
 ڤاكر بولسنىڭ ذكرىنى ايتماي ھركىز ياتمە
 نادان بىرلە ناچىنىس لاركا ھىچ سوز قاتمە
 مىناققلار ھالدىن سورسە بىر سوز ايتمە
 كىلىنىڭ يىغلىنىڭ ڤاكر قوللار ڤاكر ايتالىك
 قول خواجه احمد يامانلارنى يمانى سىن
 بارچە بىغداي ايل توتماكان سامانى سىن
 يولدىن آزغان كىمراھلارنى نادانى سىن
 كىلىنىڭ يىغلىنىڭ ڤاكر قوللار ڤاكر ايتالىك

(۹۷)

حکمت

اىزىم يادى اولوغ ياددور ايتور بولسم
 عىل يىنكىلىغ سچوك بولور تىلىم مىنىڭ
 اوزوم فقير قىلدىم مۇقر بولدوم ھقير
 قىنات قاقار اوجار قوشدىك كونكلوم مىنىڭ
 تورلوك عىشىم، تورلوك ايشىم، مونكلوغ باشىم
 ايردى جانىم، كىتى ھوشوم، آقتى ياشىم
 يازوق بىلان تولدى توكال ايچى تاشىم
 بى نىازىم آجا بىرسون يولىم مىنىڭ
 كوزوم توشتى، كونكلوم اوجتى عرىقە آشتى
 عمرىم كىچتى، نىسىم قاچتى، بىرلىم تاشتى
 كاروان كوچتى، مىزل آشتى، ھارىب توشتى
 سر اولاشتى نىتاك بولغان ھالىم مىنىڭ

صورت مونده سیرت آنده قدرتینده
 اوزون تونده، یاروق کونده، کونکلوم آنده
 یورار تونده بولوب بنده باری قانده
 سورسه آنده یازوق تورور تیلیم منینک
 ایچتیم شراب، بولدیم خراب، اصلیم تراب
 کیلیم کوراب، کونکلوم سراب، عشقه پراب
 حقدین خطاب کیلسه کورماس قوللار عذاب
 بولاق ینکلیغ آقار کوزدین یاشیم منینک
 توشتم اوزار، براق توزار، کیمسه بازار
 دنیا بازار ایچره کیریپ قوللار آزار
 باشیم بیزار، یاشیم سیزار، قانیم توزار
 آتیم احمد ترکستاندور ایلیم منینک

(۹۸)

حکمت

ایا دوستلار مصطفی دین بیان ایلای
 قولاق سالکیل خاص امتی بولای دیسنک
 اول رسول مجتبی نی عیان ایلای
 قولاق سالکیل خاص امتی بولای دیسنک
 یوز مینک ندا حقدین کیلدی ایشیت آنکا
 امتلارنینک حواله سین قیلغیل مینکا
 جمله سینی باغشلایین آنده سینکا
 قولاق سالکیل خاص امتی بولای دیسنک
 آتام - آنام دیمادیلار دیدی امت
 حمد ثنا تینمای ایتیپ بولغیل الفت
 قیامتده کورمکای سین حقدین کلفت
 قولاق سالکیل خاص امتی بولای دیسنک

وا دريغا اوتى عمروم قانى عشقيم
 امت ايدىم دنيا سري بولدى ذوقيم
 باطن كذاب ظاهریمده باردور دلقيم
 قولاق سالکیل خاص امتى بولای دیسنك
 ییغلامایمو یولده قالديم عملیم یوق
 امت دیدى آنينك سري جدلیم یوق
 باشیم کیتسه بو یول لاردین تاييریم یوق
 قولاق سالکیل خاص امتى بولای دیسنك
 کوجوم ييتيب كعبه ساری بارمادیم من
 عالم لارنى نصيحتین آلمادیم مین
 حقدین قورقوب یخشی یولغه کیرمادیم مین
 قولاق سالکیل خاص امتى بولای دیسنك
 یاشیم ييتيب عمروم اوتوب توبه قیلماي
 آخرتني اسبابنی قولغه آلماي
 یخشیلارنى خاك پای بولوب یورماي
 قولاق سالکیل خاص امتى بولای دیسنك
 امت بولسنك کیچه - کوندوز طاعت قیلغیل
 عقبی ساری بارغل آنده راحت کورغیل
 عاقل ایرسنك ییغلامقنى عادت قیلغیل
 قولاق سالکیل خاص امتى بولای دیسنك
 چین امتی جاندين کیچیب دنيا قویدی
 اولار وقتده امتیم دیب ناله قیلدی
 واله بولوب بلبل صفت حقنى سویدی
 قولاق سالکیل خاص امتى بولای دیسنك
 درود ایتکیل امت بولسنك ای بی خبر
 رسول الله سوزین ایتدیم کان کوهر
 رسول ایدی دنيا بیر کون قیلور ضرر
 قولاق سالکیل خاص امتى بولای دیسنك

وای اَمْتِیم. وای اَمْتِیم دیدی احمد
 آنینک اوچون سبحان ایذیم قیلدی رحمت
 آمین دیکیل قیامت کون قیلغای شفقت
 قولاق سالکیل خاص امتی بولای دیسنک
 قول خواجه احمد یولغه کیرکیل حالافرصت
 الله دیکیل عمرونک اوتی دم غنیمت
 قیدا بارسنک تکبیر ایتیب قیلغیل صحبت
 قولاق سالکیل خاص امتی بولای دیسنک

(۹۹)

حکمت

مینک تومن تورلوك خطالار میندین اوتسه عفو قیل
 کفتکوی ناروالار میندین اوتسه عفو قیل
 کر تلاوت قیلمشیمده بو کلام اللهنی
 سهو، عصیان، خطالار میندین اوتسه عفو قیل
 اووقوغانده غافل اوتسه یا غلط نقصان بیله
 هر نیچوک بیجا بجالار میندین اوتسه عفو قیل
 مدّ بیلان اعراب و تشدیدلارنی تغیر ایلاسام
 بو کلامه هر خطالار میندین اوتسه عفو قیل
 فحش اوقوسام بیر کلمه سینی یا بیر حرفی نی
 مونداغ ناتام دعاالار میندین اوتسه عفو قیل
 آیت وعده وعیدنی قیلمسام مین تفرقه
 فهم قیلمای نارسالار میندین اوتسه عفو قیل
 عزت اکرام قرآننی بجا کیلتورمسام
 بی ادبلیک بی ابالیغ میندین اوتسه عفو قیل

حضرتینکده من کبی قولنی خطاسی کوب ایرور
 رو سیاهلیک هر خطالار میندین اوتسه عفو قیل
 خواجه احمد مسکینی نقصانی کوبتور دنیاده
 کرچه یارب مینک خطالار میندین اوتسه عفو قیل

(۱۰۰)

حکمت

عقبی خبرین ایشیتیب دنیانی سالیب کیتارم
 توشدوم ایرانلار بحریکا دنیانی سالیب کیتارم
 ایرانلار دنیا دیمدی دنیا غمین یمادی
 حقدین اوزکانی دیمادی دنیا سالیب کیتارم
 موسی عمران قالمادی تختی سلیمان قالمادی
 مینک یاشلیغ لقمان قالمادی دنیا سالیب کیتارم
 دنیا دیکان آزار ایرمیش عاقل قوللار بیزار ایرمیش
 جاهلار برله یار ایرمیش دنیانی سالیب کیتارم
 سلطان خواجه احمد یسوی ایدی بو حکمتنی تمام
 ایشیتسون دیب جمله جهان دنیانی سالیب کیتارم

(۱۰۱)

حکمت

الله دیکان بندهنی جاین جنتده کوردوم
 حور غلمان جمله سین قارشو آلدیده کوردوم
 فاذکرونی ذکرینی ایتکان قوللار دایما
 جمله سین همراهی بهشت عدنیده کوردوم

تونی - کونی اوخلامای "هو" ذکرینی ایتقانلار
 ملانك لار همراهی عرشنی اوستیده کوردوم
 خیر سخا قیلغانلار یتیم کونکلین آغانلار
 چهار یارلار همراهی کوثر لبند کوردوم
 قاضی بولغان عالملار پاره رشوت ییکانلار
 انداغ عالم جایینی نار سقرده کوردوم
 مفتی بولغان عالملار ناحق فتوی بیرکانلار
 انداغ مفتی جایینی صراط کوفروکده کوردوم
 جماعت کا بارمایین ترك نماز قیلغانلار
 شیطان برله بر بیرده درك اسفلده کوردوم
 ظالم بولوب ظلم ایتکان مؤمنلارنی آغریتکان
 قرا یوزلوك محشرده قولین آرقده کوردوم
 قول خواجه احمد کان آجتی در کوهرنی ساجتی
 تینکلامکان بو سوزنی غفلت ایچنده کوردوم

(۱۰۲)

حکمت

نیت قیلدوق کعبه کا رضا بولونك دوستلاریم
 یا اولکایمیز کیلکایمیز رضا بولونك دوستلاریم
 نیت قیلدوق کعبه کا حق مصطفی روضه کا
 نصیب قیلغای بارجه کا رضا بولونك دوستلاریم
 رضا بولونك اوزوم دین یخشی یمان سوزوم دین
 اوتونك مینی یوزم دین رضا بولونك دوستلاریم
 دوستلار بیزنی یوقلاغای فاسقلار کوب اوخلاکای
 مسجد ساری کیلماکای رضا بولونك دوستلاریم

سردین بولدی اشارت مونده قیلدوق عمارت
 دوستلار قیلغای عبادت رضا بولونك دوستلاریم
 کعبه ساری کوجالوک ظالملاردین قاجالوک
 اوغل - قیزدین کیچالوک رضا بولونك دوستلاریم
 تیلیم سورسام قرار یوق غریب اولسه سورار یوق
 ییمیشلارده حلال یوق رضا بولونك دوستلاریم
 کیچتی قولنك جانیدین چیقتی خلقنی سانیدین
 دوستلار بارکای سونکیدین رضا بولونك دوستلاریم
 خواجه احمد یوم کوزونکنی رضا بولونك دوستلاریم

(۱۰۳)

حکمت

نیچه ییلیق مهربانیم جان ایدیلار دوستلاریم
 بو وجودوم شهرینی فانی قیلادور دوستلاریم
 بو قفسرنی طوطیسی پرواز ایتادور اوجکالی
 بیر قرانغو شعله سیز بیرکا بارادور دوستلاریم
 ای منی یارانلاریم همت توتونك ایمانیمه
 دشمنیم ایمانیمه زحمت برادور دوستلاریم
 اوشبو جان بیزلار بیلان بیر نیچه ییللار ایدی
 حق تعالی حکمی برلان عزم ایتادور دوستلاریم
 بو منی اعضالاریم جانیم بیلان شادمان ایدی
 جان چیقارغه کل اعضام تتراشادور دوستلاریم
 امر حقه بارجه خلق عالمین بولدی رضا
 اول حقیقت بندلار دایم رضادور دوستلاریم
 قول خواجه احمد طوطیسی پرواز ایتادور اوجکالی
 نیلاسون مسکین حکم خدادور دوستلاریم

یولغه کیرکان ایرانلاردین یولنی سورمای
 بیغلامایمو ای دوستلاریم خطا قیلدیم
 حق ذکرینی کیچه - کوندوز ورد ایلامای
 ایا دوستلار اوز جانیمه جفا قیلدیم
 الله یادی کونکلارنی روشن قیلغان
 عاشقلارغه خدا اوزی وعده قیلغان
 عشق نسیمی مصطفی‌غه تحفه کیلکان
 اول سبیدین کوز یاشیمنی کواه قیلدیم
 الله ایتور عاشقلاریم براق سوار
 حق ذکرینی ایتکانلارکا رحمت یاغار
 کوب بیغلاغان دیداریمنی بی شک کورار
 روز محشر دیداریمنی عطا قیلدیم
 وعده قیلدی عاشقلارغه یوز مینک براق
 عالم خلقی ملامتی آنکا یراق
 بو عالمده ایل کوزیکا یاتغان جراق
 عقبی ایچره یوز مینک کوشک‌لار عطا قیلدیم
 دردسیز آدم، آدم ایرمس مونی آنکلانک
 عشق‌سیز آدم حیوان جنسی مونی تینکلانک
 کونکلونکیزده عشق بولمسه منکا بیغلانک
 کریان‌لارغه خاص عشقیمنی عطا قیلدیم
 بنده بولسنک من - من لیک‌نی زینهار تاشلا
 سحرلارده جانینک قیناب تینمای ایشلا
 یولدین آزغان کمراه‌لارنی یولغه باشلا
 بیر نظرده دل‌لارینی صفا قیلدیم

چين دردليك كا اوزوم دارو اوزوم درمان
هم عاشق مين، هم معشوق مين اوزوم جانان
رحم ايلاييم آتيم رحمن ذاتيم سبحان
بیر نظرده باطن لارين صفا قیلدیم
تآنك آتقونچه حق یادینی آیغان کیشی
تاغ جولنی بوستان قیلور آقان یاشی
الله ایتور اوزکا برله یوقتور ایشی
اول عاشقنی خلایق دین جدا قیلدیم
عشق بادینی بیرکا سالسام بیر کوتارماس
دفتر قیلسام تا تریک سین بیتیب بولماس
حقنی بیلکان بیک و خان و خلقنی بیلماس
اول بنده منی اوز یولومده دوتا قیلدیم
مال و پلنی پروا قیلماس عاشق کیشی
یول اوستیده تفریق بولوب عزیز باشی
آندین سونکره نورغه تولور ایچی تاشی
تآنکلا بارسه محشر آرا پادشاه قیلدیم
حق دین قورقوب مال و پلنی سویماکاننی
حقنی ایتیب بیر دم یاتیب اویماکاننی
یاتسه قویسه حق ذکرینی قویماکاننی
آچتیم باطن کوزلارینی بینا قیلدیم
روژه توتوب خلقغه ریا قیلکانلارنی
نماز اوقوب تسبیح قولغه آلکانلارنی
شیخ مین تیو اوزکا بنا قویغانلارنی
آخر دمدد ایمانی دین جدا قیلدیم
حقه عاشق بولوب ایدی قول خواجه احمد
صدقی برلان ایشیتکانکا یوز مینک رحمت
دعا قیلای کورمکایلار محنت زحمت
عاقل ایرسنگ بیر سوز برلان ادا قیلدیم

ایا دوستلار حسب حالیم بیان ایلای
 نه سبب دین حقدین قورقوب غارکا کیردیم
 چین دردلیک کا بو سوزلارنی عیان ایلای
 اول سبب دین حقدین قورقوب غارکا کیردیم
 غار ایچنده کیچه - کوندوز طاعت قیلدیم
 تطوع نماز اوقوب عادت قیلدیم
 هر نه جفا تیکسه آنکا طاقت قیلدیم
 اول سبب دین حقدین قورقوب غارکا کیردیم
 غار ایچنده مصطفی نی حاضر کوردوم
 سلام قیلیب ادب برله بیخود توردوم
 عاصی، جافی امتلارنی حالین سوردوم
 اول سبب دین حقدین قورقوب غارکا کیردیم
 غارکا کیرماک رسول الله سنتلاری
 طاعت قیلماق حق رسولنی عادتلاری
 غریبلارکا رحم قیلماق شفقتلاری
 اول سبب دین حقدین قورقوب غارکا کیردیم
 امت بولسنگ کیچه - کوندوز تینمای ییغلا
 بغرینک بیشیب اوپکانک تیشیب یورک دغلا
 اجل کیلسه مردانه وار بیلینک باغلا
 اول سبب دین حقدین قورقوب غارکا کیردیم
 بیر کون سینی عمرونگ برکی بولغای خزان
 اجل کیلمای توبه قیلغیل ایا نادان
 شاید سینکا رحم ایلاکای ایزیم یزدان
 اول سبب دین حقدین قورقوب غارکا کیردیم

چين دردليكنى ايشى ايرور سوز و گداز
 كوز ياشى دور حق قاشيده تحفه نياز
 كيچه كوندوز تينماي قىلغىل روزه نماز
 اول سبب دين حقدين قورقوب غاركا كيرديم
 ايا فرزند امتلارنى دردى اورتار
 فسق فجور كناهلارى تاغدين آرتار
 ديننى قويوب دنيا مالين اوزكا تارتار
 اول سبب دين حقدين قورقوب غاركا كيرديم
 قول خواجه احمد تكبير ايتيب صحبت باشلا
 هاى هوس من - منليكنى ياراق تاشلا
 سحرلارده چار ضرب اوروب تينماي ايشلا
 اول سبب دين حقدين قورقوب غاركا كيرديم

(۱۰۶)

حکمت

محبتنى بازارينده جولان قىليب
 آخرتنى سوداسينى باشلاسام مين
 بو دنيانينك عزتلارين آرقه تشلاب
 خارلىق - زارلىق يوللارنى خوشلاسم مين
 بو يوللارده خارلىق - زارلىق دركار ايرميش
 تسبيح، تهليل، روزه، نماز بيكار ايرميش
 يالغانچيدىن خدا، رسول بيزار ايرميش
 يالغان نماز ريالارنى تاشلاسام مين
 چين كونكلده نماز قىلغىل خدا بىلسون
 خلق ايچنده رسوا بولغىل عالم كولسون
 تفراق صفت خارلىق تارتقىل نفسنك اولسون
 همت بيرسنك نفسيم ييغيب يغلاسام مين

دوستلاریمنی رسوا قیلغان نفس هوا
 آنینک اوچون شیطان لعین قیلور غوغا
 لطف ایلاسک من - من لیکنی قیلای ادا
 ریاضتده جانیم قیناب ایشلاسام مین
 عشق یولیده قطره قطره قانلار یوتای
 رحمن آتلیغ رحمتنکدین امید توتای
 جام شراب توپا بیرسک جانن دین اوتای
 حسرتنکده ایکی کوزوم یاشلاسام مین
 نفسیم مینی اوتدیک یانیب یولیم اوردی
 یوز مینک تورلوک طعام تیلاب دوکان قوردی
 آغزین آچیب هر ایشک کا مینی سوردی
 همت بیرسک ایت نفسیمنی اوشلاسام مین
 عشقیم تاشتی روحم قاچتی قایدین تاپای
 آرقاسیدین عشق آتنی مینیب چاپای
 کمی کورسام خضر ییلب قولین توتای
 خضر و الیاس مدد قیلیب اوشلاسام مین
 کناهیم کوب یرکا سیغماس کیم کا ایتای
 توبه قیلیب ایکری یولن راست کا قایتای
 ندامتده ایتلاریمنی اوزوب تارتای
 صد دریغ دیب بارماق لاریم تیشلاسام مین
 کناه قیلیب توبه قیلمای حددین آشتیم
 نفسیم مینی طغیان قیلدی طرفه شاشتیم
 بحمد الله پیری مغان سای قاچتیم
 قولغه آلیب نفس بدنی اوشلاسام مین
 قول خواجه هر بیر سوزونک دردکا درمان
 طالب لارکا بیان قیلسام قالماس آرمان
 تورتمینک تورث یوز حکمت ایتم حق دین فرمان
 فرمان بولسه تا اولکونچه سوزلاسام مین

تینمایین حضرتنکده الله دیسام
 زار اینکرا بان ذاکر بولوب ربی دیسام
 قول بولونک قولیقینکده بویون سونسام
 بو ایش برله یا رب سینی تابقایمومین
 زکریاتیک بو باشیمغه ارّه قویسام
 ایوبتیک بو تنیمغه قورتنی قویسام
 موسی تیک طور طاغیده طاعت قیلسام
 بو ایش برله یا رب سینی تابقایمومین
 یونس تیک دریا ایچره بالق بولسام
 یوسف تیک قدق ایچره تون - کون بولسام
 یعقوب تیک یوسف اوچون زار اینکراسام
 بو ایش برله یا رب سینی تابقایمومین
 شبلی تیک عاشق بولوب سماع اورسام
 بایزید تیک تون - کون تینمای کعبه بارسام
 کعبه کا یوزم سورتیب زار اینکراسام
 بو ایش برله یا رب سینی تابقایمومین
 معروف تیک اوشبو یولغه قدم قویسام
 منصور تیک جاندین کیچوب دارده قونسام
 دار اوزره شوقلانیان حقنی ایسام
 بو ایش برله یا رب سینی تابقایمومین
 قول خواجه احمد قول لوق ایچره ضابط بولسام
 ذکر ایتیپ ذاکر بولوب ربی دیسام
 ذکرنده شوقلانیب کویوب یانسام
 بو ایش برله یا رب سینی تابقایمومین

اول الست بر بکم دیکاننده
 قالوا بلی دیکانیمنی بیلا آلماسمین
 وما دینکم دیبان ینه سورکاننده
 دینیم اسلام دیکانیمنی بیلا آلماسمین
 آلهیم دین ینه اوچ یول کیلدی خطاب
 مؤمن ارواح ربیم سین دیب بیردی جواب
 جواب ایتمانی کافر قیلدی ایزیم وهاب
 مین هم جواب ایتکانیمنی بیلا آلماسمین
 جمله روح کا شول ساعتده فرمان یتتی
 فرمان بولغاچ دم اوتماين صف قورولدی
 کافر چبده مؤمن بنده اونکده تورودی
 قایسی طرف تورکانیمنی بیلا آلماسمین
 سجده قیلدی ب حقدین ینه فرمان بولدی
 سجده قیلیب بارجه مؤمن اولوش آلدی
 سجده قیلماي قالغانلاری کافر بولدی
 مین هم سجده قیلغانیمنی بیلا آلماسمین
 ای مؤمنلار وهمی برلان بولدوم کریان
 بو غم برلان عقلم حیران یورارکیم قان
 تندین اوتوب دلدین اوتوب اورتادی جان
 نیچوک علاج ایتاریمنی بیلا آلماسمین
 خدایمنی قدرتی غه یتیب بولماس
 شقی، سعید امر قیلدی بیلیب بولماس
 طاقت قیلیب خلق ایچنده توزوب بولماس
 قایسی طرف کیتاریمنی بیلا آلماسمین

بیرنی گبر و بیرنی کافر یهود قیلدی
 بیرنی مؤمن بیرنی کافر یهود قیلدی
 عزایلنی درکاهیدین مردود قیلدی
 نه سببدین قیلغانینی بیلا
 آلماسمین
 کنهیم کوب تاغ دین آغیر طاعتیم آز
 طاعت قیلماي عمرور اوتی قیش و هم یاز
 درکاهی کا بارور بولسام یوقتور نیاز
 نه یوز برلان بازاریمینی بیلا
 آلماسمین
 جاندین کیچکان چین عاشقلار اوزین کوردی
 روز ازل ینه بیرنی عاشق قیلدی
 لطف کرم ایلاب آنکا عشقین سالدی
 آنده دیدار کوراریمینی بیلا
 آلماسمین
 زاهد قیلدی ینه بیرنی طاعت اوچون
 زاهد ینه طاعت قیلمس راحت اوچون
 حور غلمان طوبی ولدان جنت اوچون
 زاهد دیدار کوراریمینی بیلا
 آلماسمین
 آخرتنی یراغینی قیلا آلمادیم
 یوللار اوزاق یول آزوقین آلا آلمادیم
 جاندین کیچیب حق امرینی قیلا آلمادیم
 آزوق سزین بازاریمینی بیلا
 آلماسمین
 تویمای قالدیم دم اوتمایین عمریم اوتی
 ملک الموت کیلماکی هم یاووق یتتی
 ایا دوستلار عمل سیز مین یاشیم قاتی
 نه حال برله کیتاریمینی بیلا
 آلماسمین
 بیر فرصته یتیب کیلماي اوتماي ساعت
 هییتی کا بیر و کوکلار قیلماي طاقت
 فرمان بولسه آلهیم دین ملک الموت
 نیچوک طاقت قیلاریمینی بیلا
 آلماسمین

جان آلورغه اول عزرائيل كيليپ تورسه
 جانينك بيرديپ هييت برله بير چنك اورسه
 اوچ يوز التميش تامورلاريم تترار بولسه
 نه حال برله باراريمنى بيلا آلماس مين
 اهل عيال يوزونك سارى باقيب توركاي
 باقيب توروب سوز ايتورغه تيلينك كيلماي
 رحم ايتمه يقين ايشينك يراق بولغاي
 حيران بولوب نيتاريمنى بيلا آلماس مين
 خدايمنى امرى برله جانيم آلسه
 جانيم آنده باريب تنيم مونده قالسه
 رنكيم مثل برك خزان ينكليغ سولسه
 ايمان برله باراريمنى بيلا آلماس مين
 اهل عيال قورشاب توركاي ييغلاب سيني
 يوغوچى لار تخته اوزره آلغاي سيني
 سونى قويوب پاك ايلاكاي ظاهرىمنى
 باطينىمنى يوغانىنى بيلا آلماس مين
 آندين سونكره كفن تونين كيدوركايلار
 پاك ناپاك ميني ساليب چولغاكايلار
 باش آياغيم محكم توتوب باغلاكايلار
 توبه تونين كيكانىمنى بيلا آلماس مين
 تورت آياغليغ تابوتىمنى كيلتوركاي لار
 ميني ساليب تورت طرفدين كوتاركاي لار
 ثنا ايتيب جنازهمنى اوقوكاي لار
 مين هم ثنا ايتاريمنى بيلا آلماس مين
 آندين سونكره ميني ساليب روان بولسه
 ييتميش ايكي يرده مندين سؤال سورسه
 جواب بير ديب فرشته لار وحشت قيلسه
 نيچوك جواب بيراريمنى بيلا آلماس مين

تابوت برله آلیب تورسه کور باشنده
 یارانلاریم ییغلاب تورکای کوب قاشیمده
 یالغوز ییغلاب قورغوم ایل باشیمده
 آنده نیچوک قیلاریمنی بیلا آلماسمین
 بو حسرتده کور اوی کا کرار بولسام
 الوداع دیب بارجه کیتیپ یالغوز قالسام
 مار کژدم اوفراب تورسه قاچا آلماسام
 نه حال برله قاچاریمنی بیلا آلماسمین
 ای مؤمنلار عجب اوی دور قرانغو کور
 پر وحشتلیک سیاستلیک هیبتی زور
 الله اوزی لطف ایلاسه بولور پرنور
 لطف ایتماسه نه قیلاریمنی بیلا آلماسمین
 مینی قویوب ییتی قدم کیتار بولسه
 منکر نکیر اوشال دمده کیریب کیلسه
 "من ربك" دیب فرشتهلار باقیب تورسه
 ربیم الله دیکانیمنی بیلا آلماسمین
 قول خواجه احمد منزل خطر یوللار یراق
 بارور یرینک یاووق تورور بارمو یراق
 توبه قیلیب اوزین بیلکان آلدی یراق
 مینهم توبه قیلغانیمنی بیلا آلماسمین

(۱۰۹)

حکمت

عشقنک قیلدی شیدا مینی جمله عالم بیلدی مینی
 قایغو سینسین تونی - کونی مینکا سینوق کرکسن
 تعالی الله زهی معنی سین یاراتدنک جسم و جانی
 قوللیق قیلام تونی - کونی مینکا سینوق کرکسن

کوزم آچدیم سینی کوردیم کل کونکلنی سنکا بیردیم
 اوروغلاریم ترکین قیلدیم مینکا سینوق کرکسن
 سوزلاسام مین تیلیمده سین کوزلاسام مین کوزیمده سین
 کونکلیمده هم جانیمده سین مینکا سینوق کرکسن
 فدا بولسون سینکا جانیم توکار بولسانک مینم قائم
 مین قلنک مین سین سلطانم مینکا سینوق کرکسن
 عالم لارکا کتاب کیراک صوفیلارغه مسجد کیراک
 مجنون لارغه لیلی کیراک مینکا سینوق کرکسن
 غافل لارکا دنیا کیراک عاقل لارغه عقبی کیراک
 واعظ لارغه منبر کیراک مینکا سینوق کرکسن
 عالم باری اوجماخ بولسه جمله حورلار قارشو کیسه
 الله مینکا روزی قیلسه مینکا سینوق کرکسن
 اوجماخ کرم جولان قیلام نه حورلارغه نظر قیلام
 آنی - مونی مین نه قیلام مینکا سینوق کرکسن
 خواجه احمد در منم آتم تونی کونی ینار اوتم
 ایکی جهانده امیدیم مینکا سینوق کرکسن

(۱۱۰)

حکمت

سحرلارده قوپوب ییغلاب دعا قیلسام
 دوستلار خواجم مینی بندم دیکایموکین
 یاش اوزینغه قانیم توکوب دعا قیلسام
 دوستلار خواجم مینی بندم دیکایموکین
 درکاهیغه باشیم قویوب ناله قیلسام
 کوز یاشیمنی آقوزوبان ژاله قیلسام
 بیابانلار کیزیب اوزوم واله قیلسام
 دوستلار خواجم مینی بندم دیکایموکین

قاید ابارسام یادین ایتب ییغلاسام مین
 خدمتیدا بیلیم محکم باغلاسام مین
 حسرتیده یوراک بغریم داغلاسام مین
 دیکایموکین دوستلار خواجم مینی بندم
 هرکون یوز مینک قولوم آجیب آمین دیسام
 موسی صفت طور تاغیدا رازین ایتسام
 توقسان توقوز رازین ایتب جانیم بیرسام
 دیکایموکین دوستلار خواجم مینی بندم
 بایزیددیک یتیمش یولی اوزوم ساتسام
 الله تیو دردی بیلان اولوب کیتسام
 ریاضتده اریب ازیب اچیب قاتسام
 دیکایموکین دوستلار خواجم مینی بندم
 الله اوچون فرزندلاریم یتیم قیلسام
 ریاضتده سونکاکلاریم حلیم قیلسام
 اهل - عیال، خانمانیم غنیم قیلسام
 دیکایموکین دوستلار خواجم مینی بندم
 الله دیکان بندهلارنی قولی بولسام
 عاشقلارنی کویوب اوچکان کلی بولسام
 پول اوستیده تفراق صفت یولی بولسام
 دیکایموکین دوستلار خواجم مینی بندم
 الله - الله جانیم الله، دلیم الله
 سیندین اوزکا پناهیم یوق والله بالله
 ییغلاب کیلدیم درکاهینکا شیء لله
 دیکایموکین دوستلار خواجم مینی بندم
 یخشیلارنی صحبتنده ذاکر بولسام
 هر نه جفا تیکسه مینکا شاکر بولسام
 ایوب صفت بلاسیغه صابر بولسام
 دیکایموکین دوستلار خواجم مینی بندم

آستانکغه باشیم قویوب توبه قیلسام
 غیبت قیلغان تیل لاریمنی یوز مینک تیلسام
 کنه قیلغان بندلاریمنی پاره قیلسام
 دوستلار خواجه مینی بندم دیکایموکین
 توبه قیلدیم، توبه قیلدیم قبول قیلغیل
 توبم قبول قیلماس بولسانک جانیم آغیل
 یولده قالدیم، یولده قالدیم قولیم آغیل
 دوستلار خواجه مینی بندم دیکایموکین
 الله اوچون مردانه وار جانیم بیرسام
 اهل عیال خانمانیمی تاشلاب کیتسام
 جان نه بولغای ایمانیمدین بلکه اوتسام
 دوستلار خواجه مینی بندم دیکایموکین
 سحرلارده ایرته قوپوب حقه یانسم
 اولوغ کیچیک کناه لاردین توبه قیلسم
 زاری قیلیب حضرتیکا بویون سونسم
 دوستلار خواجه مینی بندم دیکایموکین
 قهار ایکام سندین قورقوب اویغانسام مین
 کنهیمغه اقرار قیلیب اینکراسام مین
 سحرلارده یقام اوشلاب یالبارسام مین
 دوستلار خواجه مینی بندم دیکایموکین
 تاشقین کیلکان دریالارده یوزلاسام مین
 آزیب قالغان بوته لاردک بوزلاسام مین
 اولار وقتده مینک بیر آتینک سوزلاسام مین
 دوستلار خواجه مینی بندم دیکایموکین
 وا ویلنا ندامت دیب قورقوب قوپسام
 پیر مغان درکاهینی تینمای اوپسام
 یخشی لارنی خاکپای بولوب اولسام
 دوستلار خواجه مینی بندم دیکایموکین

تاناك آتقونچه ييغلاب تينماي قورقوب چقسام
 سبحان دردين آيتيب دوام اينكراب چقسام
 تفراق صفت عاجز بولوب خوارليق تارتسام
 دوستلار خواجه ميني بندم ديكايموكين
 قول خواجه احمد جانينك بيركيل مردانه وار
 جاندين كيچيب يولغه كيرسنگ كوركونك ديدار
 مرادينكنى بيروور سينكا پروردكار
 دوستلار خواجه ميني بندم ديكايموكين

(۱۱۱)

حکمت

محبتنى كوچه سيني كيزكان عارف
 يخشى بيلور خم كانلارنى علامتين
 ارادت دين قوللاريغه حربه آليب
 دفعين ايلار مضرتنى سلامتین
 انداغ عاشق اياقيغه باشين قويسه
 بنا قويماي نفس هوانى كوزين اويسه
 شوق شراين ايچيب تاكه روحى قانسه
 هيچ آغزندن سالماس توبه ندامتين
 يولين تابيب باطن كوزى آچيلكانلار
 خار - خسديك اياغ آستى يانجيلكانلار
 برك كلديك سولوب توزوب ساجيلكانلار
 عار آلماس اول خلايقنك ملامتين
 صوفى كيراك قنيمزىنى قيلسه صافى
 طاعت قيلسه ماننده بشر حافى
 آندين سونكره وعده سيغه بولار وافى
 بيشك كورار هر كيم كشف كرامتين

"رجال لا تلهيهم" ديب ایدی خدا
 اوشل مردان ماسوی دین بولور جدا
 ذکرین ایتیپ هر نفسته اولسه روا
 تاپار هر دم "غوٹ الغیاث" جلالتین
 لاهوت آرا مرید اکر مقام توتسه
 درویش لیکده قرق تورث مقام آندین اوتسه
 شیخ مین تیو بنا قیوب اوتنی یوتسه
 بی مشقت تابماس ایمان حلاوتین
 دور ایاغی یتیب کیلدی ای بی خبر
 ایچرور قویمای نیچه اکر قیلسنک حذر
 واحسرتا ایمانینکده کوبتور خطر
 قوتولماس سین بیرمای آنی امانتین
 قول خواجه احمد ظاهر اعمی یول اداستی
 طالب لارنی صحبتی دین یراق قاچتی
 قریب جوکوب حق یولیغه عقلی شاستی
 تانکلا بارسه کورماس کورنی فراغتین

(۱۱۲)

حکمت

بو عالمده حق دین قورقوب زار اینکراسام
 آخرتده روحوم آرام آلارموکین
 ایرانلارنی باسقان ایزین کوزکا سورسام
 پیر مغان مین یولغه سالارموکین
 باشیم بیریب، بیلیم باغلاب، قیلسام اخلاص
 نفس شیطان چنکالیدین بولسام خلاص
 جان بیرارده مدد قیلسه خضر الیاس
 "غوٹ الغیاث" ختم "یس" قیلارموکین

تاغ جولار كناھیم دین قیلماں طاقت
 هرکون یوز مینک جرم عصیان مینکا عادت
 بو ایش برلان آخرت ده بارمو راحت
 قالارموکین توبه قیلسام عادیلاریم
 آستانه کا باشیم قویوب زاری قیلسام
 غریب یتیم باشین سیلاب دعا آلسام
 حق دین قورقوب دنیا ایشین آرقه سالسام
 سورارموکین خواجه منی حال دلیم
 آدم صفی سنت لارین تیل کا آلسام
 "یا ربانا ظلمنا" دیب ناله قیلسام
 بیابانده کوز یاشینی ژاله قیلسام
 سالارموکین بیر و باریم مینی یولغه
 سحرلارده زاری قیلیب ییغلاسام مین
 جان بیرارده بیلیم محکم بغلاسام مین
 شوقی برلان یورک بغریم داغلاسام مین
 یانارموکین حق چراغی قبریم ایچره
 باشیم تنیم تفراق قیلیب فنا بولسام
 دیدار تیلاب حسرتیده ادا بولسام
 اهل عیال خانمان دین جدا بولسام
 کیلارموکین دوستلار خواجه مینکا رحمی
 شیطان لعین یول دین اوردی حالیم تباہ
 ییغلامایمو نفسیم مینی قیلدی هوا
 عالم خلقی باسیب اوتسه مینی اوا
 تانارموکین کافر نفسیم عزایل دین
 غریب جانیم حق یولیده نذر ایلاسام
 شاه حسین دیک کربلاده سوساب اولسام
 حق شرابین ایچر مین دیب تشنه کیتسام
 قاناموکین آنده بارسام سوسون لاریم

اصحاب لاردىك دين تلاشيب باشم بيرسام
 شهربانو امام لاردىك يىغلاب يورسام
 الله اوچن كافرلاركا اسير بولسام
 رحمن ايكام سينكا مقبول بولارموكىن
 شرمندە مین شرمندە مین قولوم آلکیل
 يولدين آزغان درمانده مین يولغه سالکیل
 الله ديبان فنا بولدوم رحم ايلاکیل
 عاصی لارغه فیض فتح بيارموکین
 ای عاصی لار توبه قیلغیل حق ایشستون
 ناله نکیزدین بیر و کول لار ناله قیلسون
 ملانک لار حق دین تیلاب اولوش بیرسون
 اولوش آغان قولنی غمی بولارموکین
 عقلم، حیران کوزوم کریان، خانه ویران
 حق یولینی بیلالماس مین اوزوم نادان
 ای طالب لار بی طاقت مین قایدان [قاندان] جانان
 جانانیم دین هیچ کیم خبر بیلارموکین
 جانانەنی تاپای دیسنک سحر تورغیل
 عاشق لارنیک مجلسی کا اوزونک اورغیل
 حقنی ایزلاب ییغلاب یوروب ماتم قورغیل
 ماتم قورمای طریقت کا کرارموکین
 حق وصلی غه یتای دیسنک زاری قیلکیل
 ذکرین ایتیب ایرانلارغه یاری بیرکیل
 جفا تارتیب ایرانلاردین اولوش آلکیل
 اولوش آلمای دیدارینی کورارموکین
 قول خواجه احمد هر نه دیرسین بولهوس سین
 حق دین قورقوب آخرت قه غم یماس سین
 باشینک برله تونلار قاتیپ "هو" دیماس سن
 بولهوسنی خواجه م قبول قیلارموکین

(۱۱۳)

حکمت

سحر وقتده قوجوب ييغلاب ناله ايلا
نالشينك دين يير و كوكلار نوا قيلسون
حقه سيغنيب كوز ياشينكنى ژاله ايلا
آندين سونكره حق دردinek كا دوا قيلسون
چين دردليكنى الله سويوب بندم ديدى
اوچ يوز آلتيمش باقيب آنى غمين يدى
ملايكلار ياشين آليب تحفه قيلدى
قان ييغلاغيل ياشينك آليب كواه قيلسون
يوز مينك كناه صادر بولدى بيلالمادينك
توبه قيليب دركاهى كا كيلاالمادينك
خدمت قيليب يخشى دعا آلالمادينك
يازوقلاردين سيني نه ديب جدا قيلسون
بو عالمده رسوا بولوب قان يوتمسنك
شريعتده طريقتده پير توتمسنك
حقيقتده جان تندين پاك اوتمسنك
غفلت لاردين سنى نه ديب جدا قيلسون
ايرانلارنى قيلغانلارنى قيلالمسنك
پيرسيز يوروب ورد اوراد بيلالماسنك
استعانت تيلاب دعا آلامسنك
خاص بزركلار سيني نه ديب دعا قيلسون
دام تزوير قويوب خلقنى يولدين اوردونك
شيخليغ قيليب ريا برله دوكان قوردونك
عشرت قيليب شيطان برله دوران سوردونك
ديداريغه سيني نه ديب روا قيلسون

لطف کرم حق یاراتی سیزلار اوچون
 جان و دلدہ خدمت قیلمای سیزلار زبون
 الله اوچون بحث ایتارمین "تبقون سخون"
 ناپاکلارکا نه دیب لطفین عطا قیلسون
 کیچه یاتمای خواب غفلت حرام قیلسه
 ذکر قلب و ذکر سرنی تمام قیلسه
 مینک بیر آتین تسبیح ایتیپ کلام قیلسه
 بنده نه دیب درگاه کا خطا قیلسون
 امر معروف نهی منکر بیلیم قیلسه
 یاتسه قوبسه بیر خدای نی حاضر بیلسه
 تا اولکونچه خواجه سیغه خدمت قیلسه
 قوت بیرور آنی نه دیب دوتا قیلسون
 بی نماز و بی طاعت کا بیرماس قوت
 فعلی ضعیف اوزی معیوب بیرماس همت
 رزقی ناقص اوزی ناجنس کورماس دولت
 اول فاسقنی دلین نه دیب صفا قیلسون
 حیف آدم اوز قدرینی اوزی بیلماس
 من لیک قیلیب یخشی لارنی کوزکا ایلماس
 "هو" صحبتین قورکان بیرکا قاجیب کیلماس
 اول بی وفا عهده نه دیب وفا قیلسون
 آدم اول دور فقیر بولوب یولده یاتسه
 تفریق صفت عالم انی باسیب اوتسه
 یوسف صفت برادری قول دیب ساتسه
 قولنی قولی اول قول نه دیب هوا قیلسون
 شوقی ذوقی محبت دین عیان قیلغیل
 عاشقلارکا عشق اوتی دین بیان قیلغیل
 خوارلیق زارلیق مشقتنی نشان قیلغیل
 چین عاشقلار اوتدین نه دیب حذر قیلسون

الله ديبان اوتقه كيردى خليل الله
 اوشل اوتنى بستان قيلدى كورونك الله
 بوينين قسيب ييغلاب ايدى شيئاً لله
 فقير مسكين اونده نه ديب هوا قيلسون
 حقه عاشق صادقلارى يورور خلوت
 تانكلا بارسه حق قاشيده كورار عزت
 جنت كيريب ديدار كورار عيش راحت
 پنهان يورار خلقه نه ديب ريا قيلسون
 قول خواجه احمد درد حالت پيدا قيلغيل
 جان و دلنى حق يوليده شيدا قيلغيل
 دردين تارتيب روز محشر غوغا قيلغيل
 درد بولمسه موليم كيمكا شفا قيلسون

(۱۱۴)

حکمت

بير كون كيلدى ابوبكر سلمان بيلان
 حق مصطفى رازين آجتى رحمن بيلان
 بارجه بارور بو دنيادين ارمان بيلان
 ايلكين بولوب حقه واصل بولماق اوجون
 عزرائل بير كون كيلدى فرمان بيلان
 فاطمه سلام بيردى اكرام بيلان
 حق مصطفى مشغول بولدى ايمان بيلان
 اسيف تن دين عزيز جاننى بيرماق اوجون
 رسول ايدى صحابه لار بحيل بولونك
 آخرت قه اولاندوق سيزانوق بيلينك
 روزه توتونك، نماز اوقونك، زكوة بيرينك
 جهنمدين اوزنى آزاد قيلماق اوجون

دوشنبه کون حق مصطفی دنیا قویدی
 حق تعالی فرمانی غه بویون سوندی
 ابن عباس سونی قویدی علی یودی
 اوچماق ایجره حله تونین کیماق اوجون
 الله دیبان صحابه لار تبراندیلار
 پیغمبرنی جنازه سین کوتاردیلار
 اول سدره المنتهی غه اشوردیلار
 عرش اوستیغه تیکوروبان قویماق اوجون
 آسمانده کی فرشته لار ییرکا ایندی
 پیغمبرنی نوری برلان عالم تولدی
 بابام تیو فاطمه کریان قالدی
 باباسیدین یتیم بولوب قالماق اوجون
 قول خواجه احمد کوهرینکلیغ حکمت ایدی
 ایرانلارکا خدمت قیلیب نظر تابدی
 توقسان توقوز مینک حکمت ایتیپ داستان قیلدی
 داستان قیلیب بوستان ایچره یورماق اوجون

(۱۱۵)

حکمت

"قل هو الله"، "سبحان الله" ورد ایلاسام
 بیر و باریم دیدارینکنی کورار مین مو
 باشدین آباغ حسرتینکده درد ایلاسام
 بیر و باریم دیدارینکنی کورار مین مو
 ایلک بیرده چولار گیزیب کیا ییدیم
 تاغلار چیقیب طاعت قیلیب کوزوم اویدیم
 دیدارینکنی کورالمادیم جان دین تویدیم
 بیر و باریم دیدارینکنی کورار مین مو

ايليك ايكي ياشده كيچتيم خانمان دين
 خانمانيم نه كورونكاي بلكه جان دين
 باش دين كيچتيم، جان دين كيچتيم. هم ايمان دين
 بير و باريم ديدارينكنى كورار مين مو
 ايليك اوچده وحدت مي دين روزى قيلدى
 يولدين آركان گمراه ايديم يولغه سالى
 الله ديديم لئيكَ ديدان قولوم. آلدى
 بير و باريم ديدارينكنى كورار مين مو
 ايليك تورته وجودلاريم نالان قيلدى
 معرفت نى ميدانیده جولان قيلدى
 اساعيل ديك عزيز جانين قربان قيلدى
 بير و باريم ديدارينكنى كورار مين مو
 ايليك بيشده ديدار اوجون كدا بولدوم
 كويدوم، ياندوم كل ديك تقى فنا بولدوم
 بحمدالله ديدار ايزلاب ادا بولدوم
 بير و باريم ديدارينكنى كورار مين مو
 ايليك آلتى ياشقه ييتى مونكلوغ باشيم
 توبه قيلديم آقارموكين كوزده ياشيم
 ايرانلاردين بهره آلماي كونكلى تاشيم
 بير و باريم ديدارينكنى كورار مين مو
 ايليك ييتى ياشده عمروم ييلديك اوتى
 ايا دوستلار عمل سيز مين باشيم قاتى
 بحمدالله پير مغان قولوم توتى
 بير و باريم ديدارينكنى كورار مين مو
 ايليك سيكز ياشقه كيرديم مين بى خبر
 قهار ايكام نفسمنى قيل زير و زير
 همت بيرسنگ شوم نفسمكا اورسام تير
 بير و باريم ديدارينكنى كورار مين مو

ایلک توقوز یاشقه یتیم داد و فریاد
جان بیرارده جانانیمی قیلما دیم یاد
نه یوز برله سینکا ایتای قیلکیل آزاد
بیر و باریم دیدارینکنی کورار مین مو
کوزوم یوموب تا آجقونچه یتی آلمیش
بیلیم باغلاب مین قیلما دیم بیر یخشی ایش
کیچه کوندوز بی غم یوردوم مین یاز و قیش
بیر و باریم دیدارینکنی کورار مین مو
آلمیش برده شرمنده مین کناهیم دین
ایا دوستلار کوب قورقه مین الهم دین
جان دین کیچیب پناه تیلای خدایم دین
بیر و باریم دیدارینکنی کورار مین مو
آلمیش ایکی یاشده الله پرتو سالدی
باش دین - آیاغ غفلت لاریم رها قیلدی
جانیم، دلیم، عقلیم، هوشیم، الله دیدی
بیر و باریم دیدارینکنی کورار مین مو
آلمیش اوچده ندا کیلدی قول بیرکا کیر
هم جانینک مین، جانانینک مین جانینکنی بیر
"هو" شمشیرین قولغه آلیب نفسینکنی قیر
بیر و باریم دیدارینکنی کورار مین مو
قول خواجه احمد نفسنی تیفتیم نفسنی تیفتیم
آندین کین جانانیمنی ایزلاب تابتیم
اولماس بورون جان بیرماکنی دردین تارتیم
بیر و باریم دیدارینکنی کورار مین مو

(۱۱۶)

حکمت

نور خدا، دوست خدا، اول مصطفی
کیملار اوچون کیلدی رسول بیلکدینکز مو
درود خدا، ورد خدا، حق مصطفی
کیملار اوچون کیلدی رسول بیلدینکز مو
کیملار اوچون کریان قیلدی کوزلارینی
امت اوچون بریان قیلدی اوزلارینی
امت بولسانک آنکلا اوشبو سوزلارینی
کیملار اوچون کیلدی رسول بیلدینکز مو
یغلائی - یغلائی یوز کوزلاری ششتی کورینک
قیام توروب ایاغلاری ششتی کورینک
امت اوچون قایغو محنت چیکتی کورینک
کیملار اوچون کیلدی رسول بیلدینکز مو
ایا دوستلار مونی بیلور امت قانی
اکر بیلسنک آندین ارتوق نعمت قانی
قیامت کون آندین اوزا شفقت قانی
کیملار اوچون کیلدی رسول بیلدینکز مو
امت بولوب رسول قدرین بیلدینکزمو
تن جان برله سنتلارین قیلدینکزمو
رسول اوچون زار اینکرابان اوتدینکزمو
کیملار اوچون کیلدی رسول بیلدینکز مو
هیئات هیئات سعادت دور اول مصطفی
هیئات هیئات غنیمت دور اول مصطفی
هیئات هیئات عنایت دور اول مصطفی
کیملار اوچون کیلدی رسول بیلدینکز مو

قول خواجه احمد سوزلار سوزونك تليم قفا
 امتلاريم قيلغيل وفا. قيلمه جفا
 امتى كا مونداغ ديدى حق مصطفى
 كيملار اوچون كيلدى رسول بيلدينكز مو

(۱۱۷)

حکمت

بيدار بولغيل اى مؤمن سحر وقتى ايچنده
 قوتقار اوزونكنى اوتدين سحر وقتى ايچنده
 سحرلاردا اول كللار ثنا ايتور بلبللار
 كيم ايتور كيم بير و بار سحر وقتى ايچنده
 سحر وقتيدا كوكدين ملك كلور مؤمنغه
 يازوقلاردىن يانورغه سحر وقتى ايچنده
 سحر وقتيدا كوكدين جنت قيوغى اچارلار
 بيدار قلغه سنجارلار سحر وقتى ايچنده
 سحر وقتيدا قوپغا اولومنى ياد قيلغاي
 قورقونچه دين كوككه اوچقاي سحر وقتى ايچنده
 سحر لذتىنى عاشق قوللار بيلورلار
 حقنى حاضر كورارلار سحر وقتى ايچنده
 سحر وقتى خوش ساعت هم جنت ايرور راحت
 تنكرينكه قيل عبادت سحر وقتى ايچنده

(۱۱۸)

حکمت

كناهم باره باره حدين آشتى
 قيامت كون ميني شرمند قيلمه

باشیم یاستوقده و جانیم کیترده
 تنیم باریب لحد ایچره یتارده
 صراط اتلیق کذارکاده دین اوتارده
 قیامت کون مینی شرمنده قیلمه
 یوزوم قراسنی آق ایلاکای سین
 محمدنی مینکا یار ایلاکای سین
 سورار وقتده اوزونک بندم دیکای سین
 قیامت کون مینی شرمنده قیلمه
 کنهیم نینک حسابین یوق بلیب مین
 سینی درکاهینکه یالغوز کیلیب مین
 اوزونک رحم ایلاکیل بیچار قول مین
 قیامت کون مینی شرمنده قیلمه
 سینینک امرینک بلان ایش قیلما دیم مین
 بو دنیا دین کیتاریم بیلما دیم مین
 لحد ایچره یتاریم بیلما دیم مین
 قیامت کون مینی شرمنده قیلمه
 بو یاتغانلاردین عبرت آلمادیم مین
 کوزوم یاشین توکوب یالبارما دیم مین
 کتاب سوزین قولاقه آلمادیم مین
 قیامت کون مینی شرمنده قیلمه
 یولومنی باشقاره آلمای یولدا قالدیم
 ایکام قوللوغینی مین آرقه سالدیم
 کنهیمنی ییغیب مین قولغه آلدیم
 قیامت کون مینی شرمنده قیلمه
 خداوندا عجب حیرانده بولدوم
 کنهیمنی کوروب شرمنده بولدوم
 حسابین تاپمایین درمانده بولدوم
 قیامت کون مینی شرمنده قیلمه

غریب لیقدا یوروب مین زار حیران
 خواجه م سین مینکا بیر کیل نور ایمان
 مینک مشکل لاریم نی ایلہ آسان
 قیامت کون مینی شرمندہ قیلمه
 غریبنک نی وصالینک کا یتورکیل
 صراط اتلیق کذرکاه دین اوتورکیل
 خواجه! سین جرم - عصیانم کچورکیل
 قیامت کون مینی شرمندہ قیلمه

(۱۱۹)

حکمت

دم بو دم دور اوزکا دمنی دم دیمه
 دنیادین بی غم اوتارسین غم دیمه
 کویمسه جان دلینک هم استخوان
 کوز یاشینک آقان بیله سین نم دیمه
 خواه کولسه بیغلاسه عاشق ایللی
 چهره سرخین کوروب بی غم دیمه
 اصل نسلینک قطره آب مینی
 خسنی کورسنگ سین اوزونکدین کم دیمه
 آدمیده ذره معنی بولماسه
 سین آتی آدم کوروب آدم دیمه
 تویماسه سر معنی دین آدم ایماس
 سین آتی صورت کوروب محرم دیمه
 کر یورکده بولماسه یوز داغ درد
 زینهار قاجقیل آنی همدم دیمه
 تیکسه بیلکان آبدار خنجری
 جان بیرور جانانه غه مرهم دیمه

دوستلار دیوانه ایرماس هر کیشی
 عز و جاهدین کیچماسه آدم دیمه
 مثل دریا یوزیده یورکان خسی
 های - هوی دیکان بیلان محکم دیمه
 احمد! توتقیل غنیمت هر نفس
 یارسیز اوتکان بو دم‌نی دم دیمه

(۱۲۰)

حکمت

ایا شاهی دو عالم پادشاهی
 یرورسن بنده‌نی پشت پناهی
 تیلاب دایم سینی اول ذات پاکینک
 شیاطین شریدین بیرکیل پناهی
 بو شیطان شریدین کیمکا قاجار مین
 سینی آلدینکده‌دور سری کماهی
 خداوندا سینکا مین یاندیم ایمدی
 اوزونک سین بارجه‌کا رازق آلهی
 "کراما کاتبین" آتلیغ فرشته
 بیابان قم‌لاریدین کوب کناهی
 محمد کیم ایرور هادی عالم
 اوشال کونده بولادور دادخواهی
 اوقوب نامم‌نی کورسام هیچ عمل یوق
 باشیم قویی سالیب یولغوم تباهی
 که مین دیرمین: بو ایشنی قیلغانیم یوق
 تمام اعضالاریم بولغای کواهی
 اولوم‌نی دستیدین هیچکیم قوتولماس
 قلنکدر بول باشینکا کی کلاهی

جہنم اوستیدہ تارتیغ صراطی
 کوزوب بندہ اورار افسوس آہی
 خواجہ احمد یسوی! سین ییغلا دایم
 اسیغ قیلماس سینکا تنکلاکی آہی

(۱۲۱)

حکمت

ناکھان توروریمده کونکلوم ایچرہ
 حق مولیمنی نظرکاهی توشتی بولغای
 قرق ییلیق زنکار باسقان کونکلوم ملکین
 حق یادینی نوری برله آجتی بولغای
 ذاکرلاری جمع بولوب توزولمیشده
 ذکر سماعدین توسونی قورولمیشده
 برین عقبی دنیا سیدین اورولمیشده
 کونکل قوشی حضرت تبا اوجتی بولغای
 هیچ بیلماس مین نیچوک بولغای مین ایشیم
 آنینک اوچون آقار دایم کوزده یاشیم
 سحرلارده قوپوب حق دین تیلامشیم
 فرشته لار آمینی غه توشتی بولغای
 مونکلوغ جانغه یقین تورور حق درکاهی
 ندامتده یتارموکین برار اھی
 قایسی کونکل بولسه حقنی نظرکاهی
 حق نظری ایچکا تولوب تاشتی بولغای
 حق ایشین حقلیق اوچون بیوردیلار
 اوزلارینی خلق لار ارا یتوردیلار
 محنت لارین نعمت ینکللیغ کوتاردیلار
 بغری قانلیغ کوزی یاشلیغ تولدی بولغای

محب قوللار محبوبی غن قایردیلار
 دنیا قویوب دین ایشی غه اوکوردیلار
 عاشق قوللار الله تیو تبراندیلار
 شیطان نی زهری یاریلیب قاچتی بولغای
 الله دیکیل ای قول احمد! اوزونک بیلکیل
 اوزونک بیلیمیش علمینک برله عمل قیلکیل
 اولوغ کیچیک یارانلاردین عذر قیلکیل
 سین بیلماسده سیندین خطا کیچتی بولغای

(۱۲۲)

حکمت

ایا دوستلار یورک. بفریم بولدی کباب
 حقیقت لیغ عاشق جان دین اوتی بولغای
 عشق پرتوی کونکل ملکین قیلدی خراب
 اول سبب دین عقل هوشوم کیتی بولغای
 عشق سیز کیشی آدم ایرماس انکلاسنکیز
 بی محبت شیطان قومی تینکلاسنکیز
 عشق دین اوزکا سوزنی اکر سوزلاسنکیز
 ایلکینزدین ایمان اسلام کیتی بولغای
 میخانه غه کیرکان عاشق سَری عیان
 بغری بیشیب یاشی آقیب قیلور افغان
 بیخود یورار قایده بارسه خانه ویران
 بیشک بیلنک وحدت می دین تانی بولغای
 عشق توشتی بو باشیمغه حیران بولدوم
 خانماندین کیچیب تقی سرسان بولدوم
 ایکی عالم برباد اوروب عریان بولدوم
 جیقان آهیم نه فلك کا یتی بولغای

عاقل ايرسنگ حقدین اوزکا سوزلار حرام
 تا تريک سين پير خدمتين قيلغيل مدام
 الله دیسنگ شیطان لعین سینکا غلام
 الله دیماس دین لارینی سانی بولغای
 عمری ضایع اوتکانلار عشقنی بیلماس
 جان دین کیچکان دیوانه نی کوزکا ایلماس
 "هو" صحبتین قورغان بیرکا قاجیب کیلماس
 جانی کونکلنی تاشدین بتر قاتی بولغای
 الله سویکان بنده دایم ییغلاب یورار
 حقدین قورقوب رازین ایتیپ سحر تورار
 یحیی صفت تینمای ییغلاب ماتم قورار
 بو دنیانی آرقه تاشلاب آنی بولغای
 عاشق لارنی ایشی ایرور سوز و کداز
 عاشق لارنی حاجت لاری روزه نماز
 روز محشر کوز یاشی دور حقه نیاز
 عارف عاشق درد و الم تارتی بولغای
 عاشق لارنی آغزی خندان دلی لرزان
 الله اوجون کوزده یاشی، بغری بریان
 جانی ذاکر، کونکلی شاکر، فکری جانان
 انشاء الله قیل کوفروکی اوتی بولغای
 عاشق لاری خلق ایچنده کویوب ییغلار
 ظاهر خنده باطن لاری یورک داغلار
 اجل استاب اولماک اوجون بیلین باغلار
 معشوقی غه عرض حالین ایتی بولغای
 عاشق لاری ملامت دین قاچماس بولور
 نادانلارکا باطن سرین آچماس بولور
 هر نامردکا درّ و گوهر ساچماس بولور
 اوزی اوقوب خون زرداب یوتی بولغای

پیر مغان سویکان عاشق هواسی یوق
 یوز مینک تورلوك طاعت قیلسه بناسی یوق
 ای دوستلاریم عشق دردینی دواسی یوق
 تونلار قوبوب پیر ایتاکی توتی بولغای
 پیر مغان نظر قیلسه بیرکای دوا
 های - هوس، ما و من لیک بولغای ادا
 آندین سونکره شیطان لعین سیندین جدا
 تار لحدده ایمان برلان یاتی بولغای
 قول خواجه احمد حق سوزینی سوزلار مدام
 حق دین اوزکا سوزلار باری ایرمیش حرام
 روزی قیلسه اورنونک بولغای دارالسلام
 مغفرت نی دریا سیغه باتی بولغای

(۱۲۳)

حکمت

شریعتده مرشد بولغان غالب قوللار
 شریعتدین آلا ر منزل آلور بولغای
 نمازیغه شروع قیلکان مؤمن قوللار
 اوجماخ اویین امید توتوب تورور بولغای
 ملك الموت فرمان برله جانیم آلسه
 اغا اینی بارچه ییغلیب قویوب یانسه
 یتتی قدم باسقاندین سونک قالور بولسه
 منکر نکیر کیریپ سؤال سورار بولغای
 منکر نکیر کیریپ سؤال سورار بولسه
 اول عمود اوتلوغ برله اورار بولسه
 باشیم کویوب جانیم، تنیم اوتقه یانسه
 قیناب جانیم تار لحدده کویار بولغای

تورت یوز قرق تورت پیغمبر مرسل نبی
 قالمادی بو جهان دین اوتی باری
 "کل نفس ذائقة الموت" آیتی
 قرآن ایچره آن دین خبر بیرور بولغای
 شریعت دین طریقت دین بیان بولدی
 حقیقت دین قرآن سوزی کلام بولدی
 بو جهانغه محمدنی نوری تولدی
 اول نور برلان ایکی جهان یارور بولغای
 خوش دولت دور ولایتده پادشاه بولسه
 عادل بولوب بیر مؤمننی قاضی قیلسه
 اوشال قاضی بارچه خلقتنی راضی قیلسه
 راضی لیق دین اوجماخ اوین آلور بولغای
 مؤمن قوللار نماز اوقوب بولسه فارغ
 اوشال قولنی رنکی بولغای مونداغ سارغ
 اول خدمت حق قاشیده بولسه لایغ
 حور قیزلاری قرشو کیلیب قوچار بولغای
 بعضی کیشی نماز قدرین قاچان بیلور
 هر نمازده ایمان باشدین تازه بولور
 صلوٰۃ دیسه غافل باشین بورکاب اویور
 غافل لیق دین عمرین ییل کا ساتار بولغای
 قول خواجه احمد قولمین دیسنگ طاعت قیلغیل
 قیامتنی کیلماکینی یاقین بیلکیل
 حقه یاووق بولای دیسنگ طاعت قیلغیل
 طاعت قیلغان حقه یاووق بولور بولغای

(۱۲۴)

حکمت

محبتنی شوقی برله یا راستاکیل
روزه نماز اوغانیمنی فرضی بولغای
محشرکاه ده عدلی برله سورار بولسه
عاشقلارنی بیر خدایغہ عرضی بولغای
عرضی شولدور خداییغہ مینک داد ایتار
حالیم کوردیب یاشین ساچیپ فریاد ایتار
نعره تارتیب محشرکاهنی آباد ایتار
عاشقلارنی بیر خدایغہ عرضی بولغای
چین عاشقلار دایم تبریک اولکان ایماس
ارواحلاری بیر آستیغہ کیرکان ایماس
زاهد عابد بو معنینی بیلکان ایماس
چین عاشقلار خلایقنی خضری بولغای
یازوقلاردین قورقوب اوزی ییغلاب تورار
روز محشر نتار مین دیب قانلار یوتار
صراط آتلیغ کذرکاهده یاشی قاتار
خواجہ سیغہ شکستلیغ عرضی بولغای
ذره عشقی کیمکا توشسه نالان قیلور
کوز یاشین آقوزوبان عمان قیلور
هر نه تابسه حق یولیده احسان قیلور
بخیللارنی عداوتی بغضی بولغای
عاشقلارنی یاش اورنیغہ قانی آققای
ملایک لار هر طرفدین نورلار یاققای
غافل بولسه حاضر بولدیپ اوزی باققای
چین عاشقلار بو دنیانی جغدی بولغای

اهل دنیا آخرت دین پرواسی یوق
 روحی تنها ایمان اسلام همراسی یوق
 طریقت یول اداشقان هیچ پرواسی یوق
 بندهمین دیر تیلی برله آغزی بولغای
 کیچه الله، کوندوز الله، تینمای یورار
 الله شمعی پروانه دیک اوزین اورار
 لیلی مجنون فرهاد شیرین دورین سورار
 حق تعالی عاشقلارنی سوزی بولغای
 عاشق کویسه خاص معشوقی برکا کویکای
 مجازیلار کویمای تورور جاندین تویکای
 چین عاشقلار کویکان سری پرنور بولکای
 اول سببدین معشوقیغه نازی بولغای
 اوتقه یانماس سالسه اوتدین عاشق کیشی
 بیر و کوکنی بوستان قیلغای آققان یاشی
 الله دیسه بیشک یارور ایچی تاشی
 کویماق یانماق عاشقلارکا بازی بولغای
 جمله عاشق ییغلیب بارکای درکاهیغه
 یاشین ساجیب افغان قیلیب بارکاهیغه
 یتتی دوزخ طاقت قیلماس بیر آهیغه
 رحمن ایکان عاشقلارکا قاضی بولغای
 عاشق لارنی یتتی کؤک کا یتتار آهی
 الله دیسه یکسان بولور هر کناهی
 عاشقلارنی رحمن ایکام تکیه کاهی
 عزیز باشی خلایقنی ایدی بولغای
 عاشقلارنی کوب کویدور کان حق دیداری
 آنینک اوچون تینمای ییغلاب قیلور زاری
 وعده قیلغان عاشقلاری کورار آنی
 حق جمالی کوز یاشینی مزدی بولغای

عاشق‌لاری حقه باقیب نعره تارتار
 ملایک‌لار تحفه قیلیب حقه ایتار
 شوق شرابین ایچکان عاشق شوقی آرتار
 شور افغان خلایق‌نی توزی بولغای
 می‌جان بخش ایچکان عاشق آنده سلطان
 آنینک اوجون حق یولیده جانی قربان
 تانکلا بارسه دیداریغه قیلور مهمان
 زمستانده می ایچورسه یازی بولغای
 پنهان یورور کیمنی کورسه عاشق قیلور
 لطف ایلاسه کذاب‌لارنی صادق قیلور
 حقدین قورقان درکاهی‌غه لایق قیلور
 ظاهر اعمی باطن ایچره کوزی بولغای
 عاشق یانار خلقدین تانار الله راضی
 عاشق‌لیق‌نی آرزو قیلغان شهید غازی
 حاجت ایرماس عاشق‌لارکا کوب و آزی
 قطره یاشی حق مولیم‌نی نذری بولغای
 جنون ایچره باشین یارغان قانی جاری
 ذکرین ایتسه الله اوزی بیر و باری
 سحرلارده قان ییغلاماق کار و باری
 عاشق‌لاری هر کون یوز مینک غازی بولغای
 قول خواجه احمد مالی یوقتور نذری باشی
 تانکلا بارسه خواجه‌سیغه تحفه یاشی
 عجز و نیاز شکسته‌لیغ قیلغان ایشی
 اشک سرخی روی زردی عذری بولغای

(۱۲۵)

حکمت

سبحان ایزیم فرمان قیلسه قدرت بيله
عاشقلاری غوغا قیلیب یورور بولغای
محشرکاهده افغان قیلیب یاشین توکوب
ایلکا اوزین کمراه قیلیب یورور بولغای
عاشقلارنی حق قاشیده یوز نازی بار
نعره تارتسه ذره هرکز قالماس ینار
روژه نماز تسبیح لاری پروردکار
باطن لاری کویا قیلیب یورور بولغای
حقنی ایزلاب همراه لاری زاغ و زغن
حاجت ایرماس عاشقلارکا باغ چمن
رحلت قیلسه جوروک ایکنی آنکا کفن
خضر والیاس همراه قیلیب یورور بولغای
عاشقلارنی کوز یاشیدور باغ و بوستان
آنده سیرار علی الدوام هزار داستان
ظاهرلارین بوزوب یورار خانه ویران
حق قدرتین انشا قیلیب یورور بولغای
بیخود بولوب کویوب یورار مست و حیران
الله تیو کوزده یاشی بغری بریان
نعره اوروب فریاد ایتیپ قیلور افغان
الله یادین ثنا قیلیب یورور بولغای
قادر ایکام قدرت بيله صلح ایلاسه
جنت ایچره کیرار عاشق امر ایلاسه
نعره تارتیب فریاد ایتیپ ورد ایلاسه
می نوش ایتیپ سماع قیلیب یورور بولغای

کیچه - کوندوز ییغلا دایم بردم تینمای
 تیلدین الله یادین ایتیپ هارب تالمای
 کوزده یاشی آقماس هرکز بغری کویمای
 یاشین آلیب کواد قیلیب یورور بولغای
 محبتنی براقینی مینیپ یورکان
 آنداغ عاشق طریقتده جولان قیلکان
 سر شراین ایچیپ ازل روحی قانغان
 عشق بابنده ندا قیلیب یورور بولغای
 دوزخ ایچره کیرسه عاشق پروا قیلماس
 کوروب بیلیب مال ملکنی قولغا آلماس
 حور و قصور غلمانلارنی کوزکا ایلماس
 فریاد ایتیپ غوغا قیلیب یورور بولغای
 قهار ایکام قدرت بیله ندا قیلسه
 دیدار اوچون کویکانلاریم کیل کیل دیسه
 کوز یاشینی آقوزوبان فریاد قیلسه
 عقل هوشین دانا قیلیب یورور بولغای
 رحمن ایکام رحمی برله ندا قیلکای
 حزین ندا ایشتیپ عاشق جانی کیرکای
 صفّا صفّا بولوب عاشق باش کوتارکای
 عشق اوزین یکتا قیلسه یورور بولغای
 عاشق بولوب حکمت ایدی قول خواجه احمد
 صدقی برلان ایشیتکانکا یوز مینک رحمت
 ایمان عطا قیلغای تنکریم تاج دولت
 عاشق دلین صفا قیلیب یورور بولغای

(۱۲۶)

حکمت

اول هو، آخر هو ديب بيخود بولكيل
حق جمالين كورساتمسه ضامن بولاي
ظاهر هو، باطن هو ديب يولغه كيركيل
حق جمالين كورساتمسه ضامن بولاي
لا اله الا الله ديب زاري قيلكيل
حق ذكريني هر كيم ايتسه ياري بيركيل
پير مغان خدمتینه يوكوروب يوركيل
حق جمالين كورساتمسه ضامن بولاي
تيلده آلکیل لا اله الا الله
ايچكا سالغيل هر نفسده بولکیل آگاه
پير مغان نظر قيلكاي سنكا ناكاه
حق جمالين كورساتمسه ضامن بولاي
ادهم صفت سوا بولوب دنيا تيبكيل
کیمنی کورسنگ خضر بيليب قولين اوپكيل
جمالنی کورای دیسنگ سحر قوپغيل
حق جمالين كورساتمسه ضامن بولاي
الله ديكان بندهلارنی قولى بولكيل
تفرق صفت يول اوستيده يولى بولكيل
عاشق لارنی کويوب اوچكان کلی بولكيل
حق جمالين كورساتمسه ضامن بولاي
ذاکر بولوب شاکر بولوب حقنی سويكيل
سحر وقتده قوپوب نفسنگ کوزين اويكيل
بايزيدديک عاشق بولوب دنيا قويكيل
حق جمالين كورساتمسه ضامن بولاي

سورسك، تورسك، ياتسك، قوبسك، حقنى ايتسك
 ذاكر بولوب شاكر بولوب جاندين اوتسك
 والله بالله دنيا حرام تاشلاب آتسك
 حق جمالين كورساتمسه ضامن بولاي
 حق وصلی غه يتاي ديسك سحر ييغلا
 الله تيو يورك بغرينك اوتقه داغلا
 همت قورين جان بىلى كا محكم باغلا
 حق جمالين كورساتمسه ضامن بولاي
 ادهم صفت بو دنيادين كونكل اوزكىل
 حرص هوا تكبرنى اوين بوزكىل
 محبتنى درياسیغه جوموب يوزكىل
 حق جمالين كورساتمسه ضامن بولاي
 كيچه - كوندوز آخرتنى غمین ييكيلى
 توت اويقونى حرام قيليب طاعت قيلكىل
 محبتنى شوقى برلان كوكسونك ياركىل
 حق جمالين كورساتمسه ضامن بولاي
 اهل هوا من - من ليكدین قاجيب يوركىل
 اهلين تابسك كوزده ياشنك ساچب يوركىل
 محبتنى شرابى دين ايچيب يوركىل
 حق جمالين كورساتمسه ضامن بولاي
 ايا دوستلار بو دنيادين ييغلاب اوتىنك
 فانى تورور بو دنيادين كيچيب كيتىنك
 محبتنىنك جامين آليب مى نوش ايتىنك
 حق جمالين كورساتمسه ضامن بولاي
 كيچه الله. كوندوز الله تينماي ايتكىل
 كيچه لارى بيدار بولوب قانلار يوتكىل
 بو دنيانى عزت لارين تاشلاب اوتكىل
 حق جمالين كورساتمسه ضامن بولاي

پیر مغان ایتاکی نی محکم توتقیل
 معرفت نی بازاریده اوزونک ساتقیل
 می نوش ایتیپ سماع قیلیب ذکرین ایتقیل
 حق جمالین کورساتمسه ضامن بولای
 "یا ربنا ظلمنا" دیب ناله قیلغیل
 کوز یاشینکنی هر طرفقه ژاله قیلغیل
 حق یادینی ایتیپ اوزونک واله قیلغیل
 حق جمالین کورساتمسه ضامن بولای
 درد حالت پیدا قیلیب یولغه کیرکیل
 پروانه دیک شمع نی کوروب اوزونک اورکیل
 قایدا بارسنک ذکرین ایتیپ دوکان قورکیل
 حق جمالین کورساتمسه ضامن بولای
 محبت نی میدانیده باش اویناسنک
 "هو هو" تیو ذکرین ایتیپ جان قیناسنک
 دیدار تیلاب قان یاش توکوب زار اینکراسنک
 حق جمالین کورساتمسه ضامن بولای
 ایرانلارنی آستانه سین سقلاب یاتقیل
 سحرلارده چار ضرب اوروب ایرته قوپقیل
 زاری قیلیب فنا بولوب جاندین اوتقیل
 حق جمالین کورساتمسه ضامن بولای
 تفراق صفت خوارلیق تارتقیل نفسنک اولسون
 خلق ایچنده رسوا بولکیل عالم کولسون
 چین کونکلده ییغلار کورکیل خدا بیلسون
 حق جمالین کورساتمسه ضامن بولای
 کوز یاشینکنی دریا قیلغیل رحمی کیلسون
 غریب بولوب یولدا یاتقیل قولونک آلسون
 پنهان یوروب طاعت قیلغیل تنکری بیلسون
 حق جمالین کورساتمسه ضامن بولای

هجران تونی آهینک برلان اوتلار یاققیل
 کوز یاشینکنی برقی بیرلان چیقماق چاققیل
 ایرانلارنی صحبتیده ایریب آققیل
 حق جمالین کورساتمسه ضامن بولای
 ای نا انصاف دنیا فانی، حقه یانغیل
 بنده بولسنگ حق ذکرینی تینمای آیتغیل
 پیر مغان خدمتیدا جفا تارتقیل
 حق جمالین کورساتمسه ضامن بولای
 الله تیو فنا بولکیل بغرینک کویسون
 تونلار قویپ طاعت قیلکیل تنکری سویسون
 آندین سونکره خاص بزرکلار نظر قیلسون
 حق جمالین کورساتمسه ضامن بولای
 تون سحرلار بیدار بولوب سحر تورکیل
 عاشق بولسنگ اسماعیل دیک جاندین اوتکیل
 قول آیاغینک محکم بوغوب امرین توتکیل
 حق جمالین کورساتمسه ضامن بولای
 ریاضتانی قنیغ تارتیب جانلار قینا
 میدان ایچره باشنک بریب باشینک اوینا
 عیش دین کیچیپ مال اورنیغه زقوم چینا
 حق جمالین کورساتمسه ضامن بولای
 فرهاد صفت محنت تارتیب تاغلار کسکیل
 بایزید دیک تونلار قوپوب اوزونک آسکیل
 جنید دیک جول کزیب خارلار باسکیل
 حق جمالین کورساتمسه ضامن بولای
 حق رحمتی اولوغ دریا بیر قطره بس
 قطره سیدین بهره آغان قیلماس هوس
 ما و من لیک سیندین کیتار مثل مکس
 حق جمالین کورساتمسه ضامن بولای

حق رحمتی اولوغ دریا قابل بولغیل
 طالب ایسنک حق ساریغه مایل بولغیل
 زهد تقوی دایم قلیب نایل بولغیل
 حق جمالین کورساتمسه ضامن بولای
 لالا ایتیپ الا اللهغه شیدا بولغیل
 منصور صفت انا الحق دیب غوغا قیلغیل
 کریان بولوب کوز یاشینکنی دریا قیلغیل
 حق جمالین کورساتمسه ضامن بولای
 ای بی خبر غفلت بیلان اویقوده سین
 دنیا تیلاب کیچه - کوندوز قایغوده سین
 طاعت قیلمای سوزلار سوز لب بیهوده سین
 حق جمالین کورساتمسه ضامن بولای
 تاشدین توشک - یستوق قلیب طاعت قیلسنک
 حق امریغه راضی بولوب بویون سونسنک
 اولار وقتده ایمان آریغ قولغه آلسون
 حق جمالین کورساتمسه ضامن بولای
 قول خواجه احمد نصیحتنی اوزونکا قیل
 ای بی خبر خلقنی قویوب اوزونکنی بیل
 تاغ دین آغیر کنهینک بار اوزونکا کیل
 حق جمالین کورساتمسه ضامن بولای

(۱۲۷)

حکمت

تطوع روزه توتار خلقلارغه شیخ لیق ساتار
 علمی یوق عامیدین بتر آخر زمان شیخ لاری
 بیلی کا فوطه چالوب اوزنی کیشی سانور
 عرصاتده اوفتانور آخر زمان شیخ لاری

باشیغه دستار اورار علمی یوق نیکا یرار
 اوقی یوق یاسین قورار آخر زمان شیخلاری
 الاین دین آل قیلور معمله نی مال قیلور
 ایسسز عمرین ییل قیلور آخر زمان شیخلاری
 شیخلیق اولوغ تورور حضرتکا ایلتنکان اش تورور
 آش بیرماس بغری تاش تورور آخر زمان شیخلاری
 مسکین "احمد" قندهسین حق یولنده نیدهسین
 علمینک یوق نه ساندہسین آخر زمان شیخلاری

(۱۲۸)

حکمت

عاصی، جافی، قلونک کیلدی درکاهنک کا
 قولوم توتوب یولغه سالکیل "انت الهادی"
 ایرکلیک قادر ییغلاب کیلدیم بارکاهنک کا
 قولوم توتوب یولغه سالکیل انت الهادی
 تون کیچهلار تانک آتقونچه یاتماق ایشیم
 سحر توروب راز ایتمادی مونکلو باشیم
 ندامت ده آقارموکین کوزده یاشیم
 قولوم توتوب یولغه سالکیل انت الهادی
 یولسز یولغه کیردیم دوستلار حالیم خراب
 خلقدین سورسام هیچ کیم بیرماس منکا جواب
 خالقیم سین یول کورساتکیل عالیجناب
 قولوم توتوب یولغه سالکیل انت الهادی
 خجالتده قورقوب کیلدیم کنایمدین
 ذاتی اولوغ پروردکار الهیمدین
 ندا کیلدی نومید قویمای درکاهیمدین
 قولوم توتوب یولغه سالکیل انت الهادی

يىغلاب كىلدىم حضرتىنك كا ايا شاهيم
 قىساب كىلدىم قرانغولوق چىقىل ماهىم
 پادشاهىم، سىن بىر و بارىه. تكيه كاهىم
 قولوم توتوب يولغە سالكىل انت الهادى
 باشدين اياغ بولدى كنه قايدە باراى
 يول اداشكان ايتدىك بولوب كىمدىن سوراى
 بو حال برلان ديدارىنكنى قايدىن كوراى
 قولوم توتوب يولغە سالكىل انت الهادى
 مین بر كىتسام ايليك اياق جملە كواه
 رحمت ايتىب سىن كىچماسنك حالیم تباہ
 شرمندەمىن، دزماندەمىن كوتتور كناه
 قولوم توتوب يولغە سالكىل انت الهادى
 كنه دردى بيمار قىلدى طبىم سىن
 محبوبم سىن، درمانىم سىن، حبىم سىن
 يولده قالدىم حالیم سوارار رفيقم سىن
 قولوم توتوب يولغە سالكىل انت الهادى
 فاسق، فاجر رحمتىنكدىن نوميد ايماس
 سىندىن اوزكا هيچكىم مېنى يولغە سالماس
 لطف ايتمىسنك مشكل لارىم آسان بولماس
 قولوم توتوب يولغە سالكىل انت الهادى
 هيچ كىشى يوق يىردە، كوكدە سىن سىن قادر
 شكىم يوقتور بو سوزومده اوزوينك ناظر
 هم يكه سىن، يكانه سىن بيشك حاضر
 قولوم توتوب يولغە سالكىل انت الهادى
 مین يولونكدە باش بىرمادىم قادر خدا
 باش نه بولغای غريب جانىم يوز مىنك فدا
 درد هم اوزونك، درمان اوزونك لطفونك دوا
 قولوم توتوب يولغە سالكىل انت الهادى

جان وایمان غذا سیدور سنینک ذوقینک
 جانیم بیریب ساتقون آلائی سینی عشقینک
 روز محشر شفیع بولغای سینی شوقینک
 قولوم توتوب یولغه سالکیل انت الهادی
 "قل هو الله". "سبحان الله" دین قمچی سی
 روزه. نماز. تسبیح. تهلیل حق ایلچی سی
 پیر مغان طالب لاری یول باشچی سی
 قولوم توتوب یولغه سالکیل انت الهادی
 انت الهادی. انت الحقنی ذکرین ایتسام
 هادی بولسنک ایدی یول دین راستقه قیتسام
 هر ذکرینی تیل کا آلیب نعره تارتسام
 قولوم توتوب یولغه سالکیل انت الهادی
 انت الهادی انت الحقنی ذکری قوی
 پیر مغان سوزلاریدین آلسه فتوی
 باطن لاری روشن بولوب بولور یخشی
 قولوم توتوب یولغه سالکیل انت الهادی
 قول خواجه احمد رحمتینک دین امید توتای
 خواجه منی بندم دیسه شکرین ایتای
 بندم دیمای یوز اوکورسه نیچوک ایتای
 قولوم توتوب یولغه سالکیل انت الهادی

(۱۲۹)

حکمت

خوش قدر تلغ پروردکار بیر و باریم
 قولوم توتوب یولغه سالکیل انت الهادی
 ذاتی اولوغ رحمن ایکام هم جباریم
 قولوم توتوب یولغه سالکیل انت الهادی

سحر وقتده ییغلاب توکسام قانلار کوزدین
 کونکلم آچیب آکاه بولای یخشی سوزدین
 قدرتیغه محو بولیب کیتای اوزدین
 قولوم توتوب یولغه سالکیل انت الهادی
 اجابتنی اندین تیلاب قیل مناجات
 حاجتینکنی روا قیلغای قاضی حاجات
 رحمت دریا تولوب تاشار ییتسه فرات
 قولوم توتوب یولغه سالکیل انت الهادی
 ای داد ایکام هیچ یتمادی سینکا دادیم
 بیر و کوکنی نالان قیلدی بول فریادیم
 روز محشر قیچقیرغایمو کیل آزادیم
 قولوم توتوب یولغه سالکیل انت الهادی
 بنده بولسنک ذکرین ایغیل قولونک آلسون
 یولدین آرسنک رهبر بولوب یولغه سالسون
 سحرلارده زاری قیلغیل رحمی کلسون
 قولوم توتوب یولغه سالکیل انت الهادی
 انت الهادی، انت الحقنی ذکرى الله
 حق ذکرینی ایغیل تینمای بولغونک آکاه
 رحیم مولیم نظر قیلسه اولور ناکاه
 قولوم توتوب یولغه سالکیل انت الهادی
 انت الهادی، انت الحقنی ذکرى دلده
 بیلماس نادان ذکرین ایتیپ ظاهر تیلده
 مین - مین دیکان شیخ زمان آب و گیلده
 قولوم توتوب یولغه سالکیل انت الهادی
 انت الهادی، انت الحقنی ذکرى اولوغ
 حق ذکرینی ورد ایلاکان کونکلی سنوغ
 ورد ایلامای شیخمین دیسه جایى تموغ
 قولوم توتوب یولغه سالکیل انت الهادی

ای یرانلار نفس ایلکیدین آرمانده مین
 عصیان یوکی دوتا قیلدی درمانده مین
 عاجز قولونک هر نه قیلسه فرمانده مین
 قولوم توتوب یولغه سالکیل انت الهادی
 قول خواجه احمد نفس دین اولوغ بلا بولماس
 یول اوستیندا تفریق بولسام کافر اولماس
 بیر و کوکدین طعمه بیرسام هرکز تویماس
 قولوم توتوب یولغه سالکیل انت الهادی

(۱۳۰)

حکمت

مرکب لاغر، یوکوم آغیر، اوزوم غمکین
 حسرت بیلان عقل هوشیم کیتی تمکین
 اوتوب کاروان کوزدین غایب بولدی ساکن
 بارور جایم بیلالماس مین قیان ایمدی
 عبث اوتی ایسز عمروم رسوالیقده
 هیچ بولمادیم زمان ترس خدالیقده
 دایم یورروم نفسیم اوجون کدالیقده
 هر نه قیلغان سودالاریم زیان ایمدی
 بو حالتده اول عزرائیل کیلسه ناکاه
 اسیغ تندین جاننی آله بیرکیل پناه
 شیطان آلیب ایمانیمنی کیلسه رسوا
 برادرلار آرا یولده من قالغان ایمدی
 بو حالتده سوز ایتورغه یوقتور فرمان
 اوجوب قالغای وجود ایچره شمع ایمان
 قزیل کل دیک اوشبو یوزونک بولور سامان
 یقین بولغونک بیر آستیغه نهان ایمدی

زن - فرزند اغا اینینک ییغلاب تورکای
 میراث دییان مال - ملکونک بولوب آلکای
 ایلتیب سنی قرا بیرکا تیغیب کومکای
 طعمه قیلکای قریش آتلیغ ییلان ایمدی
 کیل ای خائف بو ایشلاردین خبر آلکیل
 توبه قیلیب دنیا قویوب حقنی سویکیل
 قول خواجه احمد بو دنیادین اوتوب یانکیل
 شاید قیلغای نظر پیر مغان ایمدی

(۱۳۱)

حکمت

خوشلامایدور عالم‌لار سزنی ایغان تورکینی
 عارف‌لاردین ایشتسنک آجار کونکل ملکی‌نی
 آیت حدیث معنی‌سی تورکی بولسه موافق
 معنی‌سی‌کا یتکانلار بیرکا قویار بورکی‌نی
 قاضی، مفتی، ملالار شریعت درکاهنی
 عارف، عاشق آلیب‌دور طریقت‌نی ارکی‌نی
 عمل قیلغان عالم‌لار دینمیزنی چراغی
 براق مینار محشرده ایگری قویار بورکی‌نی
 عمل قیلسه عالم‌لار دین و آیین یاروقی
 کورسه بولور الارنی رنک رویی کورکی‌نی
 عمل قیلمای قال علمین اوقوی بیلمای قالغانلار
 آرقه‌سیغه کوتارور قرق ایشک یوکی‌نی
 خواجه من دیب لاف اورمه اوشبو دنیا بی پایان
 بیلا من دیب ایتماسین کونکداکی چرکی‌نی

رهنمادور خواجه احمد گلستان معرفت
 سوزلار سوزی حقیقت آجار کونکل ملکی نی
 مسکین ضعیف خواجه احمد یتی پشتینک کا رحمت
 فارسی تیل نی بلیبان خوب ایتادور ترکی نی

(۱۳۲)

حکمت

کونکلوم قوشی اوجار دایم قنات توقوب
 ایکی کوزوم ندامتده قائلار توکوب
 تن اولتروب ریاضتده تیزین چوکوب
 یا الهی عفو قیلغیل کناهیم نی
 نادان لیقده قیلغان ایشیم بارچه خطا
 توبه تقصیر ایلامادیم یقام توتا
 کردنیمکا طوق ینکلغ سالب فوطا
 یا الهی عفو قیلغیل کناهیم نی
 دنیا سویوب دین سوداسین اوتکاریب مین
 یازوق یوکیں ایا دوستلار بتکاریب مین
 درکاهنا معصیتلار کیلتوروب مین
 یا الهی عفو قیلغیل کناهیم نی
 شوم دنیاغه کونکل باغلاب کاهل بولدوم
 عشرت بیلان وا دریغا جاهل بولدوم
 بو دنیانی اوتارینی ایمدی بیلدیم
 یا الهی عفو قیلغیل کناهیم نی
 کونکل ملکین توتمش اوخشار ظلمت تونی
 من لیک ایچره پیدا بولور ما و منی
 پیر خدمتی یراق قیلور بیزدین آنی
 یا الهی عفو قیلغیل کناهیم نی

قول خواجه احمد کناهی کا قایل ایرو
 هر کیم الله دیسه آنکا یاری بیرو
 ایرانلارنی صحبتی کا مایل ایرو
 یا الهی عفو قیلغیل کناهیمنی

(۱۳۳)

حکمت

قدرت برلان فرمان قیلدی مولیم بیزغه
 بیرده، کوکده یانلیق مخلوق قالماس ایرمیش
 قبض قیلدی عزرائیلنی عالم اوزرا
 عزیز جانین آلماقونچه قویماس ایرمیش
 یاشیم مینی یاش بولور دیب آیتور ایردیم
 هر نه خالص بولسا آز دیب آیتور ایردیم
 تورلوک - تورلوک دعا ایشلر قیلور ایردیم
 ایمدی بیلدیم مین آیتکاندیک بولماس ایرمیش
 دنیا مینی ملکوم دیکان سلطانلارغه
 عالم مالین سانسیز ییغیب آغانلارغه
 عیش و عشرت برله مشغول بولغانلارغه
 اولم کیلسه بیرى وفا قیلماس ایرمیش
 مغرور بولمان، ای دوستلاریم! عشرت ایتیب
 کیچه - کوندوز یالغان آیتیب بیخود یاتیب
 جان آغونچی کیلور ایرمیش بیر کون ایتیب
 مونداغ یرده غافل یورسه بولماس ایرمیش
 قول "خواجه احمد" اولارینی بیلا کورقیل
 آخرتنی یراقنی قیلا کورقیل
 بارورمن دیب یول باشیده تورا کورقیل
 ملک الموت کیلسه فرصت قویماس ایرمیش

(۱۳۴)

حکمت

سبحان ایدیم اوزی دور اول مصطفی بیوردی
بابام آرسلان تیکوردی شیخم احمد یسوی
مصطفی نینک خرقه سین کیدی، ییدی لقمه سین
توتدی کعبه حلقه سین شیخم احمد یسوی
باقسه کعبه کورونکان باسسه ییرلار تورولکان
لدن علمی بیرلکان شیخم احمد یسوی
اصلی ایرور خاندان ییلماس آنی کوب نادان
بیلور آنی حق یزدان شیخم احمد یسوی
اسحاق بابا یریقی شیخ ابراهیم قولنی
مشایخ لار اولوغی شیخم احمد یسوی
یاسی سونینک اراسی یاتور کوهر پاره سی
مشایخ لار سراسی شیخم احمد یسوی
قرچیغنی قوشلاغان شونقار لاجین اوشلاغان
سانسز مرید باشلاغان شیخم احمد یسوی
شریعتی آراسته طریقتی پیوسته
حقیقتده شایسته شیخم احمد یسوی
شریعتنی سوزلاکان طریقتنی ایزلاکان
حقیقتنی بیلدورکان شیخم احمد یسوی
کون توغاندین باتارغه ترسه، جهود، تاتارغه
قوللوق قیلیب سانارغه شیخم احمد یسوی
اون سیکز مینک عالمده آتی مشهور کلامده
اورنی دار السلامده شیخم احمد یسوی
بابلار بابی خراسان سانسز تومان هندوستان
بابالار باشی [بابا] آرسلان شیخم احمد یسوی

آتام آتی ازغوسی یپار بولوب توزغوسی
ایکی جهان کوزکوسی شیخم احمد یسوی
خضر برله صحبتلیک الیاس برله الفتلیک
حق قاشنده حرمتلیک شیخم احمد یسوی
ترکستانغه بارالنک خدمتنده بولالنک
اولوش بیرسه الالنک شیخم احمد یسوی
بابا ماچین اول سلطان مرید بولدی بیگمان
حکیم خواجه سلیمان شیخم احمد یسوی

مناجات بدرگاه قاضی الحاجات جل جلاله

مناجات ایلدی مسکین خواجه احمد
الهی قیل همه بنده نکی رحمت
غریب احمد سوزی هرکز قوریماس
اگر ییر آستیغه کیرسه چوروماس
ینه منسوخ بولوب اول خوار بولماس
اوقوغان بنده لار بیمار بولماس
اوقوغانغه قیلور مین آنده شفقت
قیامت کونیده قیلغوم شفاعت
خدایم قیلسه انعام مینکا جنت
اوقوغان نی قیلور مین مین شفاعت
تیلایکی هر نه بولسه تنکری بیرکای
محبت شوقی نی کوکسیکا سالکای
جمالین کورساتیب پروردکاریم
اوزین یولیغه سالسون بیر و باریم
خدایم ایلاسون محشرده خرم
قیامت کون اریغ ذاتیغه مخرم
دعاغه یاری بیرسه هر مسلمان
اولار وقتیده ایلتهکای نور ایمان
مینى حکمت لاریم عالمغه تولغان
ایشیتمای هر کیم اولسه قیلغای ارمان

مینی حکمت لاریم دردلیککا درمان
 کیشی بوی ایلتمسه اول یولده قالغان
 مینی حکمت لاریم عالمده داستان
 روحوم کیلسه قیلور صحبت نی بوستان
 مینی حکمت لاریم کان حدیث دور
 کیشی بوی ایلتمسه بیلکیل خیث دور
 مینی حکمت لاریم طالب نی رزقی
 اکر چندیکه بولسه جرم و فسقی
 مینی حکمت لاریم فرمان سبحان
 اوقوب بیلسنک همه معنی قرآن
 مینی حکمت لاریم عالمده سلطان
 قیلور بیر لحظه ده چول نی کلستان
 مینی حکمت لاریم شوق محبت
 کوزینی یاشیغه قیلغای طهارت
 نمازیغه رسول الله امامی
 آنی قومی ملائک لار تمامی
 شکسته لیک بیله قیلغان نمازی
 قبول بولغای آنی حقه نیازی
 مینی حکمت لاریم عاشق غه ایتینک
 دلی آینه دیک صادق غه ایتینک
 همه کور و کر و باطنی کذاب
 تمام اقلیم نی گیزدیم تابمادیم صاف
 مینی حکمت لاریم صراف کا ایتینک
 خدای باکرم وهاب کا ایتینک

عدالت پادشاه بر آتی صادق
 قیلور بیر لحظه ده وصلی غه لایق
 مینی حکمت لاریم نادان ایشتماس
 دلی، کونکلی قارا پنډیم نی آلماس
 خطی دین بیخبر الله غه منکر
 ادب سیز بی ادب دنیا ده بی پیر
 خطی نی بتسه هر کیم نثر بتسون
 ولی نثری بتیب مقصود غه يتسون
 دینی ایمانی یوق اسلامی ویران
 قیامت تانکی آتسه یولده قالغان
 پیر کامل نی کورمای شیخ صنعان
 خدا قیلماس قبول اوقوسه قرآن
 اوزینی شیخ آلور کولباری حالی
 یکرمه بیش کا یتمای آنی سالی
 نصیحت لار قیلور پیر و جوان نی
 اوزی فهم ایماین یخشی یمان نی
 آلارنی سوزلاری ضال مضل دور
 شریعت اهلی بو ایل دین خجل دور
 اینانسون دیب مونی بیر نیچه بی عقل
 قیلورلار اولیالاردین مونی نقل
 قویوب دامین کذرکاه لار غه بی پیر
 تیلی مکر و حيله قیلغانی تزویر
 آنی مکر ی ایرور شیطان دین اعلا
 قوپار یوزی قرا محشرده تانکلا

الارنى كورمنكىز يوزىنى هر كىز
 اينكديك لعنتى دىن ايلانك پرهيز
 زبانى حال ايله اعمىنى ايتىم
 حقيقت سوز بيله جاهلنى سوكتىم
 اكر عالم بولسه جانىم تصدق
 دُر و كوهر سوزومنى ايشيتىب اوق
 دُر و كوهر سوزىن عالمغه ساچسه
 اوقوب اوقوسه كلام حقنى آچسه
 اوشال عالمغه جان قربان قىلورمىن
 تمامى خانمان احسان قىلور مىن
 قانى عالم قانى عامل يارانلار
 خدادىن سوزلاسه سىز جان برىنكلار
 چىن عالم يستوقىن تاشدىن ياراتى
 نىمه اوقدى آن عالمغه ايتى
 اوزىنى بىلدى ايرسه حقنى بىلدى
 خدادىن قورقتى و انصافغه كىلدى
 مىنى حكمتلارىم دانا ىشيتسون
 سوزوم داستان قىلىب مقصدغه يىتسون
 مىنى حكمتلارىم فعلى وقولى
 دلى كونكلىده بولسه ذكر مولى
 مىنى حكمتلارىم بير پىر كامل
 قايو بنده خداغه بولسه مايلى
 مىنى حكمتلارىم خوبلارغه ايتىنك
 دعا تكبير قىلىب رحمتكا باتىنك

مینی حکمت لاریم پیر زبردست
 ایشیتکانلار بولور بیهوش سرمست
 تیریک بولسه جهانده خوار بولماس
 اوقوغان بندهلار بیمار بولماس
 قیامده آنکا هادی بولور مین
 اکر دردلیک بولسه دارو بولورمین
 اکر یوز ییل عمر کورسه قوریماس
 اکر ییر آستیغه کیرسه چوروماس
 خدا قیلغای آنی دوزخدین آزاد
 بهشت جاودانده ایلاکای شاد
 اکر حکمت اوقوسه ایها الناس
 ایرور فرزند مینکا اول طالب خاص
 ایشیتیب حکمتیمنی گوشه آغان
 عطا قیلغای اولار وقتیده ایمان
 یسوی حکمتین دانا ایشیتسون
 ایشیتکانلار همه مقصودغه یتسون
 جواهر کانیدین بیر نکته آلسون
 ایشیتماکان باری حسرتده قالسون
 کیشی حکمت ایشیتسه جانی برلان
 چیقار جانی آنی ایمانی برلان
 قلاقه آلماغای بو سوزنی نادان
 آنی آدم دیمه اول جنس حیوان
 خدانی سوزیدین چیقان بو حکمت
 ایشیتکان کا یاغار باران رحمت

مینی حکمت لاریم کیم توتسه محکم
 خدا قیلغای آنی البته بی غم
 کرار جنت ایچیکا شاد و خندان
 خدایم ایلاکای مسرور و شادان
 مینی حکمت لاریم حقنی ثناسی
 محبت اهلینی دردین دواسی
 مینی حکمت لاریم قند و عسل دور
 همه سوزلار ایچنده بی بدل دور
 مینی حکمت لاریم انعام الله
 سحر وقتده دیسه استغفر الله
 آنی شیطان لعین توتماس یولی نی
 محمد مصطفی آلغای قولی نی
 پیغمبر امتیم دیب مهری تاوولار
 عزایل نی خدایم اوزی قاولار
 مینی حکمت لاریم درد سیزکا ایتمنک
 بهاسیز گوهریم نادانغه ساتمنک
 یسوی حکمتین قدریغه یاتقیل
 خم عشق دین می بر قطره تاتقیل
 خم عشق دین کیشی بیر قطره تاتقای
 خدانی وصلی کا بر یولی یاتقای

تمت الكتاب بعون الله الملك الوهاب

(پیرترکستان)

خواجہ احمد یسوی

دیوان حکمت



ISBN: 964-472-286-8